

সাজাহান

নাটক

বিজেন্দ্রলাল রায়
অনুবাদের সন্ধান

গুরুদাস চট্টোপাধ্যায় এণ্ড সন্স

২০৩/১/১, কর্ণওয়ালিশ স্ট্রীট • কলিকাতা

তুই টাকা চারি আনা

ষড়বিংশ সংস্করণ
সন ১৩৩৯ সাল

উৎসর্গ

মহাপুরুষ

ঐশ্বরচন্দ্র বিদ্যাসাগর

মহাশয়ের পূণ্যস্মৃতির উদ্দেশে

এই সামান্য নাটকখানি

উৎসর্গীকৃত হইল

কুশীলবগণ

কুশীলবগণ

পুরুষ

সাজাহান	...	ভারতবর্ষের সম্রাট
দারা	}	...
সুজা		
ঔরঞ্জীব		
মোরাদ		
সোলেমান	}	...
সিপার		
মহম্মদ সুলতান	...	ঔরঞ্জীবের পুত্র
জয়সিংহ	...	জয়পুরপতি
যশোবন্ত সিংহ	...	যোধপুরপতি
দিলদার	...	ছদ্মবেশী জানী (দানেশমন্দ)

স্ত্রী

জাহানাবা	...	সাজাহানের কন্যা
নাদিরা	...	দারার স্ত্রী
পিয়ারা	...	সুজার স্ত্রী
জহরৎ উল্লিসা	...	দারার কন্যা
মহামায়া	...	যশোবন্ত সিংহের স্ত্রী



1952 10 10 10 10 10

সাজাহান

প্রথম অঙ্ক

প্রথম দৃশ্য

স্থান—আগ্রার দুর্গপ্রাসাদ, সাজাহানের কক্ষ। কাল—অপরাহ্ন

সাজাহান শয্যার উপর অর্কশায়িত অবস্থায় কর্ণমূল করতলে শূন্ত করিয়া

অধোমুখে ভাবিতেছিলেন ও মধ্যে মধ্যে একটি আলবোলা

টানিতেছিলেন। সম্মুখে দারা দণ্ডায়মান—

সাজাহান। তাই ত! এ বড়—দুঃসংবাদ দারা।

দারা। সূজা বঙ্গদেশে বিদ্রোহ করেছে বটে কিন্তু সে এখনও সম্রাট নাম নেয় নি। কিন্তু মোরাদ, গুর্জরে সম্রাট নাম নিয়ে বসেছে, আর দাক্ষিণাত্য থেকে ঔরঞ্জীব তার সঙ্গে যোগ দিয়েছে।

সাজাহান। ঔরঞ্জীব তার সঙ্গে যোগ দিয়েছে—দেখি, ভেবে দেখি—এ রকম কখনও ভাবি নি, অভ্যস্ত নই; তাই ঠিক ধারণা কর্তে পারছি না—তাই ত! (ধূমপান)

দারা। আমি কিছু বুঝতে পারছি না।

সাজাহান। আমিও পারছি না। (ধূমপান)

দারা। আমি এলাহাবাদে আমার পুত্র সোলেমানকে সূজার বিরুদ্ধে যাত্রা করবার জন্য লিখছি, আর তার সঙ্গে বিকানীরের মহারাজ জয়সিংহ আর সৈন্যধ্যক্ষ দিলীর খাঁকে পাঠাচ্ছি।

সাজাহান আনতচক্ষে ধূমপান করিতে লাগিলেন

দারা। আর মোরাদের বিরুদ্ধে আমি মহারাজ যশোবন্ত সিংহকে পাঠাচ্ছি।

সাজাহান। পাঠাচ্ছ! তাই ত! (ধূমপান)

দারা। পিতা, আপনি চিন্তিত হবেন না। এ বিদ্রোহ দমন কর্তে আমি জানি।

সাজাহান। না, আমি তার জন্ত ভাবছি না দারা; তবে এই—
ভাইয়ে ভাইয়ে যুদ্ধ—তাই ভাবছি। (ধূমপান; পরে সহসা) না—
দারা, কাজ নেই। আমি তাদের বুঝিয়ে বলবো। কাজ নেই। তাদের
নির্বিরোধে রাজধানীতে আসতে দাও।

বেগে জাহানারার প্রবেশ

জাহানারা। কখন না। এ হ'তে পারে না পিতা। প্রজা বাজাব
উপর খড়্গা তুলেছে, সে খড়্গা তাব নিজের স্বন্ধে পড়ুক।

সাজাহান। সে কি জাহানারা! তা'রা আমার পুত্র।

জাহানারা। হোক পুত্র। কি যায আসে। পুত্র কি কেবল পিতার
স্নেহের অধিকারী? পুত্রকে পিতার শাসনও কর্তে হবে।

সাজাহান। আমার হৃদয় এক শাসন জানে। সে শুধু স্নেহের
শাসন। বেচারী মাতৃহারা পুত্রকন্যারা আমার! তাদের শাসন
করবো কোন্ প্রাণে জাহানারা! ঐ চেয়ে দেখ—ঐ দৃষ্টিকে গঠিত
দীর্ঘনিশ্বাস—ঐ তাজমহলের দিকে চেয়ে দেখ—তার পর বলিস্ তাদের
শাসন কর্তে।

জাহানারা। পিতা, এই কি আপনার উপযুক্ত কথা! এই
দৌর্বল্য কি ভারতসম্রাট সাজাহানকে সাজে! সাম্রাজ্য কি অন্তঃপুর!
একটা ছেলেখেলা! একটা প্রকাণ্ড শাসনের ভার আপনার উপর।

প্রজা বিদ্রোহী হ'লে সম্রাট কি তাকে পুত্র বলে ক্ষমা করবেন ? স্নেহ কি কর্তব্যকে ছাপিয়ে উঠবে ?

সাজাহান । তর্ক করিস্ না জাহানারা । আমার কোন যুক্তি নাই ! আমার কেবল এক যুক্তি আছে । সে স্নেহ । আমি শুধু ভাবছি দারা, যে, এ যুদ্ধে যে পক্ষেরই পরাজয় হয়, আমার সমান ক্ষতি । এ যুদ্ধে তুমি পরাজিত হ'লে আমায় তোমার স্নান-মুখখানি দেখতে হবে ; আবার তা'রা পরাজিত হ'য়ে ফিরে গেলে তাদের স্নান-মুখ ^{প্রাপ্য} কল্পনা কর্তে হবে । কাজ নেই দারা । তা'বা রাজধানীতে আসুক ; আমি তাদের বুঝিয়ে বলবো ।

দারা । পিতা, তবে তাই হোক ।

জাহানারা । দারা, তুমি কি এই রকম করে' তোমার বৃদ্ধ পিতার প্রতিনিধির কাজ করবে ! পিতা যদি স্বয়ং শাসনক্ষম হতেন, তা হ'লে তোমার হাতে তিনি রাজ্যের রশ্মি ছেড়ে দিতেন না । এই উদ্ধত সূত্রা, স্বকল্পিত সম্রাট মোরাদ, আর তার সহকারী ঔরংজীব, বিদ্রোহের নিশান উড়িয়ে ডঙ্কা বাজিয়ে আগ্রায় প্রবেশ করবে, আর তুমি পিতার প্রতিনিধি হ'য়ে তাই সহস্রমুখে দাঁড়িয়ে দেখবে ?—উত্তম !

দারা । সত্য পিতা, এ কি হ'তে পারে ? আমায় আজ্ঞা দিন পিতা ।

সাজাহান । ঈশ্বর ! পিতাদের এই বুকভরা স্নেহ দিয়েছিলে কেন ? কেন তাদের হৃদয়কে লৌহ দিয়ে গড় নি !—ওঃ !

দারা । ভাববেন না পিতা, যে, আমি এ সিংহাসনের প্রত্যাশী । তার জন্ত যুদ্ধ নয় ! আমি এ সাম্রাজ্য চাই না । আমি দর্শনে উপনিষদে এর চেয়ে বড় সাম্রাজ্য পেয়েছি । আমি যাচ্ছি আপনার সিংহাসন রক্ষা কর্তে ।

জাহানারা । তুমি যাচ্ছ স্তায়ের সিংহাসন রক্ষা কর্তে দ্রুতকে শাসন

কর্তে, এই দেশের কোটী কোটী নিরীহ প্রজাদের অরাজক অত্যাচারের গ্রাস থেকে বাঁচাতে ! যদি রাজ্যে এই দুশ্চরিত্র শৃঙ্খলিত না হয়, তবে এ মোগল সাম্রাজ্যের পরমাণু আর কয় দিন ?

দারা । পিতা, আমি প্রতিজ্ঞা করছি, ভাইদের কাউকে পীড়ন বা বধ করব না, তাদের বেঁধে পিতার পদতলে এনে দেবো । পিতা তখন তাদের ইচ্ছা হয়, ক্ষমা করবেন ! তা'রা জানুক, সম্রাট সাজাহান মেহশীল—কিন্তু দুর্বল নয় ।

সাজাহান । (উঠিয়া) তবে তাই হোক ! তারা জানুক যে সাজাহান শুধু পিতা নয়—সাজাহান সম্রাট । যাও দারা ! নাও এই পাঞ্জা । আমি আমার সমস্ত ক্ষমতা তোমায় দিলাম । বিদ্রোহীর শাস্তি বিধান কর । (পাঞ্জা প্রদান)

দারা । যে আজ্ঞা পিতা !

সাজাহান । কিন্তু এ শাস্তি তাদের একা নয় । এ শাস্তি আমারও । পিতা যখন পুত্রকে শাসন করে—পুত্র ভাবে যে, পিতা কি নিষ্ঠুর ! সে জানে না যে পিতার উত্তর বেত্রের অর্ধেকখানি পড়ে সেই পিতারই পৃষ্ঠে !

প্রস্থান

সাজাহানার । তাদের এই হঠাৎ বিদ্রোহের কারণ কিছু অনুমান করছো দাদা ?

দারা । তা'রা বলে যে পিতা রুগ্ন এ কথা মিথ্যা ; পিতা মৃত, আর আমি নিজের আজ্ঞাই তাঁর নামে চালাচ্ছি ।

সাজাহানার । তা'তে অপরাধ কি হয়েছে ? তুমি সম্রাটের জ্যেষ্ঠ পুত্র—ভাবী সম্রাট ।

দারা । তা'রা আমাকে সম্রাট বলে' মানতে চায় না ।

সিপারের সহিত নাদিরার প্রবেশ

সিপার। তা'রা তোমার হুকুম মানতে চায় না বাবা ?

জাহানারা। দেখ ত আম্পর্ক! (হাস্য)

দারা। কি নাদিরা, তুমি অধোমুখে যে ? তুমি যেন কিছু বলবে !

নাদিরা। শুনবে প্রভু ? আমার একটা অনুরোধ রাখবে ?

দারা। তোমার কোন অনুরোধ কবে না রেখেছি নাদিরা !

নাদিরা। তা জানি। তাই বলতে সাহস করছি। আমি বলি—
তুমি এ যুদ্ধ থেকে বিরত হও।

জাহানারা। সে কি নাদিরা !

নাদিরা। দিদি—

দারা। কি ! বলতে বলতে চুপ করলে যে ! কেন তুমি এ অনুরোধ
করছ নাদিরা !

নাদিরা। কাল রাতে আমি একটা দুঃস্বপ্ন দেখেছি।

দারা। কি দুঃস্বপ্ন ?

নাদিরা। আমি এখন তা বলতে পারি না। সে বড় ভয়ানক,
না নাথ ! এ যুদ্ধে কাজ নেই—

দারা। সে কি নাদিরা !

জাহানারা। নাদিরা, তুমি পরভেজের কথা না ? একটা যুদ্ধের
ভয়ে এই অশ্রু, এই শঙ্কাকুল দৃষ্টি, এই ভয়বিহ্বল উক্তি তোমার শোভা
পায় না।

নাদিরা। দিদি, যদি জাস্তে যে সে কি দুঃস্বপ্ন ! সে বড় ভয়ানক,
বড় ভয়ানক !

জাহানারা। দারা, এ কি ! তুমি ভাবছো ! এত তরল তুমি !
এত জ্ঞেণ ! পিতার সন্মতি পেয়ে এখন স্ত্রীর সন্মতি নিতে হবে

না কি ! মনে রেখো দারা, কঠোর কর্তব্য সম্মুখে ! আর ভাব্‌বার সময় নাই ।

দারা । সত্য নাদিরা ! এ যুদ্ধ অনিবার্য, আমি যাই । যথাযথ আজ্ঞা দেই গে যাই ।

প্রস্থান

নাদিরা । এত নিষ্ঠুর তুমি দিদি—এসো সিপার ।

সিপারের সহিত নাদিরার প্রস্থান

জাহানারা । এত ভয়াকুল ! কি কারণ বুঝি না ।

সাজাহানেরা পুনঃ প্রবেশ

সাজাহান । দারা গিয়েছে জাহানারা ?

জাহানারা । হাঁ বাবা !

সাজাহান । (ক্ষণিক নিস্তব্ধ থাকিয়া) জাহানারা—

জাহানারা । বাবা !

সাজাহান । তুইও এর মধ্যে ?

জাহানারা । কিসের মধ্যে ?

সাজাহান । এই ভ্রাতৃদ্বন্দ্বের ?

জাহানারা । না বাবা—

সাজাহান । শোনু জাহানারা । এ বড় নির্মম কাজ ! কি কর্ব—
আজ তার প্রয়োজন হয়েছে । উপায় নাই । কিন্তু তুইও এর মধ্যে
যাস নে । তোর কাজ—স্নেহ—ভক্তি—অনুকম্পা । এ আবর্জনার তুইও
নামিস্‌ নে । তুই অস্তুতঃ পবিত্র থাক ।

দ্বিতীয় দৃশ্য

স্থান—নর্মদাতীরে মোরাদের শিবির। কাল—রাত্রি

দিলদার একাকী

দিলদার। আমি মুখে মোরাদের বিদূষক! আমি হাস্য পরিহাস কর্তে যাই, সে ব্যঙ্গের ধুম হ'য়ে ওঠে! মূর্খ তা বুঝতে পারে না। আমার উক্তি অসংলগ্ন মনে করে' হাশে।—মোরাদ একদিকে যুদ্ধোন্মাদ, আর একদিকে সন্তোষ-মজ্জিত। মনোরাজ্য ওর কাছে একটা অনাবিষ্কৃত দেশ—এই যে বর্ষের এখানে আসছে।

মোরাদের প্রবেশ

মোরাদ। দিলদার! আমাদের যুদ্ধে জয় হয়েছে। আনন্দ কর, স্তুতি কর। অচিরে পিতাকে সিংহাসন থেকে নামিয়ে আমি সেখানে বসছি!—কি ভাবছো দিলদার? ঘাড় নাড়ছো যে!

দিলদার। জাঁহাপনা, আমি আজ একটা তথ্য আবিষ্কার করেছি।

মোরাদ। কি? শুনি।

দিলদার। আমি শুনেছি যে, হিংস্র জন্তুদের মধ্যে একটা দস্তুর আছে যে, পিতা সন্তান খায়। আছে কি না?

মোরাদ। হাঁ আছে। তাই কি?

দিলদার। কিন্তু সন্তান পিতা খায়, এ প্রথাটা তাদের মধ্যে নেই বোধ হয়।

মোরাদ। না।

দিলদার। হঁ। সে প্রথাটা ঈশ্বর কেবল মানুষের মধ্যেই দিয়েছেন। ছ'রকমই চাই ত! খুব বুদ্ধি!

মোরাদ । খুব বুদ্ধি ! হাঃ হাঃ হাঃ ! বড় মজার কথা বলেছো দিলদার ।

দিলদার । কিন্তু মানুষের যে বুদ্ধি, তার কাছে ঈশ্বরের বুদ্ধি কিছুই নয় । মানুষ ঈশ্বরের উপর চাল চেলেছে ।

মোরাদ । কি রকম ?

দিলদার । এই দেখুন জাঁহাপনা, দয়াময় মানুষকে দাঁত দিয়েছিলেন কি জন্তু ? চর্কণ করবার জন্তু নিশ্চয়, বাহির করবার জন্তু নয় । কিন্তু মানুষ সে দাঁত দিয়ে চর্কণ ত করেই, তার উপরে সেই দাঁত দিয়েই হাসে । ঈশ্বরের উপর চাল চেলেছে বলতে হবে ।

মোরাদ । তা বলতে হবে বৈ কি—

দিলদার । শুধু হাসে না, হাসবার জন্তু অনেকে যেন বিশেষ চিন্তিত বলে' বোধ হয়, এমন কি—তার জন্তু পয়সা খরচ করে ।

মোরাদ । হাঃ হাঃ হাঃ !

দিলদার । ঈশ্বর মানুষের জিভ দিয়েছিলেন—বেশ দেখা যাচ্ছে চাখ্‌বার জন্তু । কিন্তু মানুষ তার দ্বারা ভাষার সৃষ্টি ক'রে ফেলে । ঈশ্বর নাক দিয়েছিলেন কেন ? নিশ্বাস ফেলবার জন্তু ত ?

মোরাদ । হাঁ, আর শুঁকবার জন্তুও বোধ হয় ।

দিলদার । কিন্তু মানুষ তার উপর—বাহাদুরী করেছে ! সে আবার সেই নাকের উপর চশমা পরে । দয়াময়ের নিশ্চয়ই সে উদ্দেশ্য ছিল না ।—আবার অনেকের নাক ঘুমের ঘোরে বেশ একটু ডাকেও ।

মোরাদ । তা ডাকে । আমার কিন্তু ডাকে না ।

দিলদার । আজ্ঞে, জাঁহাপনার শুধু যে ডাকে তা নয়, সে দিনে ছুপুরে ডাকে ।

মোরাদ । আচ্ছা এবার যখন ডাকবে তখন দেখিয়ে দিও ।

দিলদার। ঐ একটা জিনিষ জাঁহাপনা, বা নিরাকার ঈশ্বরের মত—ঠিক দেখানো যায় না। কারণ, দেখিয়ে দেবার অবস্থা যখন হয়, তখন সে আর ডাকে না।

মোরাদ। আচ্ছা দিলদার, ঈশ্বর মানুষকে যে কান দিয়েছেন, তার উপর মানুষ কি বাহাদুরী কর্তে পেরেছে ?

দিলদার। ও বাবা ! তাই দিয়ে একটা দার্শনিক তথ্যই আবিষ্কার করে' ফেলে যে, কান টানলে মাথা আসে—অবশ্য তার পেছনে যদি একটা মাথা থাকে ; অনেকের তা নেই কি না !

মোরাদ। নেই নাকি ! হাঃ হাঃ—ঐ দাদা আসছেন। তুমি এখন যাও।
দিলদার। যে আজে।

দিলদারের প্রস্থান। অপর দিক্ দিয়া ঔরঞ্জীবের প্রবেশ

মোরাদ। এসো দাদা, তোমায় আঙ্গিলন করি। তোমার বুদ্ধিবলেই আমাদের এই যুদ্ধ জয় হয়েছে। (আলিঙ্গন)

ঔরঞ্জীব। আমার বুদ্ধিবলে, না তোমার শৌর্য্যবলে ? কি অদ্ভুত শৌর্য্য তোমার ! মৃত্যুকে একেবারে ভয় কর না।

মোরাদ। আসফ খাঁ একটা কথা বলতেন মনে আছে যে, যা'রা মৃত্যুকে ভয় করে, তা'রা জীবন ধারণ করবার যোগ্য নয়। সে যা হোক, তুমি যশোবন্ত সিংহের ৪০,০০০ মোগল সৈন্য কি মন্ত্রবলে বশ করলে ! তারা শেষে যশোবন্ত সিংহেরই রাজপুত্র সৈন্তের বিপক্ষে বন্দুক লক্ষ্য করে' ফিরে দাঁড়াল ! যেন একটা ভৌতিক ব্যাপার !

ঔরঞ্জীব। যুদ্ধের পূর্বদিন আমি জনকতক সৈন্যকে মোল্লা সাজিয়ে এ পারে পাঠিয়েছিলাম। তা'রা মোগলদের বুঝিয়ে গেল যে, কাফেরের অধীন, কাফেরের সঙ্গে, দাওয়ার পক্ষে যুদ্ধ করা বড় হয় কাজ ; আর সেটা কোরাণে নিষিদ্ধ। তা'রা তাই ঠিক বিশ্বাস করেছে।

মোরাদ । আশ্চর্য্য তোমার কৌশল !

ঔরঞ্জীব । কার্য্যসিদ্ধির জন্ত শুদ্ধ একটা উপায়ের উপর নির্ভর করা উচিত নয় । যত রকম উপায় আছে ভাবতে হবে ।

মহম্মদের প্রবেশ

ঔরঞ্জীব । কি সংবাদ মহম্মদ ?

মহম্মদ । পিতা ! মহারাজ যশোবন্ত সিংহ তাঁর শকটে চড়ে' সসৈন্তে আমাদের সৈন্তশিবির প্রদক্ষিণ কর্ছেন । আমরা আক্রমণ করব ?

ঔরঞ্জীব । না ।

মহম্মদ । এর উদ্দেশ্য কি ?

ঔরঞ্জীব । রাজপুত্র দর্প ! এই দর্প-ই মহারাজের পরাজয় । আমি সসৈন্তে নর্ম্মদাতীরে উপস্থিত হওয়া মাত্রই যদি তিনি আমায় আক্রমণ কর্ভেন ত আমার পরাজয় অনিবার্য্য ছিল । কারণ তুমি তখন এসে উপস্থিত হও নি, আর আমার সৈন্তরাও পথশ্রান্ত ছিল । কিন্তু গুন্লাম, এরূপ আক্রমণ করা বীরোচিত নয় বলে' মহারাজ তোমার আগমনের অপেক্ষা কর্চ্ছিলেন । অতি দর্পে পতন হবেই ।

মহম্মদ । আমরা তবে তাঁকে আক্রমণ করব না ?

ঔরঞ্জীব । না মহম্মদ ! আমার সৈন্তশিবির প্রদক্ষিণ করে' যদি মহারাজের কিছু সাঙ্ঘনা হয় ত একবার কেন, তিনি দশবার প্রদক্ষিণ করুন না । যাও ।

মহম্মদের প্রস্থান

ঔরঞ্জীব । পুত্র যুদ্ধ পেলে হয় ।—সরল, উদার, নির্ভীক পুত্র । আমি তবে এখন যাই । তুমি বিশ্রাম কর ।

মোরাদ । আচ্ছা ; দৌবারিক । সিরাজি আর বাইজি ।

প্রস্থান

তৃতীয় দৃশ্য

স্থান—কাশীতে সৃজার সৈন্য শিবির । কাল—রাত্রি

সৃজা ও পিয়ারা

সৃজা । শুনেছো পিয়ারা, দারার পুত্র—বালক সোলেমান এই যুদ্ধে আমার বিপক্ষে এসেছে ।

পিয়ারা । তোমার বড় ভাই দারার পুত্র দিল্লী থেকে এসেছেন ? সত্য নাকি ! তা হ'লে নিশ্চয়ই দিল্লীর লাড্ডু এনেছেন । তুমি শীঘ্র সেখানে লোক পাঠাও ; হাঁ করে' চেয়ে রয়েছে কি ! লোক পাঠাও ।

সৃজা । লাড্ডু কি ! যুদ্ধ—তার সঙ্গে—

পিয়ারা । তার সঙ্গে যদি বেগের মোরঝা থাকে ত আরও ভাল । তাতেও আমার অকুচি নাই ! কিন্তু দিল্লীর লাড্ডু—শুস্তে পাই, যো খায় উয়োবি পস্তায়া—আর যো নেই খায় উয়োবি পস্তায়া । ছ'রকমেই যখন পস্তাতে হচ্ছে, তখন না খেয়ে পস্তানোর চেয়ে খেয়ে পস্তানোই ভালো—লোক পাঠাও ।

সৃজা । তুমি এক নিশ্বাসে এতখানি বলে' গেলে যে, আমি বাকিটুকু বলবার ফুস্ফুস পেলাম না ।

পিয়ারা । তুমি আবার বলবে কি ! তুমি ত কেবল যুদ্ধ করবে ।

সৃজা । আর যা কিছু বলতে হবে, তা বলবে বুঝি তুমি ?

পিয়ারা। তা বৈ কি। আমরা যেমন গুছিয়ে বলতে পারি, তোমরা তা পারো? তোমরা কিছু বলতে গেলেই এমন বিষয়গুলো জড়িয়ে ফেল, আর এমন ব্যাকরণ ভুল কর যে—

সূজা। যে কি?

পিয়ারা। আর অভিধানের অর্ধেক শব্দই তোমরা জানো না। কথা বলেছ, কি ভুল করে বসে' আছ। বোবা শব্দ অন্ধ ব্যাকরণ মিশিয়ে, এমন এক খোঁড়া ভাষা প্রয়োগ কর, যে তার অন্তত কুঁজো হয়ে চলতে হবেই।

সূজা। তোমার নিজের প্রয়োগগুলি খুব সাধু বলে' বোধ হচ্ছে না!

পিয়ারা। ঐ ত! আমাদের ভাষা বুঝবার ক্ষমতাটুকুও তোমাদের নাই! হা ঈশ্বর! এমন একটা বুদ্ধিমান স্ত্রীজাতিকে এমন নির্বোধ পুরুষজাতির হাতে সঁপে দিয়েছো, যে তার চেয়ে তাদের যদি গরম তেলের কড়ায় চড়িয়ে দিতে, তা'হলে বোধ হয় তারা সুখে থাকতো।

সূজা। যাক—তুমি বলে' যাও।

পিয়ারা। সিংহের বল দাঁতে, হাতীর বল শাঁড়ে, মহিষের বল শিঙে, বোড়ার বল পিছনকার পায়ে, বাঙ্গালীর বল পিঠে আর নারীর বল জিভে।

সূজা। না, নারীর বল অপাঙ্গে।

পিয়ারা। উছঃ—অপাঙ্গ প্রথম প্রথম কিছু কাজ করে' থাকতে পারে বটে, কিন্তু পরে সমস্ত জীবনটা স্বামীকে শাসিয়ে রাখে ঐ জিভে।

সূজা। না, তুমি আমাকে কথা কইবার অবকাশ দেবে না দেখতে পাচ্ছি। শোন কি বলতে যাচ্ছিলাম—

পিয়ারা। ঐ ত তোমাদের দোষ। এতখানি ভূমিকা কর, যে সেই অবকাশে তোমাদের বক্তব্যটা ভুলে ব'সে থাকে।

সুজা। তুমি আর খানিক যদি ঐ রকম বকে' যাও ত আমার বক্তব্যটা আমি সত্যই ভুলে যাবো।

পিয়ারা। তবে চট করে' বল। আর দেরী কোরো না।

সুজা। তবে শোন—

পিয়ারা। বল। কিন্তু সংক্ষেপে! মনে থাকে যেন—এক নিশ্বাসে।

সুজা। এখন আমার বিরুদ্ধে এসেছে দারার পুত্র সোলেমান। আর তার সঙ্গে বিকানীরের মহারাজ জয়সিংহ আর সৈন্যধ্যক্ষ দিলীর খাঁ।

পিয়ারা। বেশ, একদিন নিমন্ত্রণ করে' খাইয়ে দাও।

সুজা। না। তুমি ছেলেমানুষীই করবে! এমন একটা গাঢ় ব্যাপার বুদ্ধ, তা তোমার কাছে—

পিয়ারা। তার জন্তই ত তাকে একটু—হ্যাঁ—তরল করে' নিচ্ছি। নৈলে হজম হবে কেন! বলে' যাও।

সুজা। এখনই মহারাজ জয়সিংহ আমার কাছে এসেছিলেন। তিনি বলেন যে, সম্রাট সাজাহান মরেন নি। এমন কি তিনি সম্রাটের দস্তখতি পত্র আমায় দিলেন। সে পত্রে কি আছে জানো?

পিয়ারা। শীঘ্র বলে' ফেল আর আমার ধৈর্য্য থাকছে না।

সুজা। সে পত্রে তিনি লিখেছেন যে আমি যদি এখনও বঙ্গদেশে ফিরে যাই, তা হ'লে তিনি আমায় এই সুবা থেকে চ্যুত করবেন না। নৈলে—

পিয়ারা। নৈলে চ্যুত করবেন। এই ত! যাক! তার পরে আর কিছু ত বলবার নেই? আমি এখন গান গাই?

সুজা। আমি কি লিখে দিলাম জানো? আমি লিখে দিলাম—
“বেশ, আমি বিনা ষুদ্ধে বঙ্গদেশে ফিরে যাচ্ছি। পিতার প্রভুত্ব আমি মাথা পেতে নিতে সম্মত আছি। কিন্তু দারার প্রভুত্ব আমি কোন মতেই মানবো না।

পিয়ারা। তুমি আমায় গাইতে দেবে না। নিজেই বকে' যাচ্ছ, আমি গাইব না!

সুজা। না, গাও! আমি চুপ করলাম।

পিয়ারা। দেখ, প্রতিজ্ঞা মনে রেখো। কি গাইব?

সুজা। যা ইচ্ছা।—না। একটা প্রেমের গান গাও—এমন একটা গান গাও, যার ভাষায় প্রেম, ভাবে প্রেম, ভঙ্গিমায় প্রেম, মুর্ছনায় প্রেম, সম্বন্ধে প্রেম।—গাও আমি শুনি।

পিয়ারা গীত আরম্ভ করিলেন

সুজা। দূরে একটা শব্দ শুনছো না পিয়ারা—যেন বারিদবর্ষণের শব্দ।—ঐ যে!

পিয়ারা। না, তুমি গাইতে দেবে না। আমি চললাম।

সুজা। না, ও কিছু নয় গাও।

পিয়ারার গীত

এ জীবনে পুরিল না সাধ ভালোবাসি'।

কুদ্র এ হৃদয় হায় ধরে না ধরে না ভায়—

আকুল অসীম প্রেমরাশি।

তোমার হৃদয়খানি আমার হৃদয়ে আনি'

রাখি না কেনই যত কাছে ;

যুগল হৃদয় মাঝে কি যেন বিরহ বাজে,

কি যেন অভাবই রহিয়াছে।

এ কুদ্র জীবন মোর, এ কুদ্র ভবন মোর,

হেথা কি দিব এ ভালোবাসা।

যত ভালোবাসি তাই আরও বাসিতে চাই—

দিয়ে প্রেম মিটোনাক আশা।

হটক অসীম স্থান

হটক অমর প্রাণ

যুচে যাক সব অবরোধ ;

তখন মিটাব আশা

দিব ঢালি ভালোবাসা

জন্ম ঋণ করি পরিশোধ ।

সূজা । এ জীবন একটা সুষুপ্তি । মাঝে মাঝে স্বপ্নের মত স্বর্গ থেকে একটা ভঙ্গিমা, একটা সঙ্কেত নেমে আসে, যাতে বুঝিয়ে দেয়, এ সুষুপ্তির জাগরণ কি মধুর—সঙ্গীত সেই স্বর্গের একটা বন্ধার । নৈলে এত মধুব হয় !

নেপথ্যে কামানের শব্দ

সূজা । (চমকিয়া উঠিয়া) ও কি !

পিয়ারা । তাই ত ! প্রিয়তম ! এত রাত্রে কামানের শব্দ—এত কাছে ! শত্রু ত ওপারে !

সূজা । এ কি ! ঐ আবার ! আমি দেখে আসি ।

পিয়ারা । তাই ত ! ~~বারবার~~ বারবার ঐ কামানের ধ্বনি । ঐ সৈন্যদলের নিনাদ, অস্ত্রের বনাৎকার—(রাত্রির এই গভীর শান্তি হঠাৎ যেন শেলবিদ্ধ হ'য়ে একটা মহা কোলাহলে আর্তনাদ করে' উঠলো ।)—এ সব কি !

বেগে সূজার প্রবেশ

সূজা । পিয়ারা ! সম্রাট সৈন্য শিবির আক্রমণ করেছে ।

পিয়ারা । আক্রমণ করেছে ! সে কি !

সূজা । হাঁ ! বিশ্বাসঘাতক এই মহারাজ !—আমি যুদ্ধে যাচ্ছি । তুমি শিবিরে যাও । কোন ভয় নাই পিয়ারা—

প্রস্থান

পিয়ারা । [কোলাহল ক্রমে বাড়তে চলল । উঃ, এ কি—]

প্রস্থান

R

নেপথ্যে কোলাহল

সোলেমান ও দিলীর খাঁর বিপরীত দিক হইতে প্রবেশ

সোলেমান । সুবাদার কৈ !

দিলীর । তিনি নদীর দিকে পালিয়েছেন ।

সোলেমান । পালিয়েছেন ? তাঁর পশ্চাৎদাবন কর দিলীর খাঁ !

দিলীর খাঁর প্রস্থান ও জয়সিংহের প্রবেশ

সোলেমান । মহারাজ ! আমরা জয়লাভ করেছি ।

জয়সিংহ । আপনি রাতেই নদী পার হ'য়ে শত্রুশিবির আক্রমণ করেছেন ?

সোলেমান । কর্ব যে, তা'রা কি তা ভাবেনি—তবু এত শীঘ্র জয় লাভ কর্ব কখন মনে করিনি ।

জয়সিংহ । সুলতান সূজার সৈন্য একেবারে মোটেই প্রস্তুত ছিল না । যখন অর্ধেক সৈন্য নিহত হয়েছে, তখনও তাদের সম্পূর্ণ ঘুম ভাঙে নি ।

সোলেমান । তার কারণ, কাকা প্রকৃত যোদ্ধা । তিনি নৈশ আক্রমণের সম্ভাবনা জ্ঞানেন না ।

জয়সিংহ । আমি সন্ধ্যার পক্ষ হ'তে তাঁর সঙ্গে সন্ধি করেছিলাম । তিনি বিনাযুদ্ধে বঙ্গদেশে ফিরে যেতে সম্মত হয়েছিলেন ; এমন কি যাবার জন্য নৌকা প্রস্তুত কর্তে আজ্ঞা দিয়েছিলেন ।

দিলীর খাঁর প্রবেশ

দিলীর । সাহাজাদা ! সুলতান সূজা সপরিবারে নৌকাযোগে পালিয়েছেন ।

জয়সিংহ । ঐ—তবে সেই সজ্জিত নৌকায় ।

সোলেমান । পশ্চাৎদাবন কর—যাও সৈন্যদের আজ্ঞা দাও ।

দিলীর খাঁর প্রস্থান

সোলেমান । আপনি কার আজ্ঞায় এ সন্ধি করেছিলেন মহারাজ ?

জয়সিংহ । সম্রাটের আজ্ঞায় ।

সোলেমান । পিতা ত আমাকে এ কথা কিছু লেখেন নি । তা আপনিও আমায় বলেন নি ।

জয়সিংহ । সম্রাটের নিষেধ ছিল ।

সোলেমান । তার উপরে মিথ্যা কথা !—যান ।

জয়সিংহের প্রস্থান

সোলেমান । সম্রাটের এক আজ্ঞা আর আমার পিতার অন্তরূপ আজ্ঞা ! এ কি সম্ভব ।—যদি তাই হয় ! মহারাজকে হয় ত অগ্নায় ভৎসনা করেছি । যদি সম্রাটের একপাই আজ্ঞা হয় ।—এ দিকে পিতা লিখেছেন যে, “স্বজাকে সপরিবারে বন্দী করে’ নিয়ে আসবে পুত্র ।” না, আমি পিতার আজ্ঞা পালন কর্ব্ব ! তাঁর আজ্ঞা আমার কাছে ঈশ্বরের আজ্ঞা ।

চতুর্থ দৃশ্য

স্থান—যোধপুরের দুর্গ । কাল—প্রভাত

মহামায়া ও চারনীগণ

মহামায়া । গাও আবার চারনীগণ !

সেথা গিয়াছেন তিনি সমরে, আনিতে জয়গৌরব জিনি

সেথা গিয়াছেন তিনি মহা আহ্বানে—

মায়ের চরণে প্রাণ বলিদানে ;

মধিতে অমর মরণসিন্ধু আজি গিয়াছেন তিনি ।

সধবা অথবা বিধবা তোমার রহিবে উচ্চ শির ;

উঠ বীরজায়া, বাঁধো কুন্তল, মুছ এ অশ্রুস্রীর ।

সেথা গিয়াছেন তিনি করিতে রক্ষা শত্রুর নিমন্ত্রণে ।

সেথা বর্ষে বর্ষে কোলাকুলি হয় ;

থড়গ থড়গ ভীম পরিচয়,

ক্রকটীর সহ গর্জন মিশে রক্ত রক্ত সনে

সধবা অথবা—ইত্যাদি !

সেথা নাহি অকুনয় নাহি পলায়ন—সে ভীম সমর মাঝে ;

সেথা রুধিররক্ত অসিত অঙ্গে,

মৃত্যু মৃত্যু করিছে রঙ্গে,

গভীর আর্তনাদের সঙ্গে বিজয় বাজ বাজে ।

সধবা অথবা—ইত্যাদি !

সেথা গিয়াছেন তিনি সে মহা আহবে জুড়াইতে সব জালা ;

হেথা, হয় ত কিরিতে জিনিয়া সমর ;

হয় ত মরিয়া হইতে অমর ;

সে মহিমা ক্রোড়ে ধরিয়া হাসিয়া তুমিও মরিবে বালা ।

সধবা অথবা—ইত্যাদি !

দুর্গপ্রহরীর প্রবেশ

প্রহরী । মহারানী !

মহামায়া । কি সংবাদ সৈনিক !

প্রহরী । মহারাজ ফিরে এসেছেন ।

মহামায়া । এসেছেন ? যুদ্ধে জয়লাভ করে' এসেছেন ?

প্রহরী । না মহারানী ! তিনি এ যুদ্ধে পরাজিত হ'য়ে ফিরে এসেছেন ।

মহামায়া । পরাজিত হ'য়ে ফিরে এসেছেন ! কি বলছ তুমি সৈনিক ! কে পরাজিত হ'য়ে ফিরে এসেছেন ?

প্রহরী । মহারাজ ।

মহামায়া । কি ! মহারাজ যশোবন্ত সিংহ পরাজিত হ'য়ে ফিরে এসেছেন ? এ কি শুনছি ঠিক ! যোধপুরের মহারাজ—আমার স্বামী—যুদ্ধে পরাজিত হ'য়ে ফিরে এসেছেন ! ক্ষত্রিয় শৌর্যের কি এতদূর অধোগতি হয়েছে ! অসম্ভব ! ক্ষত্রবীর যুদ্ধে পরাজিত হ'য়ে ফেরে না । মহারাজ যশোবন্ত সিংহ ক্ষত্রচূড়ামণি । যুদ্ধে পরাজয় হয়েছে ; হ'তে পারে । তা হ'য়ে থাকে ত আমার স্বামী যুদ্ধক্ষেত্রে মরে' পড়ে' আছেন । মহারাজ যশোবন্ত সিংহ যুদ্ধে পরাজিত হ'য়ে কখন ফিরে আসেন নি । যে এসেছে সে মহারাজ যশোবন্ত সিংহ নয় । সে তাঁর আকারধারী কোন ছদ্মবেশী । তাকে প্রবেশ কর্তে দিও না ! দুর্গদ্বার রুদ্ধ কর ! —গাও চারনীগণ আবার গাও ।

চারনীগণের গীত

সেথা গিয়াছেন তিনি সে মহা আহবে জুড়াইতে সব আলা, ইত্যাদি ।

পঞ্চম দৃশ্য

স্থান— পবিত্র প্রান্তর । কাল—বাড়ি

ঔরঞ্জীব একাকী

ঔরঞ্জীব । আকাশ মেঘাচ্ছন্ন । ঝড় উঠবে । একটা নদী পাব
হয়েছি, এ আর এক নদী—ভীষণ কল্লোলিত তরঙ্গসঙ্কুল । এত
প্রশস্ত যে তাব ও-পার দেখতে পাচ্ছি না । তবু পাব হ'তে হবে—এই
নৌকা নিয়েই ।

মোরাদের প্রবেশ

ঔরঞ্জীব । কি মোরাদ ! কি সংবাদ !

মোরাদ । দারাব সঙ্গে এক লক্ষ ঘোড়সোযাব আব এক শত কামান !

ঔরঞ্জীব । তবে সংবাদ ঠিক !

মোরাদ । ঠিক , প্রত্যেক চরের ঐ একইকপ অনুমান ।

ঔরঞ্জীব । (পদচারণ কবিত্তে কবিত্তে) এযে—না—তাই ত !

মোরাদ । দাবা ঐ পাহাড়েব পবপাবে সেনানিবেশ করেছেন !

ঔরঞ্জীব । ঐ পাহাড় ?

মোরাদ । হাঁ দাদা !

ঔরঞ্জীব । তাই ত ! এক লক্ষ অশ্বারোহী—আর—

মোরাদ । আমরা কাল প্রভাতেই—

ঔরঞ্জীব । চূপ ! কথা কোযো না ! আমাকে ভাবতে দাও ।
এত সৈন্য দাবা পেলেন কোথা থেকে ! আর এক শত !—আচ্ছা তুমি
এখন যাও মোরাদ । আমায় ভাবতে দাও ।

মোরাদের প্রস্থান

ঔরঞ্জীব । তাই ত । এখন পিছোলে সর্কনাশ, আক্রমণ কল্পে
ধ্বংস । এক শত কামান । যদি—না—তাই বা হবে কেমন করে' । হ'

(দীর্ঘনিশ্বাস)—ঔরঞ্জীব ! এবার তোমার উত্থান না পতন ! পতন ?
অসম্ভব । উত্থান ? কিন্তু কি উপায়ে ? [কিছু বুঝতে পাচ্ছি না]

মোরাদের প্রবেশ

ঔরঞ্জীব । তুমি আবার কেন !

মোরাদ । দাদা, বিপক্ষ পক্ষ থেকে শায়েষ্টা খাঁ তোমার সঙ্গে দেখা
কর্তে এসেছেন ।

ঔরঞ্জীব । এসেছেন ? উত্তম, সসম্মানে নিয়ে এসো । না—আমি
স্বয়ং যাচ্ছি ।

প্রস্থান :

মোরাদ । তাই ত ! শায়েষ্টা খাঁ আমাদের শিবিরে কি জন্তু !
দাদা ভিতরে ভিতরে কি মতলব আঁটছেন বুঝি না । শায়েষ্টা খাঁ কি
দারান প্রতি বিশ্বাসহস্তা হবে ! দেখা যাক ! (পরিক্রমণ)

ঔরঞ্জীবের প্রবেশ

ঔরঞ্জীব । ভাই মোরাদ ! এই মুহূর্তে আগ্রায় যাবার জন্তে
সমস্তু রওনা হ'তে হবে । প্রস্তুত হও ।

মোরাদ । সে কি ! এই রাতে ?

ঔরঞ্জীব । হ্যাঁ, এই রাতে । শিবির যেমন আছে তেমনি থাকুক !
দারার সৈন্য আমরা আক্রমণ করব না । ঐ পাহাড়ের অপর পার দিয়ে
আগ্রায় যাবার একটি রাস্তা আছে । সেখান দিয়ে চ'লে যাবো ! দারা সন্দেহ
করেন না । তাঁর আগে আমাদের আগ্রায় যেতে হবে । প্রস্তুত হও ।

মোরাদ । এই রাতে ?

ঔরঞ্জীব । [তর্কের সময় নাই] সিংহাসন চাও ত বিরক্তি কোরো
না । নৈলে সর্বনাশ—[নিশ্চিত জেনো !]

উত্তরের নিষ্কাশ

ষষ্ঠ দৃশ্য

স্থান—এলাহাবাদে সোলেমানের শিবির । কাল—প্রাত্ন

জয়সিংহ ও দিলীর খাঁ

দিলীর । ঔরঞ্জীব শেষ যুদ্ধেও জয়ী হয়েছেন । শুনেছেন মহারাজ ?

জয়সিংহ । আমি আগেই জাস্তাম ।

দিলীর । শায়েষ্টা খাঁ বিশ্বাসঘাতকতা করে । আগ্রার কাছে তুমুল যুদ্ধ হয় । দারা তাতে পরাস্ত হয়ে দোয়ারের দিকে পালিয়েছেন । সঙ্গে মোটে একশত সঙ্গী আর ত্রিশ লক্ষ মুদ্রা ।

জয়সিংহ । পালাতেই হবে । ~~আমি খায়েই হুজুম~~।

দিলীর । আপনি ত সবই জানেন ।—দারা পালাবার সময় তাড়া-তাড়িতে বেশী অর্থ নিয়ে যেতে পারেন নি । কিন্তু তার পরেই শুনছি—
যুদ্ধ সম্রাট সাতায়নটা অর্থ বোঝাই করে' স্বর্ণমুদ্রা দারার উদ্দেশে পাঠান ।
পথে জাঠরা তাঁও ডাকাতি করে' নিয়েছে ।

জয়সিংহ । আহা বেচারী ! কিন্তু আমি আগেই জাস্তাম ।

দিলীর । ঔরঞ্জীব ও মোরাদ বিজয়গর্বে আগ্রায় প্রবেশ করেছেন ।
এখন ফলতঃ ঔরঞ্জীব সম্রাট ।

জয়সিংহ । এ সব আগেই জাস্তাম ।

দিলীর । ঔরঞ্জীব আমাকে পত্রে লিখেছেন যে, আমি যদি সঠিক সোলেমানকে পরিত্যাগ ক'রে যাই, তা হলে তিনি আমার পুরস্কার দেবেন । আপনাকেও ~~আমি চান তাঁই লিখেছেন মহারাজ~~ ।

জয়সিংহ । হাঁ ।

দিলীর। যুদ্ধের ভবিষ্যৎ ফল সম্বন্ধে আপনার কি ধারণা মহারাজ ?

জয়সিংহ। আমি কাল এক জ্যোতিষীকে দিয়ে এই যুদ্ধের ফলাফল নির্ণয় করিয়েছিলাম। তিনি বলেন ভাগ্যের আকাশে এখন ঔরঞ্জীবের তারা উঠছে, আর দারার তারা নেমে যাচ্ছে !

দিলীর। তবে আমাদের এখন কর্তব্য কি মহারাজ ?

জয়সিংহ। আমি যা করি তাই দেখে যাও।

দিলীর। বেশ—এসব বিষয়ে আমার বুদ্ধিটা ঠিক খেলে না। কিন্তু একটা কথা—

জয়সিংহ। চূপ্! সোলেমান আসছেন।

সোলেমানের প্রবেশ

জয়সিংহ ও দিলীর। বন্দেগি সাহাজাদা।

সোলেমান। মহারাজ ! পিতা পরাজিত, পলায়িত !—এই সম্রাট সাজাহানের পত্র। (পত্র দিলেন)

জয়সিংহ। (পত্রপাঠ পূর্বক) তাই ত কুমার !

সোলেমান। সম্রাট আমাকে পিতার সাহায্যে সর্বসঙ্গে অবিলম্বে যাত্রা কর্তে লিখেছেন ! আমি এক্ষণেই যাবো। তাঁরু ভাস্কুন আর সৈন্যদের আদেশ দিউন যে—

জয়সিংহ। আমার বিবেচনায় কুমার আরও ঠিক খবরের জন্ত অপেক্ষা করা উচিত। কি বল খাঁ সাহেব ?

দিলীর। আমারও সেই মত।

সোলেমান। এর চেয়ে ঠিক খবর আর কি হ'তে পারে ! অল্প সম্রাটের হস্তাকর।

জয়সিংহ। আমার বোধ হয় ও জাল। বিশেষ সম্রাট অধর্ম !

তঁার আজ্ঞা আজ্ঞাই নয়। আপনার পিতার আজ্ঞা ব্যতীত এখান থেকে এক পাও নড়তে পারি না। কি বল দিলীর খাঁ ?

দিলীর। সে ঠিক কথা।

সোলেমান। কিন্তু পিতা ত পলায়িত। আজ্ঞা দেবেন কেমন করে' ?

জয়সিংহ। তবে আমাদের এখন তঁার পদস্থ ঔরংজীবের আজ্ঞার জন্ত অপেক্ষা কর্তে হবে। অবশ্য যদি এই সংবাদ সত্য হয়।

সোলেমান। কি ! ঔরংজীবের আজ্ঞার জন্ত—আমার পিতার শত্রুর আজ্ঞার জন্ত—আমি অপেক্ষা করব ?

জয়সিংহ। আপনি না করেন, আমাদের তাই কর্তে হবে বৈকি—
কি বল দিলীর খাঁ ?

দিলীর। তা—কথাটা ঐ রকমেই দাঁড়ায় বটে !

সোলেমান। জয়সিংহ ! দিলীর খাঁ—আপনারা ছ'জনে তা হলে
ষড়যন্ত্র করেছেন ?

জয়সিংহ। আমাদের দোষ কি—বিনা সমুচিত আজ্ঞায় কি করে'
কোন কাজ করি। লাহোরে যুবরাজ দারার উদ্দেশে যাওয়ার সমুচিত
আজ্ঞা এখনও পাই নি।

সোলেমান। আমি আজ্ঞা দিচ্ছি।

জয়সিংহ। আপনার আজ্ঞায় আমরা আপনার পিতার আজ্ঞা
অবহেলা কর্তে পারি না। পারি খাঁ সাহেব ?

দিলীর। তা কি পারি !

সোলেমান। বুঝেছি। আপনারা একটা চক্রান্ত করেছেন। আজ্ঞা
আমি স্বয়ং সৈন্যদের আজ্ঞা দিচ্ছি।

সোলেমানের প্রধান

দিলীর। কি বলেন মহারাজ ?

জয়সিংহ। কোন ভয়ের কারণ নাই খাঁ সাহেব। আমি সৈন্যদের সব বশ করে' রেখেছি !

দিলীর। আপনাদের মত বিচক্ষণ কর্ম্মঠ ব্যক্তি আমি কখনও দেখি নাই। কিন্তু এ কাজটা কি উচিত হচ্ছে ?

জয়সিংহ। চুপ ! এখন আমাদের কাজ হচ্ছে একটুখানি দাঁড়িয়ে দেখা। এখনও ঔরঞ্জীবের পক্ষে একেবারে হেল্ছি না। একটু অপেক্ষা কর্তে হবে। কি জানি—

সোলেমানের পুনঃ প্রবেশ

সোলেমান। সৈন্তেরাও এ চক্রান্তে যোগ দিয়েছে। আপনাদের বিনা আজ্ঞায় এক পাও নড়তে চায় না।'

জয়সিংহ। তাই দস্তুর বটে।

সোলেমান। মহারাজ ! সম্রাট আমার পিতার সাহায্যে আমার যেতে লিখেছেন। পিতার কাছে যাবার জন্য আমার প্রাণ বড় ব্যাকুল হয়েছে। আমি আপনাদের মিনতি করছি দিলীর খাঁ ! দারার পুত্র আমি করঘোড়ে আপনাদের কাছে এই ভিক্ষা চাচ্ছি—যে আপনারা না যান—আমার সৈন্যদের আজ্ঞা দেন—আমার সঙ্গে পিতার কাছে লাহোরে যেতে। আমি দেখি এই রাজ্যাপহারী ঔরঞ্জীবের কতখানি শৌর্য। আমার এই দিগ্বিজয়ী সৈন্য নিয়ে যদি এখনো কর্ম্মক্ষেত্রে গিয়ে পড়তে পারি—মহারাজ !—দিলীর খাঁ ! আজ্ঞা দেন। এই কুপার জন্য আপনাদের কাছে আমি আমরণ বিক্রীত হ'য়ে থাকবো।

জয়সিংহ। সম্রাটের আজ্ঞা ভিন্ন আমরা এখান থেকে এক পাও নড়তে পারি না।

সোলেমান । দিলীর খাঁ—আমি জানু পেতে—যুবরাজ দারার পুত্র
আমি জানু পেতে—ভিক্ষা চাচ্ছি—(জানু পাতিলেন)

দিলীর । উঠুন সাহাজাদা । মহারাজ আজ্ঞা না দেন আমি দিচ্ছি ।
আমি দারার নিমক খেয়েছি । মুসলমান জাত, নেমকহারামের জাত নয় ।
আমুন সাহাজাদা, আমি আমার অধীনস্থ সমস্ত সৈন্য নিয়ে—আপনার
সঙ্গে লাহোরে যাচ্ছি । আর শপথ করছি যে, যদি সাহাজাদা আমায়
ত্যাগ না করেন আমি সাহাজাদাকে ত্যাগ করব না । আমি যুবরাজ
দারার পুত্রের জন্তে প্রয়োজন হয় ত প্রাণ দেবো । আহুন সাহাজাদা !
আমি এই মুহূর্তেই আজ্ঞা দিচ্ছি ।

সোলেমান ও দিলীরের প্রস্থান ।

জয়সিংহ । তাই ত ! এক ফোঁটা জল গলে গেলে খাঁ সাহেব !
তোমার মঙ্গল তুমি বুঝলে না । আমি কি করব ; আমার অধীনস্থ সৈন্য
নিয়ে তবে আমি আশ্রয় যাত্রা করি ।

সপ্তম দৃশ্য

সাজাহান ও জাহানারা

সাজাহান। জাহানারা! আমি সাগ্রহে ঔরঞ্জীবের অপেক্ষা
কচ্ছি। সে আমার পুত্র, আমার উদ্ধত বিজয়ী পুত্র; আমার লজ্জা—
আমার গৌরব!

জাহানারা। গৌরব পিতা; এত শঠ, এত মিথ্যাবাদী সে! সে-
দিন যখন আমি তার শিবিরে গেলাম, সে আপনার প্রতি প্রগাঢ় ভক্তি
দেখালে; বলল যে, সে মহাপাপ করেছে; আর সঙ্গে সঙ্গে দু' এক
ফোঁটা চোখের জলও ফেলল; বলল যে দারার পক্ষে ক্ষমতামূলী
ব্যক্তিদের নাম জান্তে পারলে সে নিঃশঙ্কচিত্তে পিতার আজ্ঞামত মোরাদকে
ছেড়ে দারার পক্ষ নেবে। আমি সরলভাবে তার সেই কথায় বিশ্বাস
করে' তাকে অভাগা দারার হিতৈষীদের নাম দিয়েছিলাম। সে তাদের
অমনি বন্দী করেছে। আমি দারাকে পত্র লিখেছিলাম। পথে সে পত্র
সে হস্তগত করেছে। এত কপট! এত ধূর্ত!

সাজাহান। না জাহানারা, তা সে কৰ্ত্তে পারে না। না না না!
আমি এ কথা বিশ্বাস করব না।

জাহানারা। আশুক সে একবার এই দুর্গে। আমি কৌশলে তাকে
আপনার চক্ষুর সম্মুখে বন্দী করব।

সাজাহান। সে কি জাহানারা! সে আমার পুত্র, তোমার ভাই।
জাহানারা, কাজ নাই। আশুক সে। আমি তাকে মেহে বশ করব।

তাতেও যদি সে বশ না হয়—তা হ'লে তার কাছে, পিতা আমি—তার সম্মুখে নতজানু হ'য়ে আমাদের প্রাণভিক্ষা মেগে নেবো। বলবো আমরা আর কিছুই চাই না, আমাদের বাঁচতে দাও, আমাদের পরস্পরকে ভালোবাসবার অবকাশ দাও।

জাহানারা। সে অপমান থেকে আমি আপনাকে রক্ষা করব বাবা।

সাজাহান। পুত্রের কাছে ভিক্ষায় অপমান নাই

মহম্মদের প্রবেশ

সাজাহান। এই যে মহম্মদ! তোমার পিতা কৈ!

মহম্মদ। তা ত জানি না ঠাকুর্দা!

সাজাহান। সে কি! সে এখানে আসবার জন্ত অশ্রাক্রম হয়েছে—

শুনলাম—

মহম্মদ। কে বলে! তিনি ত ঘোড়ায় চড়ে' আকবরের কববে নেওয়াজ পড়তে গেলেন। আমি ত যতদূর জানি, তাঁর এখানে আসবার কোন অভিপ্রায় নাই।

জাহানারা। তবে তুমি এখানে কেন মহম্মদ!

মহম্মদ। এ প্রাসাদ-দুর্গ অধিকার কর্তে।

সাজাহান। সে কি! না তুমি পরিহাস করছ মহম্মদ।

মহম্মদ। না ঠাকুর্দা, এ সত্য কথা!

জাহানারা। বটে! তবে আমি তোমাকেই বন্দী করব।

[বানী বাজাইলেন। সশস্ত্র পক্ষ প্রহরীর প্রবেশ

জাহানারা। অস্ত্র দাও মহম্মদ!

মহম্মদ। সে কি!

জাহানারা। তুমি আমার বন্দী। সৈনিকগণ! অস্ত্র কেড়ে নাও!

মহম্মদ । তবে আমারও ~~স্বপ্ন~~ দাঁড়ীদেব ডাকতে হ'লো !

বাশী বাজাইলেন । দশজন দেহরক্ষীর প্রবেশ

মহম্মদ । আমার সহস্র সৈনিকগণকে ডাকো ।

জাহানারা । সহস্র সৈনিক ! কে তাদের দুর্গমধ্যে প্রবেশ কর্তে দিল !

সাজাহান । আমি দিয়েছি জাহানারা । সব দোষ আমার । আমি স্নেহবশে ঔরঞ্জীব পত্রে যা চেয়েছিল, সব দিয়েছিলাম । ওঃ, আমি এ স্বপ্নেও ভাবি নি—মহম্মদ !

মহম্মদ । ঠাকুর্দা ।

সাজাহান । আমি কি তবে এখন বুঝবো, যে আমি তোমার হস্তে বন্দী ।

মহম্মদ । বন্দী ন'ন ঠাকুর্দা । তবে আপনার বাইরে যাবার অনুমতি নাই ।

সাজাহান । আমি ঠিক বুঝতে পারছি নে । একি একটা সত্য ঘটনা ? না সব স্বপ্ন ? আমি কে ? আমি সম্রাট সাজাহান ? তুমি আমার পৌত্র, আমার সম্মুখে দাঁড়িয়ে তরবারি খুলে ? একি ! একদিনে কি সংসারের নিয়ম সব উল্টে গেল ! একদিন যার রোষকষায়িত চক্ষু দেখে ঔরঞ্জীব ভয়ে অর্ধেক মাটির মধ্যে সেঁধিয়ে যেত—তার—তার—পুত্রের হাতে—সে বন্দী ! জাহানারা ! কৈ ! এই যে ! একি কল্পা ! তোর ঠোঁট নড়ছে, কথা বা'র হচ্ছে না ; কিন্তু দিয়ে একটা নিশ্চিত স্থির শূন্য-দৃষ্টি নির্গত হচ্ছে ; গণ্ডু'টি ছাইয়ের মত শাদা হ'য়ে গিয়েছে)—কি হয়েছে মা ?

জাহানারা । না বাবা ! কিন্তু ~~কিছু করতে পারলে কেমন করে । আমি~~ শুধু তাই ভাবছি ।

সাজাহান । মহম্মদ ! ভেবেছো আমি এই শাঠ্য, এই অত্যাচার—এখানে এই রকম বসে' নিঃসহায়ভাবে সহ্য করব ! ভেবেছো এই

কেশরী স্থবির বলে' তোমরা তাকে পদাঘাত করে' যাবে? আমি বৃদ্ধ সাজাহান বটে। কিন্তু আমি সাজাহান। এই, কে আছে! নিয়ে এসো আমার বর্ষ আর তরবারি।—কৈ, কেউ নেই!

মহম্মদ। ঠাকুর্দা, আপনার দেহরক্ষীদের ছুর্গের বা'র করে' দেওয়া হয়েছে।

সাজাহান। কে দিয়েছে?

মহম্মদ। আমি।

সাজাহান। কার আজ্ঞায়?

মহম্মদ। পিতার আজ্ঞায়। এক্ষণে আমাব এই সহস্র সৈনিকই জাহানার দেহরক্ষীর কাজ করবে।

সাজাহান। মহম্মদ! বিশ্বাসঘাতক!

মহম্মদ। আমি আমার পিতার আজ্ঞাবহ মাত্র।

সাজাহান। ঔরঞ্জীব! না, আজ সে কোথায়, আর আমি কোথায়! তবু যদি জাহানারা, আজ ছুর্গের বাইরে গিয়ে একবার আমার সৈন্যদের সম্মুখে দাঁড়াতে পারিতাম, তা হ'লে এখনও এই বৃদ্ধ সাজাহানের জয়ধ্বনিতে ঔরঞ্জীব মাটিতে হুয়ে পড়তো! একবার খোলা পাই না! একবার খোলা পাই না!—মহম্মদ। আমায় একবার মুক্ত করে' দাও। একবার! একবার!

মহম্মদ। ঠাকুর্দা, আমায় দোষ দেবেন না। আমি পিতার আজ্ঞাবহ।

সাজাহান। আর আমি তোমার পিতার পিতা না? সে যদি তার পিতার প্রতি হেন অত্যাচারী হয়—তুমি কেন তোমার পিতার আজ্ঞাবহ হবে!—মহম্মদ! এসো! ছুর্গদ্বার খুলে দাও।

মহম্মদ। মার্জনা করবেন ঠাকুর্দা! আমি পিতার আজ্ঞার অবাধ্য হ'তে পারি না।

সাজাহান। দেবে না? দেবে না? দেখ, আমি তোমার বৃদ্ধ পিতামহ—রুগ্ন, জীর্ণ, স্থবির। আর কিছু চাই না। শুধু একবার মাত্র এই দুর্গের বাইরে যেতে চাই। আবার ফিরে আসবো শপথ করছি।
দেবে না—দেবে না?

মহম্মদ। ক্ষমা করবেন ঠাকুর্দা—আমি তা পারবো না।

গমনোত্ত

সাজাহান। দাঁড়াও মহম্মদ! (কিঞ্চিৎ চিন্তা করিয়া গিয়া রাজমুকুট আনিয়া ও শয্যা হইতে কোরাণ লইয়া) দেখ মহম্মদ! এই আমার মুকুট, এই আমার কোরাণ! এই কোরাণ স্পর্শ করে' আমি শপথ করছি যে বাহিরে গিয়ে সমবেত প্রজাদের সম্মুখে এই মুকুট-আমি তোমার মাথায় পরিয়ে দেবো! কারো সাধ্য নাই যে, প্রতিবাদ করে। আমি আজ শীর্ণ, পক্ষাঘাতে পঙ্গু বটে; কিন্তু সম্রাট সাহাজান এ ভারতবর্ষ এতদিন ধরে' এমন শাসন করে' এসেছে যে, যদি সে একবার তার সৈন্যদের সম্মুখে খাড়া হ'য়ে দাঁড়াতে পারে, তা হ'লে শুদ্ধ তাদের মিলিত অগ্নিময় দৃষ্টিতে শত ঔরঞ্জীব ভস্ম হ'য়ে পুড়ে' যায়। মহম্মদ! আমায় মুক্ত করে' দাও। তুমি ভারতের অধীশ্বর হবে! আমি শপথ করছি মহম্মদ! শপথ করছি। আমি শুদ্ধ এই কপট ঔরঞ্জীবকে একবার দেখবো। মহম্মদ!

মহম্মদ। ঠাকুর্দা মার্জনা করবেন।

সাজাহান। দেখ! এ ছেলে খেলা নয়। আমি স্বয়ং সম্রাট সাজাহান—কোরাণ স্পর্শ করে' শপথ করছি। এ বাতুলের প্রলাপ নয়। শপথ করছি—দেখ একদিকে তোমার পিতার আত্মা, আর একদিকে ভারতের সাম্রাজ্য—বেছে নাও এই মুহূর্তে!

মহম্মদ। ঠাকুর্দা, আমি পিতার আত্মার অবাধ্য হতে পারি না।

সাজাহান। একটা সাম্রাজ্যের জগুও না?

মহম্মদ । পৃথিবীর জ্ঞাতও না ।

সাজাহান । দেখ মহম্মদ ! বিবেচনা করে' দেখ । ভালো করে' বিবেচনা কর—ভারতের অধীশ্বর—

মহম্মদ । আর আমি এখানে দাঁড়িয়ে এ কথা শুনবো না । প্রলোভন বড়ই অধিক । হৃদয় বড়ই দুর্বল । ঠাকুর্দা মার্জনা করবেন ।

প্রস্থান

সাজাহান । চলে' গেল ! চলে' গেল ! জাহানারা ! কথা কচ্ছি না যে ।

জাহানারা । ঔরংজীব ! তোমার এই পুত্র ! যে তার পিতার আশ্রয় পালন কর্তে একটা সাম্রাজ্য দিতে পারে—আর তুমি তোমার পিতার এত স্নেহের বিনিময়ে তাকে ছলে বন্দী করেছো !

সাজাহান । সত্য বলেছো কণ্ঠা !—পিতা সব, আর নিজে না খেয়ে পুত্রদের খাইও না ; বৃক্কের উপর রেখে ঘুম পাড়িও না ; তাদের হাসিটি দেখার জ্ঞাত স্নেহের হাসিটি হেসো না । তা'রা সব কৃতঘ্নতার অঙ্কুর । তা'রা সব শিশু-শয়তান । তাদের আধপেটা খাইয়ে মানুষ কোরো । তাদের সকালে বিকালে জোরে কষাঘাত কোরো । তাদের সারাজীবনটা চোখ রাঙিয়ে শাসিয়ে রেখো । তা হ'লে বোধ হয় তা'রা এই মহম্মদের মত বাধ্য, পিতৃভক্ত হবে । তাদের এই শাস্তি দিতে যদি তোমাদের বৃক্ক ব্যথা লাগে ত বৃক্ক ভেঙ্গে ফেলো, চোখে জল আসে ত চোখ উপড়ে, তুলে ফেলো ; আর্তনাদ কর্তে ইচ্ছা হয় ত নিজের টুঁটি চেপে ধোরো । (ওঃ—)

জাহানারা । বাবা, এই কারাগারের কোণে বসে' অসহায় শিশুর মত ক্রন্দন করলে কিছু হবে না ; পদাহত পঙ্গুর মত বসে' দস্তে দস্তে ঘর্ষণ ক'রে অভিশাপ দিলে কিছু হবে না ! পাপী মূর্খের মত অস্তিম্বে

একবার ঈশ্বরকে 'দয়াময়' বলে' ডাকলে কিছু হবে না! উঠুন, দলিত ভূঙ্গঙ্গমের মত ফণা বিস্তার ক'রে উঠুন; হতশাবা ব্যাঘ্রীর মত প্রমত্ত বিক্রমে গর্জে' উঠুন; অত্যাচারে ক্ষিপ্ত জাতির মত জেগে উঠুন। নিয়তির মত কঠিন হোন; হিংসার মত অন্ধ হোন; শয়তানের মত ক্রুর হোন। তবে তার সঙ্গে পার্বেন।

সাজাহান। উত্তম! তবে তাই গোক! আয় মা, তুইও আমার সহায় হ'। আমি অগ্নির মত জলে' উঠি' তুই বায়ুর মত ধেয়ে আয়! আমি ভূমিকম্পের মত সাম্রাজ্যখানি ভেঙ্গে চুরে দিয়ে যাই, তুই সমুদ্রের জলোচ্ছ্বাসের মত তাকে এসে গ্রাস কর। আমি বুদ্ধ নিয়ে আসি; তুই মড়ক নিয়ে আয়! আয় ত; একবার সাম্রাজ্য তোলপাড় করে' দিয়ে চলে' যাই—তার পর কোথায় যাই?—কিছুই যায় আসে না! খধুপের মত একটা বিরাট জ্বালায় উর্কে উঠে—বিরাট হাহাকারে শূন্যে ছড়িয়ে পড়ি।

দ্বিতীয় অঙ্ক

প্রথম দৃশ্য

স্থান—মথুরায় ঔরঞ্জীবের শিবির। কাল—রাত্রি

দিলদার একাকী

দিলদার। মোরাদ! কেমন ধীরে ধীরে ধাপে ধাপে তুমি নেমে যাচ্ছ! সুরার স্রোতে ভাসছে। নর্তকীর হাব-ভাব তার উপরে তুফান তুলে দিয়েছে। তুমি ডুববে! আর দেবী নাই। মোরাদ। তোমাকে দেখে আমার মাঝে মাঝে দুঃখ হয়। এত সরল! সাহাজাদীর প্ররোচনায় ঔরঞ্জীবকে ছলে বন্দী কর্তে গিয়েছিলেন। জলে নেমে কুস্তীরের সঙ্গে বাদ!—আজ তার প্রতি নিমন্ত্রণ! এই যে জাঁহাপনা!

মোরাদের প্রবেশ

মোরাদ। ~~দাদা~~ দাদা এখনও নেওয়াজ পড়ছেন ~~আজ~~!—দাদা পরকাল নিয়েই গেলেন। ইহকালটা তাঁর ভোগে এলো না।—কি ভাবছে দিলদার!

দিলদার। ভাবছিলাম জাঁহাপনা, যে মাছগুলোর ডানা না থেকে যদি পাখা থাকতো তা হ'লে সেগুলো বোধ হয় উড়তো।

মোরাদ। আরে, মাছের যদি পাখা থাকতো, তা হ'লে সে ত পাখীই হোত।

দিলদার। তা বটে। ঐটুকু আগে ভাবি নি। তাই গোলো

পড়েছিলাম। এখন বেশ পরিষ্কার বোঝা যাচ্ছে—আচ্ছা জাঁহাপনা, হাঁসের মত জানোয়ার বড় একটা দেখা যায় না। সাঁতার দেয়, ডেঙ্গায় হাঁটে, আবার আকাশে উড়ে।

মোরাদ। তার সঙ্গে বর্তমান বিষয়ের সম্বন্ধ কি মূর্খ!

দিলদার। দয়াময় পাছ'টো নীচের দিকে দিয়েছিলেন হাঁটবার জন্য সেটা বেশ বোঝা যায়।

মোরাদ। যায় নাকি!

দিলদার। কিন্তু পা যদি ভাবতে শুরু করে তা হ'লে মাথা ঠিক রাখা শক্ত হয়।—আচ্ছা, ঈশ্বর পশুগুলোর মাথা সম্মুখ দিকে আর লেজ পেছন দিকে দিয়েছেন কেন জাঁহাপনা?

মোরাদ। ওরে মূর্খ! তাদের মুখ যদি পিছন দিকে হতো তা হ'লে ত সেইটেই সম্মুখ দিক হতো।

দিলদার। ঠিক বলেছেন জাঁহাপনা।—কুকুর লেজ নাড়ে কেন, এর কারণ কিন্তু খাসা কারণ।

মোরাদ। কি কারণ?

দিলদার। কুকুর লেজ নাড়ে, কারণ লেজের চেয়ে কুকুরের জোর বেশী। যদি কুকুরের চেয়ে লেজের জোর বেশী হতো, তা হ'লে লেজই কুকুরকে নাড়তো।

মোরাদ। হাঃ হাঃ হাঃ—এই যে দাদা!

ঔরঞ্জীবের প্রবেশ

ঔরঞ্জীব। এই যে এসেছো ভাই, তোমার বিদুষককে সঙ্গে করে এনেছো দেখছি।

মোরাদ। হাঁ দাদা। আমোদের সময় বয়স্শও চাই, নর্তকীও চাই!

ঔরঞ্জীব। তা চাই বৈকি। কাল হঠাৎ জনকতক অসামান্য সুন্দরী নর্তকী এসে উপস্থিত হ'লো। আমার ত তাতে স্পৃহা নেই জানোই। আমি ত মক্কায চলেছি। তনে ভাবলাম তারা তোমার মনোরঞ্জন কর্তে পারবে। আর এই কয় বোতল সুরা তোমার জন্তে গোঁয়ার ফিরিঙ্গীদের কাছে সংগ্রহ করেছিলাম। দেখ দেখি কি রকম!

প্রদান

মোরাদ। দেখি! (ঢালিয়া পান করিয়া) বাঃ! তোফা! বাঃ দিলদার কি ভাবছে! একটু খাবে?

দিলদার। আমি একটা কথা ভাবছিলাম জাঁহাপনা, যে সব জানোয়ারগুলোই সম্মুখদিকে হাঁটে কেন?

মোরাদ। কেন? পিছনদিকে হাঁটে না বলে?

দিলদার। না। কারণ তাদের চোখ দু'টো সম্মুখদিকে। কিন্তু যারা অন্ধ তাদের সম্মুখদিকে হাঁটাও বা পিছন দিকে হাঁটাও তা— একই কথা!

মোরাদ। তোফা! এই ফিরিঙ্গীরা গদটা খাসা তৈরি করে। (পান) তুমি একটু খাবে না?

ঔরঞ্জীব। না, জানোই ত আমি খাই না। কোরাণের নিষেধ।

দিলদার। অন্ধ জাগো—না কিবা রাত্রি কিবা দিন।

মোরাদ। কোরাণের সব নিষেধ মানতে গেলে সংসার চলে না। (পান)

দিলদার। হাতীর যতখানি শক্তি, ততখানি যদি বুদ্ধি থাকত, ত সে কি বুদ্ধিমান জানোয়ারই হোত। তা হ'লে হাতীর উপর মাছত না বসে, মাছতের উপর হাতী বসতো! অতখানি শক্তি—যা অস্ত বড় দেহধানাকে—মায় গুঁড় নিয়ে ঘুরে ফিরে বেড়াচ্ছে—ওঃ!

ঔরঞ্জীব। তোমার বিদূষকটি ত বেশ রসিক।

মোরাদ । ও একটি রত্ন ! কৈ নর্তকীরা কৈ ?

ঔরঞ্জীব । ঐ যে ঐ শিবিরে । তুমি নিজে গিয়ে তাদের ডেকে নিয়ে এসো না !

মোরাদ । এক্ষণই । মোরাদ যুদ্ধে কি সম্ভোগে কিছুতেই পিছপাও নয় ।
প্রস্থান ।

দিলদার । “অন্ধ জাগো”—বলিয়া তাঁহার অনুগমন করিতে উদ্যত ।

ঔরঞ্জীব তাহাকে বাধা দিলেন

ঔরঞ্জীব । দাঁড়াও, কথা আছে ।

দিলদার । আমায় মেরো না বাবা ! আমি সিংহাসনও চাই না, মক্কাও চাই না ।

ঔরঞ্জীব । তুমি কে, ঠিক করে' বল ! তুমি শুধু বিদূষক নও । কে তুমি ?

দিলদার । আমি একজন বেজায় পুরানো গাঁটকাটা, ধাপ্লাবাজ, চোর । আমার স্বভাবটা হচ্ছে খোসামুদী, বাদরামি, জোচ্চোরী, পেজোমীর একটা ঘণ্ট । আমি শামুকের চেয়েও কুড়ে, কুকুরের চেয়েও পা-চাটা, চতুরের চেয়েও লম্পট !

ঔরঞ্জীব । শোন, আমি পরিহাসপ্রিয় নই ! তুমি কি কাজ কর্তে পারো ?

দিলদার । কিছু কর্তে পারি না । হাই তুলতে পারি, একটা কাজ দিলে সেটা পণ্ড কর্তে পারি, গালাগালি দিলে সেটা বুঝতে পারি—আর কিছু পারি না জাঁহাপনা ।

ঔরঞ্জীব । থাক—বুঝেছি । তোমাকে আমার দরকার হবে ! কোন ভয় নাই ।

দিলদার । ভরসাও নেই ।

নর্তকীদের সহিত মোরাদের পুনঃ প্রবেশ

মোরাদ । বাহবা !—এ তোফা ! চমৎকার !

ঔরঞ্জীব । তবে তুমি এখন স্তুতি কর । আমি যাই । তোমার বিদূষককে নিয়ে যাই । ওর কথাবার্তায় আমার ভারি আমোদ বোধ হচ্ছে ।

মোরাদ । কেমন ! হচ্ছে কি না ? বলেছি ত ও একটি রত্ন । তা বেশ ওকে নিয়ে যাও । আমি ওর চেয়ে অনেক ভালো সংসর্গ পেয়েছি ।

দিলদারের সহিত ঔরঞ্জীবের প্রস্থান

মোরাদ । নাচো, গাও ।

নৃত্য-গীত

আজি এসেছি—আজি এসেছি, এসেছি বঁধু হে

নিয়ে এই হাসি, রূপ গান ।

আজি. আমার যা কিছু আছে, এনেছি তোমার কাছে,

তোমায় করিতে সব দান !

আজি তোমারি চরণতলে রাখি এ কুসুমভার,

এ হার তোমার গলে দিই বঁধু উপহার,

সুধার আধার ভরি, তোমার অধরে ধরি—কর বঁধু কর তায় পান

আজি হৃদয়ের সব আশা, সব সুখ ভালোবাসা,

তোমাতে হউক অবসান ।

ঐ ভেসে আসে কুসুমিত উপবন সৌরভ,

ভেসে আসে উচ্ছল জলদল-কলরব,

ভেসে আসে রাশি রাশি জ্যোৎস্নার মুহূর্তসি, ভেসে আসে পাপিয়ার তান ;

আজি এমন চাঁদের আলো—মরি যদি সেও ভাল ;

সে মরণে স্বরগ সমান ।

আজি তোমার চরণতলে লুটায় পড়িতে চাই,
 তোমার জীবনতলে ডুবিয়ে মরিতে চাই,
 তোমার নয়নতলে শয়ন লভিব বলে' ; আসিয়াছি তোমার নিধান ;
 আজি সব ভাষা সব বাক্—নীরব হইয়া যাক্ ;
 প্রাণে শুধু নিশে থাক্—প্রাণ ।

মোরাদ শুনিত্তে শুনিত্তে সুরাপান করিতে লাগিলেন ও ক্রমে নিদ্রিত হইলেন ।
 নর্তকীগণের প্রস্থান ও প্রহরিন্দগমহ ঔরঞ্জীবের প্রবেশ

ঔরঞ্জীব । বাঁধো ।

মোরাদ । কে দাদা ! একি ! বিশ্বাসবাতকতা ?—(উঠিলেন)

ঔরঞ্জীব । যদি বাধা দেয়—তবে বধ কর্ত্তে ছিধা ক'রো না ।

প্রহরিন্দগ মোরাদকে বন্দী করিল

ঔরঞ্জীব । আগ্রায় নিয়ে যাও । আমার পুত্র সুলতান আর
 শায়স্তা খাঁর জিন্মায় রাখ্বে, আমি পত্র লিখে দিচ্ছি ।) ১৫

মোরাদ । এর প্রতিফল পাবে—আমি তোমার একবার দেখ্বে ।

ঔরঞ্জীব । নিয়ে যাও ।

সপ্রহরী মোরাদের প্রস্থান ✓

ঔরঞ্জীব । আমার হাত ধরে' কোথায় নিয়ে যাচ্ছ খোদা ! আমি
 এ সিংহাসন চাই নি । তুমি আমার হাত ধরে' এ সিংহাসনে বসালে !
 কেন—তুমিই জান ।

দ্বিতীয় দৃশ্য

স্থান—আগ্রার দুর্গ-প্রাসাদ । কাল—প্রভাত

সাজাহান একাকী

সাজাহান । সূর্য উঠেছে । যেমন সেই প্রথম দিন উঠেছিল, সেই রকম উজ্জল, রক্তবর্ণ ! আকাশ তেমনি নীল ; ঐ যমুনা তেমনি ক্রীড়াময়ী কলস্বরী ; যমুনার পরপারে বৃক্ষরাজি তেমনি পত্রশ্যাম, পুষ্পোজ্জল ; যেমন আমি আশৈশব দেখে এসেছি । সবই সেই । কেবল আমিই বদলিছি— (গাঢ়স্বরে) আমি আজ আমার পুত্রের হস্তে বন্দী—নারীর মত অসহায়, শিশুর মত দুর্বল । মাঝে মাঝে ক্রোধে গর্জন ক'রে উঠি, কিন্তু সেশরতের মেঘের গর্জন—একটা নিষ্ফল হাহাকার মাত্র । আমার নির্বিষ আক্ষালনে আমি নিজেই ক্ষয় হ'য়ে যাই । উঃ ! ভারত-সম্রাট সাজাহানের আজ—একি অবস্থা ! (একটি স্তম্ভের উপর বাহু রাখিয়া দূরে যমুনার দিকে চাহিয়া রহিলেন)—ও কি শব্দ ! ঐ ! আবার ; আবার !—এই যে জাহানারা ।

জাহানারার প্রবেশ

সাজাহান । 'ও কি শব্দ' জাহানারা ? ঐ আবার !—কুন্‌হিস্ ? (সৌৎসুক্যে) দারা কি সৈন্য কামান নিয়ে বিজয়গর্বে আগ্রায় ফিরে এলো ? এসো পুত্র ! এই অন্তায় অবিচার ~~বৃহৎসত্য~~ প্রতিশোধ নাও ।—কি জাহানারা । চোখ ঢাক্‌ছিস যে । বুঝেছি মা—এ দারার বিজয় ঘোষণা নয়—এ নূতন এক দুঃসংবাদ । তাই কি ?

জাহানারা । হাঁ বাবা !

সাজাহান । জানি, দুর্ভাগ্য একা আসে না । যখন আরম্ভ হয়েছে,

সে তার পালা শেষ না ক'রে যাবে না। বল কি হুঃসংবাদ কণ্ঠা! ও কিসের শব্দ!

জাহানারা। ঔরঞ্জীব আজ সয়াট হ'য়ে দিল্লীর সিংহাসনে বসেছে। আগ্রায় এ তারই উৎসবধ্বনি।

সাজাহান। (যেন শুনিতে পান নাই এই ভাবে) কি! ঔরঞ্জীব—কি হয়েছে?

জাহানারা। আজ, দিল্লীর সিংহাসনে বসেছে।

সাজাহান। জাহানারা কি বল্ছো! আমি জীবিত আছি, না মরে' গিয়েছি? ঔরঞ্জীব—না—অসম্ভব! জাহানারা তুমি শুনতে ভুলেছো। এ কি হ'তে পারে! ঔরঞ্জীব—ঔরঞ্জীব এ কাজ কর্তে পারে না। তার পিতা এখনও জীবিত—একটা ত বিবেক আছে, চক্ষু লজ্জা আছে!

জাহানারা। (কম্পিত-স্বরে) যে ব্যক্তি বৃদ্ধ পিতাকে ছলে বন্দী করে'—জীবন্তে এই গোর দিতে পারে, সে আর কি না কর্তে পারে বাবা!

সাজাহান। তবুও—না! হবে। আশ্চর্য্য কি! আশ্চর্য্য কি! এ কি! মাটি থেকে একটা কাল ধোঁয়া আকাশে উঠছে। আকাশ কালীবর্ণ হয়ে গেল! সংসার উল্টে গেল বুঝি।—ঐ ঐ—না আমি পাগল হ'য়ে যাচ্ছি নাকি!—ঐ ত সেই নীল আকাশ, সেই উজ্জল প্রভাত—হাস্ছে! কিছু হয় নি ত।—আশ্চর্য্য! (কিছুক্ষণ শুক থাকিয়া) জাহানারা!

জাহানারা। বাবা!

সাজাহান। (গদগদস্বরে) তুই বাহিরে কি দেখে এলি!—সংসার কি ঠিক সেই রকমই চল্ছে! জননী সম্মানকে গুন দিচ্ছে? স্ত্রী স্বামীর ঘর কর্ছে? ভৃত্য প্রভুর সেবা কর্ছে? গৃহস্থ ভিখারীকে ভিক্ষা দিচ্ছে?

দেখে এলি—যে বাড়ীগুলো সেই রকম খাড়া আছে, রাস্তায় লোক চলে! মানুষে মানুষ খাচ্ছে না! দেখে এলি! দেখে এলি!

জাহানারা। নাচ সংসার সেই রকমই চলে বাবা! বন্দী সাজাহানকে নিয়ে কেউ মাথা ঘামাচ্ছে না।

সাজাহান। না?—সত্য কথা?—তা'রা বলেছে না যে 'এ ঘোরতর অত্যাচার?' বলেছে না—'আমাদের প্রিয় দয়ালু প্রজাবৎসল সাজাহানকে কার সাধ্য বন্দী করে' বাথে?'—চেষ্টাচ্ছে না—'যে আমরা বিদ্রোহ করব, ঔৎসুকীকে কারারুদ্ধ করব, আগ্রার দুর্গপ্রাকার ভেঙ্গে আমাদের সাজাহানকে নিয়ে এসে আবার সিংহাসনে বসাবো।'—বলেছে না? বলেছে না?

জাহানারা। না বাবা! সংসার কাউকে নিয়ে ভাবে না। সবাই নিজের নিজের নিয়েই ব্যস্ত! তারা এত আত্মমগ্ন যে, কাল যদি এই সূর্য না উঠে, একটা প্রচণ্ড অগ্নিদাহ আকাশ পুড়িয়ে দিয়ে যায়, ত তা'রাই রক্তবর্ণ আলোকে তারা পূর্ববৎ নিজের নিজের কাজ করে' যাবে।

সাজাহান। যদি একবার দুর্গের বাইরে যেতে পার্তাম—একবার সুর্যোগ পাই না জাহানারা। একবার আমাকে চুরি করে' দুর্গের বাইরে নিয়ে যেতে পারিস্?

জাহানারা। না বাবা! বাইরে সহস্র সতর্ক প্রহরী।

সাজাহান। তবু তা'রা একদিন আমাকে সন্ধ্যাট বলে' মানতো। আমি তাদের সঙ্গে কখন শব্দভাষা করি নি। হয় ত তাদের মধ্যে অনেককে অনাহার থেকে বাঁচিয়েছি, কারাগার থেকে মুক্ত করে' দিয়েছি, বিপদ থেকে রক্ষা করেছি। বিনিময়ে—

জাহানারা! না বাবা!—মানুষ খোসামুদে—কুকুরের মত খোসামুদে—

যে একখণ্ড মাংস দিতে পারে, তারই পায়ের তলায় সে দাঁড়িয়ে লেজ নাড়ে।—এত নীচ! এত হেয়!

সাজাহান। তবু আমি যদি তাদের কাছে গিয়ে একবার দাঁড়াই? এই শুভ্রশির মুক্ত করে', যষ্টির উপর এই রোগবিকম্পিত দেহখানির ভার রেখে যদি আমি তাদের সম্মুখে দাঁড়াই? তাদের দয়া হবে না? দয়া হবে না?

জাহানারা। বাবা সংসারে দয়া মায়া নাই। সব ভয়ে চলেছে। সাজাহানের সম্পৎকালে যারাই “জয় সম্রাট সাজাহানের জয়” বলে চীৎকারে আকাশ দৌর্ণ করে' দিত, তারাই যদি আজ আপনার এই স্থবির অথর্ক মূর্তি দেখে, ত ঐ মুখে ঘৃণায় খুৎকার দেবে—আর যদি রূপাভরে খুৎকার না দেয়, ত ঘৃণায় মুখ ফিরিয়ে নিয়ে চলে' যাবে।

সাজাহান। এতদূর! এতদূর!—(গম্ভীর-স্বরে) যদি এই আজ সংসারের অবস্থা, তবে আজ এক মহাব্যাধি তার সর্বস্ব ছেয়েছে; তবে আর কেন? ঈশ্বর আর তাকে রেখো না। এক্ষণেই তাকে গলা টিপে মেরে ফেলো। যদি তাই হয়, তবে এখনও আকাশ—তুমি নীলবর্ণ কেন? সূর্য! তুমি এখনো আকাশের উপর কেন? নির্লজ্জ! নেমে এসো! একটা মহা সংঘাতে তুমি চূর্ণ হ'য়ে যাও। ভূমিকম্প! তুমি ভৈরব হুঙ্কারে জেগে উঠে এ পৃথিবীর বক্ষ ভেঙ্গে খান খান করে' ফেল। একটা প্রকাণ্ড দাবানল জলে' উঠে সব জালিয়ে পুড়িয়ে ভস্ম করে' দিয়ে চলে' যাও। আর একটা বিরাট ঘূর্ণী-ঝঞ্ঝা এসে সেই ভস্মরাশি ঈশ্বরের মুখে ছড়িয়ে দাও।—

তৃতীয় দৃশ্য

স্থান—রাজপুতানার মরুভূমির প্রান্তদেশ । কাল—দ্বিপ্রহর দিবা

বৃক্কতলে দারা, নাদিরা ও সিপার—একপার্শ্বে নিম্নিত জহরৎ উল্লিসা

নাদিরা । আর পারি না প্রভু !—এইখানে খানিক বিশ্রাম কর ।

সিপার । হাঁ বাবা—উঃ কি পিপাসা !

দারা । বিশ্রাম নাদিরা ! এ সংসারে আমাদের বিশ্রাম নাই ! ঐ মরুভূমি দেখছো—যা আমরা পার হ'য়ে এলাম ! দেখছো নাদিরা ।

নাদিরা । দেখছি—ওঃ—

দারা । আমাদের পেছনে যেমন মরুভূমি, আমাদের সম্মুখে সেইরূপ মরুভূমি ! জল নাই, ছায়া নাই, শেষ নাই—ধূ ধূ করছে ।

সিপার । বাবা ! বড় পিপাসা—একটু জল !

দারা । জল আর নেই সিপার !

সিপার । বাবা ! জল ! জল না খেলে আমি বাঁচবো না ।

দারা । ~~(কমভাবে)~~ হুঁ !

সিপার । উঃ ! জল ! জল !

নাদিরা । দেখ প্রভু, কোন খানে যদি একটু জল পাও, দেখ ! বাছা মূর্ছা যাবার উপক্রম হয়েছে । আমারও তৃষ্ণায় ছাতি ফেটে যাচ্ছে—

দারা । কেবল তোমাদেরই বুঝি যাচ্ছে নাদিরা ! আমার যাচ্ছে না ? কেবল নিজের কথাই ভাবছো ।

নাদিরা । আমার জ্ঞান বন্ধি না নাথ !—এই বেচারী—আহা—

দারা। আমারও ভিতরে একটা দাহ! ভীষণ! আগুন ছুটেছে।
তার উপর বেচারীর গুঞ্চ তানু দেখছি—কথা সরছে না—দেখছি—
আর ভাবছো কি নাদিরা—সে আমার পরম সুখ হচ্ছে! কিন্তু কি
কর্ষ—জল নাই। এক ক্রোশের মধ্যে জলের দেখা নাই, চিহ্ন নাই।
উঃ! কি অবস্থায়ই আমাকে ফেলেছো দয়াময়! আর যে পারি না।

সিপার। আর পারি না বাবা!

নাদিরা। আহা বাছা—আমিও মরি—আর সহ হয় না—

দারা। মর—তাই মর—তোমরা মর—আমিও মরি—আজ
এইখানে আনাদের সব শেষ হ'য়ে যাক।—যাক—তাই যাক!

সিপার। মা—ওঃ আর কথা সরে না। কি যন্ত্রণা মা!

নাদিরা। উঃ কি যন্ত্রণা!

দারা। না, আর দেখতে পারি না। আমি আজ ঈশ্বরের উপর
প্রতিশোধ নেবো! আর তাঁর এই পচা অন্তঃসারশূণ্য সৃষ্টি কেটে ফেলে
তাঁর প্রকাণ্ড জোঁচোরি বের করে' দেখাবো। আমি মর্ষ! কিন্তু তার
আগে নিজের হাতে তোদের শেষ কর্ব! তোদের মেরে মর্ষ!

ছুরিকা বাহির করিলেন

সিপার। মাকে মেরো না—আমায় মারো!

নাদিরা। না না—আমায় আগে মারো—(আমার চক্ষের সম্মুখে
বাছার বুকে ছুরি দিতে পাবে না।)—আমায় আগে মারো।

সিপার। না, আমায় আগে মারো বাবা!

দারা। এ কি দয়াময়! এ আবার—মাঝে মাঝে কি দেখাও!
অন্ধকারের মাঝখানে মাঝে মাঝে এ কি আলোকের উচ্ছ্বাস! ঈশ্বর!
দয়াময়! তোমার রচনা এমন সুন্দর কিন্তু এমন নিষ্ঠুর! এই মাঝের আর
ছেলের পরস্পরকে রক্ষা করবার জন্য এই কাগ্না—অথচ কেউ কাউকে

রক্ষা কর্তে পার্ছে না। এত প্রবল, কিন্তু এত দুর্বল। এত উচ্চ, কিন্তু এত নীচে পড়ে'। এ যে আকাশের একখানা মাণিক মাটিতে ছটকে এসে পড়েছে। এ যে স্বর্গ আর নরক এক সঙ্গে ! এ কি প্রহেলিকা দয়াময় !

সিপার। বাবা বাবা—উঃ ! (পড়িয়া গেল)

নাদিরা। বাছা আমার ! (তাহাকে গিয়া ক্রোড়ে লইলেন)

দারা। এই আবার সেই নরক ! না—না—না—এ আলোক-
ভ্রাস্তি, এ শয়তানী ! এ ছল ! অন্ধকার কত গাঢ় তাই দেখবার জন্ম
এ এক জলন্ত অঙ্গার খণ্ড। কিছু না। আমি তোমাদের বধ করে'
মর্ক ! (জ্বরতের দিকে চাহিয়া) ও যুমোচ্ছে। ওটাকেও মর্ক। তার
পরে—তোমাদের মৃতদেহগুলি জড়িয়ে আমি মর্ক।—এসো একে একে।

নাদিরাকে মারিবার জন্ম ছুরিকা উত্তোলন

সিপার। মেরো না, মেরো না।

দারা। (সিপারকে এক হাতে ধরিয়া দূরে রাখিয়া, নাদিরাকে
ছুরি মারিতে উত্ত) তবে।

নাদিরা। মর্কার আগে আমাদের একবার প্রার্থনা কর্তে দাও।

দারা। প্রার্থনা !—কার কাছে ? ঈশ্বরের কাছে ? ঈশ্বর নাই।
সব ভণ্ডামি ! ধাপ্লাবাজি ! ঈশ্বর নাই।—কৈ কৈ ! কে বলে ঈশ্বর
আছেন। আছেন ? ভালো ! কর প্রার্থনা !

নাদিরা। আয় বাছা, মর্কার আগে প্রার্থনা করি।

উভয়ে জানু পাতিয়া বসিলেন। চক্ষু মুদিত করিয়া রহিলেন

নাদিরা। দয়াময় ! বড় দুঃখে আজ তোমায় ডাকছি ! প্রভু ! দুঃখ
দিয়েছো, দিয়েছো ! তুমি যা দাও মাথা পেতে নেবো ! তবু—তবু—
মর্কার সময় যদি পুত্রকণ্ঠাকে আর স্বামীকে সুখী দেখে মর্তে পার্তাম।

দারা। (দেখিতে দেখিতে সহসা জাহ্নু পাতিয়া বসিলেন) ঈশ্বর রাজাধিরাজ ! তুমি আছো ! তুমি না থাকো ত এমন একটা বিশ্ব-জগৎকে চালাচ্ছে কে ! কোথা থেকে সে নিয়ম এলো, যার বলে এমন পবিত্র জিনিস দু'টি জগতে প্রস্ফুটিত হয়েছে—মা আর ছেলে ! ঈশ্বর ! তোমাকে অনেকবার স্মরণ করেছি ; কিন্তু এমন হুঃখে, এমন দীনভাবে, এমন কাতর হৃদয়ে, আর কখন ডাকি নি । দয়াময় ! রক্ষা কর !

গোরক্ষক ও গোরক্ষক-রমণীর প্রবেশ

গোরক্ষক । কে তোমরা ?

দারা । এ কার স্বর (চক্ষু খুলিয়া) কে তোমরা ! একটু জল দাও, একটু জল দাও !—আমায় না দাও—এই নারী আর—এই বালককে দাও—

গোরক্ষক-রমণী । আহা বেচারীরা ! আমি জল আনছি এখনি ! একটু সবুর কর বাবা !

অস্থান

গোরক্ষক । আহা ! বাছা ধুক্চে !

দারা । জহরৎ ! জহরৎ ! [মরে' গিয়েছে !]

[গোরক্ষক । না মরে নি । বাছা আমার !

দারা । জহরৎ !]

জহরৎ । (ক্ষীণস্বরে) বাবা !

গোরক্ষক-রমণী ও গোরক্ষক প্রবেশ ও জলদান এবং সকলের জলপান

গোরক্ষক-রমণী । এসো বাবা, আমাদের বাড়ী এসো ।

[গোরক্ষক । এসো বাবা !]

দারা। কে তোমরা! তোমরা কি স্বর্গের দেবতা! ঈশ্বর পাঠিয়েছেন?

গোরক্ষক। না বাবা, আমি একজন রাখাল!—এ আমার স্ত্রী।

দারা। তাদের এত দয়া! মানুষের এত দয়া! এও কি সম্ভব!

গোরক্ষক। কেন বাবা! তোমরা কি কখন মানুষ দেখ নি?

শয়তানই দেখে এসেছো?

দারা। তাই কি ঠিক? তারা কি সব শয়তান?

গোরক্ষক-রমণী। এ ত মানুষেরই কাজ বাবা। অনাথকে আশ্রয় দেওয়া, যে খেতে পায় নি তাকে খেতে দেওয়া, যে জল পায় নি তাকে জল দেওয়া—এ ত মানুষেরই কাজ বাবা। কেবল শয়তানই না করে না। যদিও তারও যে তা মাঝে মাঝে কর্তে ইচ্ছা হয় না, তা বিশ্বাস করি না, এসো বাবা।

নিষ্ক্রান্ত

চতুর্থ দৃশ্য

স্থান—মুন্সেরের দুর্গ-প্রাসাদমঞ্চ । কাল—জ্যোৎস্না রাত্রি

পিয়ারা বেড়াইয়া বেড়াইয়া গাহিতেছেন

গীত

সুখের লাগিয়া এ ঘর বাঁধিনু
অনলে পুড়িয়া গেল ।
অমিয় সাগরে সিনান করিতে
সকলি গরল ভেল ।
সখি রে কি মোর করমে লেখি ।
শাতল বলিয়া ও চাঁদ সেবিনু
ভানুর কিরণ দেখি ।

সুজার প্রবেশ

সুজা । তুমি এখানে! এদিকে আমি খুঁজে খুঁজে সারা ।

(পিয়ারার গীত চলিল) নিচল ছাড়িয়া উঁচলে উঠিতে
পড়িনু অগাধ হলে ।

সুজা । তারপরে তোমার স্বর শুনে বুঝলাম যে তুমি এখানে ।

(পিয়ারার গীত চলিল) লছমি চাহিতে দারিদ্র্য বেড়ল
মাণিক হারানু হলে ।

সুজা । শোন কথা—আঃ—

(পিয়ারার গীত চলিল) পিয়াস লাগিয়া জলদ সেবিনু
বজর পড়িয়া গেল ।

সুজা । শুনবে না? আমি চললাম !

(পিয়ারার গীত চলিল) জ্ঞানদাস কহে, কানুর পীরিতি,
মরণ অধিক শেল ।

সূজা। আঃ জ্বালাতন কর্লে ! কেউ যেন দ্বিতীয় পক্ষ বিবাহ না করে । স্বামীগুলোকে পেয়ে বসে । 'প্রথম পক্ষের হ'লে তোমাকে কি একটা কথা শোনবার জন্ত এত সাধতাম ।

পিয়ারা। আঃ আমার এমন কীর্তনটা মাটি করে' দিলে ! সংসারে কেউ যেন না দোজবরে বিয়ে করে । নৈলে কেউ এমন কীর্তনটা মাটি করে ! আঃ জ্বালাতন কর্লে । দিবারাত্রি যুদ্ধের সংবাদ শুন্তে হবে । তার উপর না জানো ব্যাকরণ, না বোঝ গান । জ্বালাতন ।

সূজা। গান বুঝি নে কি রকম !

পিয়ারা। এমন কীর্তনটা ! আহা হা হা !

সূজা। তুমি যে নিজে গেয়ে নিজেই মোহিত !

পিয়ারা। কি করি, তুমি ত বুঝবে না । তাই আমি নিজেই গায়িকা নিজেই শ্রোতা ।

সূজা। ব্যাকরণ ভুল ।

পিয়ারা। কি রকম ?

সূজা। শ্রোতা হবে না ।

পিয়ারা। (ধতমত খাইয়া) তবেই ত মাটি করেছে ।

সূজা। একটা কথা হচ্ছে এই যে সোলেমান যুদ্ধের ছুর্গ ছেড়ে চলে গিয়েছে কেন তা জানো ?

পিয়ারা। তাই ত ।

সূজা। তার বাপ দারা তাকে ডেকে পাঠিয়েছেন । অথচ এ দিকে—

পিয়ারা। তা ও রকম হয় ! অশুদ্ধ হয় নি ।

সূজা। দারা দুইবারই যুদ্ধে ঔরঞ্জীবের দ্বারা পরাজিত হয়েছেন ।

পিয়ারা। ব্যাকরণ ভুল হয়নি ।

সূজা। তুমি কথাটা শুনবে না ?

পিয়ারা। আগে স্বীকার কর যে আমার ব্যাকরণ ভুল হয় নি।

সূজা। আলবৎ হয়েছে।

পিয়ারা। আলবৎ হয়নি।

সূজা। চল—কাকে জিজ্ঞাসা করবে কর।

পিয়ারা। দেখ, আপোমে মিটাও বলছি, নৈলে আমি এই নিয়ে রসাতল করব। সারারাত এগনি চেষ্টাব যে, দেখি তুমি কেমন ঘুমাও। আপোষে মেটাও।

সূজা। তাহলে আমার বক্তব্যটা শুনবে ?

পিয়ারা। শুনবো।

সূজা। তবে তোমার ব্যাকরণ ভুল হয়নি। বিশেষ যখন তুমি দ্বিতীয় পক্ষ। এখন শোন, বিশেষ কথা আছে। গুরুতর! তোমার কাছে পরামর্শ চাই।

পিয়ারা। চাও নাকি ? তবে বোস, আমি প্রস্তুত হ'য়ে নেই। (চেহারা ও পোষাক ঠিক করিয়া লইয়া) এখানে একটা 'উঁচু' আসনও নেই ছাই। বাস্, দাঁড়িয়ে দাঁড়িয়েই শুনবো। বল। আমি প্রস্তুত।

সূজা। আমার বিশ্বাস যে পিতা মৃত।

পিয়ারা। আমারও তাই বিশ্বাস।

সূজা। জয়সিংহ আমাকে সম্রাটের যে দস্তখৎ দেখিয়েছিলেন—সে দস্তখৎ দারার জাল।

পিয়ারা। নিশ্চয়ই—

সূজা। স্বীকার করছ ?

পিয়ারা। স্বীকার আমি কিছু করছি না। ব'লে যাও।

সূজা। দ্বিতীয় যুদ্ধেও ঔরঞ্জীবের হাতে দারার পরাজয় হয়েছে, শুনেছ ?

পিয়ারা। শুনেছি।

সূজা। কার কাছে শুনে ?

পিয়ারা। তোমার কাছে।

সূজা। কখন ?

পিয়ারা। এখনই !

সূজা। দারা আগ্রা ছেড়ে পালিয়েছে। আর ঔরঞ্জীব বিজয় গর্বে আগ্রায় প্রবেশ করে' পিতাকে বন্দী করেছে, আর মোরাদকেও কারারুদ্ধ করেছে।

পিয়ারা। বটে !

সূজা। ঔরঞ্জীব এখন আমার সহিত যুদ্ধে নামবে।

পিয়ারা। খুব সম্ভব।

সূজা। আর ঔরঞ্জীবের সঙ্গে যদি আমার যুদ্ধ হয়—ত সে বেশ একটু শক্ত রকম যুদ্ধ হবে।

পিয়ারা। শক্ত বলে' শক্ত !

সূজা। আমার তার জন্মে এখন থেকেই প্রস্তুত হ'তে হয়।

পিয়ারা। তা হয় বৈকি !

সূজা। কিন্তু—

পিয়ারা। আমারও ঠিক ঐ মত—ঐ কিন্তু—

সূজা। তুমি যে কি বলছো তা আমি বুঝতে পারছি নে।

পিয়ারা। সত্যি কথা বলতে কি সেটা আমিও বড় একটা পারছি নে।

সূজা। যাক তোমার কাছে পরামর্শ চাওয়াই বৃথা।

পিয়ারা। সম্পূর্ণ।

সূজা। যুদ্ধের বিষয় তুমি কি বুঝবে ?

পিয়ারা। আমি কি বুঝবো ?

সূজা। কিন্তু এদিকে আবার একটা মুস্কিল হয়েছে।

পিয়ারা। সে মুস্কিলটা কি রকম।

সূজা। মহম্মদ ত আমায় স্পষ্ট লিখেছে যে সে আমার কন্যাকে বিবাহ করবে না।

পিয়ারা। তা কি করে' করবে ?

সূজা। কেন করবে না ? আমার কন্যার সঙ্গে তার বিবাহের সম্বন্ধ ঠিক হয়েছে। এখন কথা ফিরিয়ে নিলে কি চলে ?

পিয়ারা। ওমা তা কি চলে !

সূজা। কিন্তু সে এখন বিবাহ কর্তে চায় না।

পিয়ারা। তা ত চাইবেই না।

সূজা। লিখেছে যে তার পিতৃশত্রুর কন্যাকে সে বিবাহ করবে না।

পিয়ারা। তা কি করে' করবে !

সূজা। কিন্তু তাতে আমার মেয়ে যে এদিকে বিষম দুঃখিত হবে।

পিয়ারা। তা হবে বৈ কি ! তা আর হবে না !

সূজা। আমি যে কি করি—কিছুই বুঝতে পারছি নে।

পিয়ারা। আমিও পারছি নে।

সূজা। এখন কি করা যায় !

পিয়ারা। তাই ত !

সূজা। তোমার কাছে কোন বিষয়ে উপদেশ চাওয়া বুঝা।

পিয়ারা। বুঝেছো ? কেমন করে' বুঝলে ? হ্যাঁগা কেমন করে' বুঝলে ? কি বুদ্ধি !

সূজা। এখন কি করি ! ঔরঞ্জীবের সঙ্গে যুদ্ধ। তার সঙ্গে তার বীর পুত্র মহম্মদ। মহা সমস্যার কথা। তাই ভাবছি। তুমি কি উপদেশ দাও ?

পিয়ারা। প্রিয়তম! আমার উপদেশ শুনবে? শোন ত বলি।

সূজা। বল, শুনি।

পিয়ারা। তবে শোন, আমি উপদেশ দেই, যুদ্ধে কাজ নাই।

সূজা। কেন?

পিয়ারা। কি হবে সাম্রাজ্যে নাথ? আমাদের কিসের অভাব? চেয়ে দেখ এই শস্যশ্যামলা, পুষ্পভূষিতা, সহস্র-নির্ব্বাৰ্ব্বকত অমরাবতী— এই বঙ্গভূমি। কিসের সাম্রাজ্য। আর আমার হৃদয়-সিংহাসনে তোমায় বসিয়ে রেখেছি, তার কাছে কিসের সেই ময়ূর-সিংহাসন। [যখন আমরা এই প্রাসাদশিখরে দাঁড়িয়ে—করে কর, বক্ষ বক্ষ—বিহঙ্গমের ঝঙ্কার শুনি, ঐ গঙ্গার দিগন্ত প্রসারিত ধূসর বক্ষ দেখি, ঐ অনন্ত নীল-আকাশের উপর দিয়ে আমাদের মিলিত মুগ্ধ-দৃষ্টির নোকা ভাসিয়ে দিয়ে চলে' যাই—সেই নীলিমার এক নিভৃত প্রান্তে কল্পনা দিয়ে একটি মোহময় শান্তিময় দ্বীপ সৃষ্টি করি, আর তার মধ্যে এক স্বপ্নময় কুঞ্জে বসে' পরস্পরের দিকে চেয়ে পরস্পরের প্রাণ পান করি—তখন মনে হয় না নাথ, যে কিসের ঐ সাম্রাজ্য?] নাথ! এ যুদ্ধে কাজ নাই! হয় ত যা আমাদের নাই তা পাবো না; যা আছে তা হারাবো।

সূজা। তবেই ত তুমি ভাবিয়ে দিলে! একেই ভেবে ভেবে আমার মাথা গরম হয়েছে, তার উপর—না দারার প্রভুত্ব বরং মানতে পার্তাম। ঔরঞ্জীবের—আমার ছোট ভাইএর প্রভুত্ব—কখন স্বীকার করব না—না কখন না।

এস্থান!

পিয়ারা। তোমায় উপদেশ দেওয়া বৃথা! বীর তুমি! সাম্রাজ্যের জন্ত তুমি যদিও যুদ্ধ না কর্তে, যুদ্ধ করবার জন্ত তুমি যুদ্ধ করবে। তোমায় আমি বেশ চিনি—যুদ্ধের নামে তুমি নাচো।

পঞ্চম দৃশ্য

স্থান—দিল্লীতে দরবার-কক্ষ । কাল—প্রাতঃ

সিংহাসনারূঢ় ঔরংজীব । পার্শ্বে মীরজুমলা, শায়েরু খাঁ ইত্যাদি .

সৈন্যধ্যক্ষগণ, অমাত্যবর্গ, জয়সিংহ ও দেহরকী

সম্মুখে যশোবন্ত সিংহ

যশোবন্ত । জাঁহাপনা ! আমি এসেছিলাম—সুলতান সৃজার বিরুদ্ধে যুদ্ধে জাঁহাপনাকে আমার সৈন্য সাহায্য দিতে । কিন্তু এখানে এসে আমার আর সে প্রবৃত্তি নাই । আমি আজই যোধপুরে যাচ্ছি ।

ঔরংজীব । মহারাজ যশোবন্ত সিংহ ! আপনি নন্দ্যদায়ুধে দারার পক্ষে যুদ্ধ করেছিলেন বলে' আমার অপ্রীতিভাজন নহেন । মহারাজের রাজ-ভক্তির নিদর্শন পেলে আমরা মহারাজকে আত্মীয় বলে' গণ্য করব ।

যশোবন্ত । যশোবন্ত সিংহ জাঁহাপনার অপ্রীতিভাজন হোক কি প্রীতিভাজন হোক, তাতে তার কিছুমাত্র ষায় আসে না ! আর আমি আজ এ সভায় জাঁহাপনার দয়ার ভিখারী হ'য়ে আসি নাই ।

ঔরংজীব । তবে এখানে আসা মহারাজের উদ্দেশ্য ?

যশোবন্ত । উদ্দেশ্য একবার আপনাকে জিজ্ঞাসা করা যে, কি অপরাধে আমাদের দয়ালু সম্রাট সাজাহান আজ বন্দী ; আর কি স্বত্বে আপনি পিতা বর্তমানে তাঁর সিংহাসনে বসেছেন ।

ঔরংজীব । তার কৈফিয়ৎ কি আমায় এখন মহারাজকে দিতে হবে ।

যশোবন্ত । দেওয়া না দেওয়া আপনার ইচ্ছে ! আমি জিজ্ঞাসা কর্তে এসেছি মাত্র ।

ঔরংজীব । কি উদ্দেশ্যে ?

যশোবন্ত । জাঁহাপনার উত্তরের উপর আমার ভবিষ্যৎ আচরণ নির্ভর করছে ।

ঔরঞ্জীব । কিরূপ । কৈফিয়ৎ যদি না দিই ?

যশোবন্ত । তা হ'লে বুঝবো জাহাপনার দেওয়ার মত কৈফিয়ৎ কিছু নাই ।

ঔরঞ্জীব । আপনার বেকরূপ ইচ্ছা বুঝুন ; তাতে ঔরঞ্জীবের কিছু যায় আসে না । ঔরঞ্জীব তার কার্যাবলীর জন্য এক খোদার কাছে ভিন্ন আর কারো কাছে কৈফিয়ৎ দেয় না ।

যশোবন্ত । উত্তম ! তবে খোদার কাছেই কৈফিয়ৎ দিবেন ।

গমনোচ্ছত

ঔরঞ্জীব । দাঁড়ান মহারাজ ! আমার কৈফিয়ৎ না পেলে আপনি কি করবেন ?

যশোবন্ত । সাধ্যমত চেষ্টা কর্ব—সম্রাট সাজাহানকে মুক্ত কর্তে— এই মাত্র ! পারি, না পারি, সে স্বতন্ত্র কথা । কিন্তু আমার কর্তব্য আমি কর্ব ।

ঔরঞ্জীব । বিদ্রোহ করবেন ?

যশোবন্ত । বিদ্রোহ ! সম্রাটের পক্ষে যুদ্ধ করার নাম বিদ্রোহ নয় । বিদ্রোহ করেছেন আপনি । আমি সেই বিদ্রোহীর শাসন কর্ব—যদি পারি ।

ঔরঞ্জীব । মহারাজ, এতক্ষণ ধরে' পরীক্ষা করছিলাম যে আপনার স্পর্ধা কতদূর উঠে । পূর্বে শুনেছিলাম, এখন দেখছি—আপনি নির্ভীক—মহারাজ ! ভারতসম্রাট ঔরঞ্জীব যোধপুরাধিপতি যশোবন্ত সিংহের শত্রুতাকে ভয় করে না । সমরক্ষেত্রে আর একবার ঔরঞ্জীবের পরিচয় চান, পাবেন ।—বুঝেছি, নর্মদায়ুদ্ধে ঔরঞ্জীবের সঙ্গে মহারাজের সম্যক পরিচয় হয়নি ।

যশোবন্ত । নর্মদার যুদ্ধ জাহাপনা ! আপনি সেই জয়ের গৌরব করেন ? যশোবন্ত সিংহ অনুকম্পাভরে আপনার পথশ্রান্ত হীনবল সৈন্য

আক্রমণ করে নাই। নইলে আমার সৈন্যের শুক্র মিলিত নিশ্বাসে
ঔরঞ্জীব সসৈন্তে উড়ে যেতেন। এতখানি অলুকাপার বিনিময়ে যশোবন্ত
সিংহ ঔরঞ্জীবের শাঠ্যের জন্ত প্রস্তুত ছিল না। এই তার অপরাধ।
সেই জয়ের গৌরব কর্ছেন জাঁহাপনা!

ঔরঞ্জীব। মহারাজ যশোবন্ত সিংহ! সাবধান! ঔরঞ্জীবেরও
ধৈর্যের সীমা আছে। সাবধান।

যশোবন্ত। সত্ৰাট্! চোখ রাঙাচ্ছেন কাকে? চোখ রাঙিয়ে
জয়সিংহের মত ব্যক্তিকে শাসন ক'রে রাখতে পারেন? যশোবন্ত সিংহের
প্রকৃতি অণু ধাতু দিয়ে গড়া জানবেন! যশোবন্ত সিংহ জাঁহাপনার
রক্তবর্ণ চক্ষু আর অগ্নিময় গোলাকে সমানই তুচ্ছ জ্ঞান করে।

মীরজুমলা। মহারাজ! এ কি স্পর্ধা!

যশোবন্ত। শুক্র হও মীরজুমলা! যখন রাজায় রাজায় যুদ্ধ, তখন
বন্য-শৃগাল তাদের মধ্যে এসে দাঁড়ায় কি হিসাবে? আমরা এখনও কেউ
মরি নি। তোমাদের যুদ্ধের সময় পরে—তুমি আর এই শায়েষ্টা খাঁ—

শায়েষ্টা খাঁ ও মীরজুমলা তরবারি বাহির করিলেন ও কহিলেন—

সাবধান কাফের!

শায়েষ্টা। আজ্ঞা দিউন জাঁহাপনা!

ঔরঞ্জীব ইঙ্গিতে নিবেদন করিলেন

যশোবন্ত। বেশ জুড়ি মিলেছে—মীরজুমলা আর এই শায়েষ্টা খাঁ—
উজীর আর সেনাপতি। দুই নেমকহারাম্। যেমন প্রভু তেমনি ভৃত্য।

শায়েষ্টা। আস্পর্ধা এই কাফেরের জাঁহাপনা—যে ভারতসত্ৰাটের
সম্মুখে—

যশোবন্ত। কে ভারতের সত্ৰাট্।

শায়েষ্টা। পাদশাহা গাজী ওলমগীর!

অবগুণ্টিতা জাহানারর প্রবেশ

জাহানারা। মিথ্যা কথা। ভারতের সম্রাট ঔরঞ্জীব নয়।
ভারতের সম্রাট ^{মহম্মদ} সাহা সাজাহান।

মীরজুমলা। কে এ নারী!

জাহানারা। কে এ নারী? এ নারী সম্রাট সাজাহানের কণ্ঠা
জাহানারা (মুখ উন্মুক্ত করিলেন)—কি ঔরঞ্জীব! তোমার মুখ সহসা
ছাইয়ের মত শাদা হয়ে গেল যে!

ঔরঞ্জীব। তুমি এখানে ভগ্নী!

জাহানারা। আমি এখানে কেন—একথা ঔরঞ্জীব, আজ ঐ সিংহাসনে
ধীরভাবে বসে' মানুষের স্বরে জিজ্ঞাসা কর্তে পার্ছ? আমি এখানে এসেছি
ঔরঞ্জীব, তোমাকে মহারাজদ্রোহিতার অপরাধে অভিযুক্ত কর্তে।

ঔরঞ্জীব। কার কাছে?

জাহানারা। ঈশ্বরের কাছে। ঈশ্বর নাই ভেবেছো ঔরঞ্জীব?
শয়তানের চাকরি করে' ভেবেছো যে ঈশ্বর নাই? ঈশ্বর আছেন।

ঔরঞ্জীব। আমি এখানে বসে' সেই খোদারই ফকিরি কচ্ছি—

জাহানারা। শুরু হও ভগ্ন! খোদার পবিত্র নাম তোমার জিহ্বায়
উচ্চারণ কোরো না। জিহ্বা পুড়ে যাবে। বজ্র ও বজ্রা, ভূমিকম্প ও
জলোচ্ছ্বাস, অগ্নিদাহ ও মড়ক! তোমরা ত লক্ষ লক্ষ নিরীহ নরনারীর
ঘর উড়িয়ে পুড়িয়ে ভাসিয়ে ভেঙ্গে চুরে চলে' যাও। শুধু এদেরই
কিছু কর্তে পার না!

ঔরঞ্জীব। মহম্মদ! এ উম্মাদিনী নারীকে এখান থেকে নিয়ে
যাও। এ—রাজসভা, উম্মাদাগার নয় মহম্মদ!

জাহানারা। দেখি, এই সভাস্থলে কার সাধ্য যে সম্রাট সাজাহানের
কণ্ঠাকে স্পর্শ করে। সে ঔরঞ্জীবের পুত্রই হোক, আর স্বয়ং শয়তানই হোক।

ঔরঞ্জীব । মহম্মদ । নিরে যাও ।

মহম্মদ । মার্জনা কর্বেন পিতা । সে স্পর্ধা আমার নাই ।

যশোবন্ত । বাদশাহজাদীর প্রতি রূঢ় আচরণ আমরা সহ কর্বে না !

অন্য সকলে । কখনই না ।

ঔরঞ্জীব । সত্য বটে ! আমি ক্রোধে কি জ্ঞান হারিয়েছি । নিজের ভগ্নীর—সম্রাট্ সাজাহানের কন্যার প্রতি এই রূঢ় ব্যবহার কর্কার আজ্ঞা দিচ্ছি ! ভগ্নি, অন্তঃপুরে যাও ! এ প্রকাশ্য দরবারে, শত কুৎসিত দৃষ্টির সম্মুখে এসে দাঁড়ানো সম্রাট্ সাজাহানের কন্যার শোভা পায় না । তোমার স্থান অন্তঃপুরে ।

জাহানারা । তা জানি ঔরঞ্জীব । কিন্তু যখন একটা প্রকাণ্ড ভূমিকম্পে হর্ষ-রাজি ভেঙে পড়ে, তখন অসূর্য্যাম্পশ্বরূপা মহিলা যে—সেও নিঃসঙ্কোচে রাস্তায় এসে দাঁড়ায় । আজ ভারতবর্ষের সেই অবস্থা । আজ একটা বিরাট অত্যাচারে একটা সাম্রাজ্য ভেঙ্গে পড়েছে । এখন আর সে নিয়ম খাটে না । আজ সে অন্তায়-নীতির মহাবিপ্লব, যে ছব্বিসহ অত্যাচার—ভারতবর্ষের রঙ্গমঞ্চে অভিনীত হয়ে' যাচ্ছে, তা এর পূর্বে বুলি কুত্রাপি হয় নাই ! এত বড় পাপ, এত বড় শাঠ্য, আজ ধর্ম্মের নামে চলে যাচ্ছে । আর সৈন্যশাবকগণ শুদ্ধ অনিমেঘ নেত্রে তার পানে চেয়ে আছে । ভারতবর্ষের মানুষগুলো কি আজ শুদ্ধ চাবুকে চলেচে ? দুর্নীতির প্রাবনে কি জ্ঞায়, বিবেক, মনুষ্যত্ব—মানুষের বা কিছু উচ্চ প্রবৃত্তি—সব ভেসে গিয়েছে ? এখন নীচ স্বার্থসিদ্ধিই কি মানুষের ধর্ম্মনীতি ? সৈন্যধ্যক্ষগণ ! অমাত্যগণ ! সভাসদগণ ! তোমাদের সম্রাট্ সাজাহান জীবিত থাকতে তোমরা কি স্পর্ধায় তাঁর সিংহাসনে তাঁর পুত্র ঔরঞ্জীবকে বসিয়েছো আমি জানতে চাই ।

ঔরঞ্জীব । আমার ভগ্নী যদি এখান থেকে যেতে অস্বীকৃত্য হন,

সভাসদগণ, আপনারা বাইরে যান। সম্রাটের কণ্ঠার মর্যাদা রক্ষা করুন।

সকলে বাহিরে যাইতে উদ্ভত

জাহানারা। দাঁড়াও। আমার আজ্ঞা—দাঁড়াও। আমি এখানে তোমাদের কাছে মিথল ক্রন্দন কর্তে আসি নি! আমি নিজের কোন দুঃখও তোমাদের কাছে নিবেদন কর্তে আসি নি! আমি নারীর লজ্জা সঙ্কোচ, সম্মম ত্যাগ করে' এসেছি—আমার বৃদ্ধ পিতার জন্ত। শোন।

সকলে। আজ্ঞা করুন।

জাহানারা। আমি একবার মুখোমুখী তোমাদের জিজ্ঞাসা কর্তে এসেছি, যে তোমরা তোমাদের সেই বীর, দয়ালু, প্রজাবৎসল সম্রাট সাজাহানকে চাও? না, এই ভণ্ড পিতৃদ্রোহী, পরস্বাপহারী, ঔরঞ্জীবকে চাও? জেনো, এখনও ধর্ম লুপ্ত হয় নি। এখনও চন্দ্র সূর্য উঠছে। এখনও পিতা পুত্রের সম্বন্ধ আছে। আজ কি একদিনে একজনের পাপে তা উন্টে যাবে? তা হয় না। ক্ষমতা কি এত দৃপ্ত হয়েছে, যে তার বিজয়-হুমুভি তপোবনের পবিত্র শাস্তি লুটে নেবে? অধর্মের আম্পর্ক কি এত বেশী হয়েছে যে, সে নির্বিরোধে মেহ দয়া ভক্তির বন্ধের উপর দিয়ে তার রক্তাক্ত শকট চালিয়ে যাবে? বল। তোমরা ঔরঞ্জীবের ভয় করছ? কে ঔরঞ্জীব? তার দুই ভুজের কত শক্তি। তোমরাই তার বল। তোমরা ইচ্ছা করলে তাকে ওখানে রাখতে পারো; ইচ্ছা করলে তাকে ওখান থেকে টেনে এনে পঙ্কে নিক্ষেপ কর্তে পারো। তোমরা যদি সম্রাট সাজাহানকে এখনও ভালোবাসো, সিংহ স্ববির বলে' তাকে পদাঘাত কর্তে না চাও, তোমরা যদি মানুষ হও ত বল সম্মম "জয় সম্রাট্ সাজাহানের জয়!" দেখবে ঔরঞ্জীবের হাত থেকে রাজদণ্ড খসে পড়ে' যাবে।

সকলে। জয় সম্রাট্ সাজাহানের জয়—

জাহানারা। উত্তম তবে—

ঔরঞ্জীব। (সিংহাসন হইতে নামিয়া) উত্তম ! তবে এই মুহূর্তে আমি সিংহাসন পরিত্যাগ করিলাম ! সভাসদগণ ! পিতা সাজাহান রুগ্ন, শাসনে অক্ষম। তিনি যদি শাসনক্ষম হতেন, তা হ'লে আমার দাফিণাত্য ছেড়ে এখানে আসার প্রয়োজন ছিল না। আমি রাজ্যের রশ্মি সাজাহানের হাত থেকে নিই নাই—দারাব হাত থেকে নিয়েছি। পিতা পূর্ববৎই সুখে স্বচ্ছন্দে আগ্রার প্রাসাদে আছেন। আপনাদের যদি এই ইচ্ছা হয়, যে দারা সম্রাট হোন, বলুন আমি তাঁকে ডেকে পাঠাচ্ছি। দাবা কেন ? যদি মহারাজ যশোবন্ত সিংহ এই সিংহাসনে বসতে চান, যদি তিনি বা মহারাজ জয়সিংহ বা আর কেউ শাসনের মহাদায়িত্ব নিতে প্রস্তুত থাকেন—আমার আপত্তি নাই। একদিকে দারা, অন্যদিকে সূজা আর একদিকে মোরাদ, এই শত্রু ঘাড়ে করে' সিংহাসনে বসতে চান, বলুন।... আমার বিশ্বাস ছিল যে, আপনাদের সম্মতিক্রমে ও অনুরোধে আমি এখানে বসেছি। মনে কর্কেন না যে, এ সিংহাসন আমার পুরস্কার। এ আমার শাস্তি ! আমি আজ সিংহাসনের উপর বসে' নাই, বাকীদের স্তূপের উপর বসে' আছি। তার উপর এর জন্ত আমি মক্কায় যাবার সুখ থেকে বঞ্চিত আছি। আপনাদের যদি ইচ্ছা হয়, যে দারা সিংহাসনে বসুন, যে হিন্দুস্থান আবার অরাজক ধর্মহীন হোক ; আমি আজই মক্কায় যাচ্ছি। সে ত আমার পরম সুখ ! বলুন—

সকলে নিস্তক রহিল

ঔরঞ্জীব। এই আমি আমার রাজমুকুট সিংহাসনের পদতলে রাখলাম। আমি এ সিংহাসনে বসেছি আজ—সম্রাটের নামে—কিন্তু তাও বেশী দিনের জন্ত নয়। সাম্রাজ্যে শাস্তি স্থাপন করে' দারার বিশৃঙ্খল রাজত্বে শৃঙ্খলা এনে, পরে আপনারা ষার হাতে বলেন, তার হাতে রাজ্য

ছেড়ে দিয়ে, আমি সেই মক্কাই যেতে চাই। আমি এখানে বসে'ও সেই দিকেই চেয়ে আছি—আমার জাগ্রতে চিন্তা, নিদ্রায় স্বপ্ন, জীবনের ধ্যান—সেই মহাতীর্থের দিকেই চেয়ে আছি। আপনাদের যদি এই ইচ্ছা হয়, আমি আজই রাজ্যের রশ্মি ছেড়ে দিয়ে মক্কাই চলে' যাই। সে ত আমার পরম সৌভাগ্য। আমার জন্তু ভাববেন না। আপনারা নিজেদের দিকে চেয়ে বলুন যে পীড়ন চান, না শাসন চান? বলুন। আমি আপনাদের ইচ্ছার বিরুদ্ধে শাসনদণ্ড গ্রহণ কর্তে পারব না, আর আপনাদের ইচ্ছাক্রমেও এখানে দাঁড়িয়ে দারার উচ্ছৃঙ্খল অত্যাচার দেখতে পারব না। বলুন আপনাদের কি ইচ্ছা!—চল মহম্মদ! মক্কাই যাবার জন্তু প্রস্তুত হও—বলুন আপনাদের কি অভিপ্রায়?

সকলে। জয় সম্রাট ঔরঞ্জীবের জয়—

ঔরঞ্জীব। উত্তম! আপনাদের অভিমত জানলাম। এখন আপনারা বাইরে যান! আমার ভগ্নার, সাজাহানের কণ্ঠার অমর্যাদা করবেন না।

ঔরঞ্জীব ও জাহানারা ভিন্ন সকলের প্রস্থান

জাহানারা। ঔরঞ্জীব!

ঔরঞ্জীব। ভগ্নী!

জাহানারা। চমৎকার! আমি প্রশংসা না করে' থাকতে পারছি না। এতক্ষণ আমি বিশ্বয়ে নির্বাক হয়ে' ছিলাম; তোমার ভেঙ্কি দেখ'ছিলাম। যখন চমক ভাঙ্গ'লো, তখন সব হারিয়ে বসে' আছি।

চমৎকার!

ঔরঞ্জীব। আমি প্রতিজ্ঞা করছি, আল্লার নামে শপথ করছি, যে আমি যতদিন সম্রাট আছি, তোমার আর পিতার কোন অভাব হবে না।

জাহানারা। আবার বলি—চমৎকার!

তৃতীয় অঙ্ক

প্রথম দৃশ্য

ঔরঞ্জীব একখণ্ড পত্রিকা হস্তে লইয়া দেখিতেছিলেন

স্থান—খিজুয়ায় ঔরঞ্জীবের শিবির। কাল—রাত্রি

ঔরঞ্জীব। কিষ্টি। না গজ দিয়ে ঢেকে দেবে। আচ্ছা—না। ওঠসাই
কিস্তিতে আমার দাবা যাবে! কিন্তু—দেখি—উহঃ! আচ্ছা এই গজের
কিস্তি—চেপে দেবে। তার পর—এই কিস্তি। এই পদ। তার পর এই
কিস্তি! কোথায় যাবে! মাৎ। (সোৎসাহে) মাৎ। (পরিক্রমণ)

মীরজুমলার প্রবেশ

ঔরঞ্জীব। আমরা এ যুদ্ধে জিতেছি উজীর সাহেব!

মীরজুমলা। সে কি জাঁহাপনা!

ঔরঞ্জীব। প্রথম, কামান চালাবেন আপনি। তার পরে, আমি
হাতী নিয়ে সেই চকিত সৈন্তের উপর পড়বো। তার পরে মহম্মদের
অশ্বারোহী। এই তিন কিস্তিতে মাৎ।

মীরজুমলা। আর যশোবন্ত সিংহ?

ঔরঞ্জীব। তার উপর এবার তত নির্ভর করি না। তাকে চোখে
চোখে রাখতে হবে—আমাদের আর সূজার সৈন্তের মধ্যে; অনিষ্ট না
কর্তে পারে। তার পশ্চাতে থাকবে ^{আমাদের} কামান! আমি আর
মহম্মদ তার দুই পাশে থাকবো। বিপদের আক্রমণ হবে প্রধানতঃ
যশোবন্তের রাজপুত্র সৈন্তের উপর। তারা যুদ্ধ করে ভালো; নৈলে

পছনে তোমার কামান রৈল । তা যায়—দাবা বাক । আমরা জয়লাভ করব । তবে কাল প্রত্যুষে প্রস্তুত থাকবেন—এখন যেতে পারেন ।

মীরজুমলা । যে আজ্ঞা ।

প্রস্থান

ঔরঞ্জীব । যশোবন্ত সিংহ । এটা শুদ্ধ পরীক্ষা ।

মহম্মদের প্রবেশ

ঔরঞ্জীব । মহম্মদ ! তোমার স্থান হচ্ছে সম্মুখে, যশোবন্ত সিংহের দক্ষিণে । তুমি সব শেষে আক্রমণ করবে । শুদ্ধ প্রস্তুত থাকবে । এই দেখ নক্সা । (মহম্মদ দেখিলেন)

ঔরঞ্জীব । বুঝলে ?

মহম্মদ । হাঁ পিতা ।

ঔরঞ্জীব । আচ্ছা যাও । কাল প্রত্যুষে !

মহম্মদের প্রস্থান

ঔরঞ্জীব । সূজার লক্ষ সৈন্য অশিক্ষিত । বেশী কষ্ট পেতে হবে না বোধ হয় । একবার ছত্রভঙ্গ কর্তে পারলে হয় ।—এই যে মহারাজ !

মিলনগারের সঙ্কীর্ণ যশোবন্ত সিংহ প্রবেশ করিয়া কুর্গিশ করিলেন

ঔরঞ্জীব । মহারাজ ! আপনাকে একবার ডেকে পাঠিয়েছিলাম । আমি অনেক ভেবে সমস্ত সৈন্যের পুরোভাগে আপনাকে দিলাম ।

যশোবন্ত । আমাকে ?

ঔরঞ্জীব । তাতে আপত্তি আছে ?

যশোবন্ত । না, আপত্তি নাই ।

ঔরঞ্জীব । আপনি যে ইতস্ততঃ করছেন !

যশোবন্ত । কুমার মহম্মদ সৈন্যের পুরোভাগে থাকবেন, কথা ছিল ।

ঔরঞ্জীব । আমি মত বদলেছি । তিনি থাকবেন আপনার দক্ষিণ পাশে ।

যশোবন্ত । আর মীরজুমলা ?

ঔরঞ্জীব । আপনার পশ্চাতে । আমি আপনার বাম পাশে থাকবো !

যশোবন্ত । ও ! বুঝেচি । জাঁহাপনা আমায় সন্দেহ করেন ।

ঔরঞ্জীব । মহারাজ চতুর । মহারাজের সঙ্গে চাঁতুরী নিফল । মহারাজকে সঙ্গে এনেছি, তার কারণ এ নয়, যে মহারাজকে আমরা পরমাশ্রয়ী জ্ঞান করি । সঙ্গে এনেছি এই কারণে যে আমার অল্পপস্থিতিতে মহারাজ আগ্রায় বিভ্রাট না বাধান—সেটা বেশ জানেন বোধ হয় ।

যশোবন্ত । না অতদূর ভাবি নি । জাঁহাপনা ! আমি চতুর বলে আমার একটা অহঙ্কার ছিল । কিন্তু দেখলাম যে সে বিষয়ে জাঁহাপনার কাছে আমি শিশু ।

ঔরঞ্জীব । এখন মহারাজের অভিপ্রায় কি ?

যশোবন্ত । জাঁহাপনা ! রাজপুত জাতি বিশ্বাসঘাতকের জাতি নয় । কিন্তু আপনারা—অন্ততঃ আপনি তাদের বিশ্বাসঘাতক করে তুলছেন । কিন্তু সাবধান জাঁহাপনা ! এই রাজপুত জাতিকে ক্ষিপ্ত করবেন না ! বন্ধুত্বে রাজপুতের মত মিত্র কেউ নেই । আবার শত্রুতায় রাজপুতের মত ভয়ঙ্কর শত্রু কেউ নাই ! সাবধান !

ঔরঞ্জীব । মহারাজ ! ঔরঞ্জীবের সম্মুখে ক্রকুটি করে' কোন লাভ নাই ! যান । আমার এই আজ্ঞা । পালন করবেন ! নৈলে জানেন ঔরঞ্জীবকে !

যশোবন্ত । জানি । আর আপনিও জানেন যশোবন্ত সিংহকে ! আমি কারো ভৃত্য নই । আমি ও আজ্ঞা পালন করব না ।

ঔরঞ্জীব । মহারাজ ! নিশ্চিত জানবেন ঔরঞ্জীব কখন কাউকে ক্ষমা করে না ! বুঝে কাজ করবেন ।

যশোবন্ত । আর আপনিও নিশ্চিত জানবেন যে, যশোবন্ত সিংহ কাউকে ভয় করে না । বুঝে কাজ করবেন ।

ঔরঞ্জীব । এও কি সম্ভব !—যশোবন্ত সিংহ !

যশোবন্ত । ঔরঞ্জীব !

ঔরঞ্জীব । যদি তোমায় এই মুহূর্তে আমি বন্দী করি, তোমায় কে রক্ষা করে ?

যশোবন্ত । এই তরবারি । জেনো ঔরঞ্জীব, এই দুর্দিনেও মহারাজ যশোবন্ত সিংহের এক ইচ্ছিতে ত্রিশ সহস্র রাজপুত-তরবারি এক সঙ্গে সূর্য্যকিরণে ঝলসে উঠে ! আর এ দুর্দিনেও রাজপুত—রাজপুত !

প্রস্থান

ঔরঞ্জীব । লক্ষ্যভ্রষ্ট হয়েছি । একটু বেশী গিয়েছি । এই রাজপুত জাতটাকে আমি সম্যক চিনলাম না । এত তার দর্প ! এত অভিমান ! —চিনলাম না ।

দিলদার । চিনবেন কেমন করে জাঁহাপনা ! আপনার শাঠ্যের রাজ্যেই বাস । আপনি দেখে আসছেন শুধু জোচ্ছোরি, খোসামুদি, নেমকহারামি । তাদের বশ কর্তে আপনি পটু । কিন্তু এ আলাদা রকমের রাজ্য । এ রাজ্যের প্রজাদের কাছে প্রাণের চেয়ে মান বড় ।

ঔরঞ্জীব । হুঁ—দেখি এখনও যদি প্রতিকার কর্তে পারি । কিন্তু বোধ হচ্ছে—রোগ এখন হকিমির বাইরে !

প্রস্থান

দিলদার । দিলদার ! তুমি সেঁধিয়েছিলে সূচ হ'য়ে—এখন ফাল হয়ে না বেরোও ! আমার সেই ভয় । প্রথমে পাঠক ! তার পরে বিদুষক ! তার পর রাজনৈতিক ! তার পরে বোধ হয় দার্শনিক ! তার পর !

কথা কহিতে কহিতে ঔরঞ্জীব ও মীরজুমলার পুনঃ প্রবেশ

ঔরঞ্জীব । কেবল দেখবেন অনিষ্ট না কর্তে পারে !

মীরজুমলা । যে আজ্ঞা ।

ঔরঞ্জীব । তার চক্ষে একটা বড় বেশী রক্তবর্ণ দীপ্তি দেখেচি ! আর একেবারে প্রাণের ভয় নেই । সমস্ত রাজপুত্র জাতটাই তাই ।

মীরজুমলা । আমি দেখেছি জাঁহাপনা, যে একটা কামানের চেয়েও একটা রাজপুত্র ভয়ঙ্কর ।

ঔরঞ্জীব । দেখবেন খুব সাবধান !

মীরজুমলা । যে আজ্ঞা ।

ঔরঞ্জীব । একবার মহম্মদকে পাঠান—না, আমিই তাঁর শিবিরে যাচ্ছি ।

অস্থান

মীরজুমলা । এই যুদ্ধে ঔরঞ্জীব বেরূপ বিচলিত হয়েছেন, এর পূর্বে আমি তাঁকে এরকম বিচলিত হ'তে কখন দেখি নি !—ভা'য়ে ভা'য়ে যুদ্ধ—তাই বোধহয় ।—ওঃ ! ভা'য়ে ভা'য়ে বিবাদ কি অস্বাভাবিক ! কি ভয়ঙ্কর !

দিলদার । আর কি উত্তেজক ! এ নেশা সব নেশার চরম । উজীর-সাহেব ! আমি এইটে কোন রকমেই বুঝতে পারি না যে শত্রুতা বাড়াবার জন্য মানুষ কেন এতগুলো ধর্মের সৃষ্টি করেছিল—যখন ঘরে এত বড় শত্রু । কারণ ভাইয়ের মত শত্রু আর কেউ নয় ।

মীরজুমলা । কেন ?

দিলদার । এই দেখুন উজীরসাহেব, হিন্দু আর মুসলমান, এদের কি মেলে ? প্রথমতঃ ভগবানের দান যে এ চেহারাখানা, টেনে-বুনে ষতখানি আলাদা করা যায়, তা তারা করেছে । এরা রাখে দাড়ি

সন্মুখে—ওরা রাখে টিকি পিছনে (তাও সন্মুখে রাখবে না) । এরা পশ্চিমে মুখ ফিরিয়ে নেওয়াজ পরে, ওরা পূর্বদিকে মুখ ফিরিয়ে প্রার্থনা করে । এরা কাছা দেয় না, ওরা দেয় । এরা লেখে ডান দিক থেকে বাঁয়ে, ওরা লেখে বাঁয়ে থেকে ডাইনে ।—লেখে কি না !

মীরজুমলা । হাঁ, তাই কি ?

দিলদার । তবু হিন্দুরা মুসলমানের অধীনে এক রকম স্মৃতি আছে বলতে হবে । কিন্তু ভাই ভাইয়ের প্রভুত্ব স্বীকার করবে না ।

মীরজুমলা হাসিলেন

দিলদার । (যাইতে যাইতে) কেমন ঠিক কি না !

মীরজুমলা । (যাইতে যাইতে) হ্যাঁ ঠিক ।

নিষ্কাশ

দ্বিতীয় দৃশ্য

স্থান—খিজুয়ায় সৃজার শিবির। কাল—সন্ধ্যা

সৃজা একখানি মানচিত্র দেখিতেছিলেন। পুষ্পমালা হস্তে পিয়ারা
গাহিতে গাহিতে প্রবেশ করিলেন

পিয়ারার গীত

‘আমি সারা সকালটি বসে’ বসে’ এই মাধের মালাটি গেঁথেছি।
আমি, পরাব বলিয়ে তোমারি গলায় মালাটি আমার গেঁথেছি।
আমি, সারা সকালটি করি নাই কিছু, করি নাই কিছু বঁধু আর ;
শুধু বকুলের তলে বসিয়ে বিরলে মালাটি আমার গেঁথেছি।
তখন গাহিতেছিল সে তরুশাখা ‘পরে ফুললিত স্বরে পাপিয়া ;
তখন ছলিতেছিল সে তরুশাখা ধীরে, প্রভাত সমীরে কাপিয়া ;
তখন প্রভাতের হাসি, পড়েছিল আসি কুসুমকুঞ্জভবনে ;
আমি তারি মাঝখানে, বসিয়া বিজনে মালাটি আমার গেঁথেছি।’
বঁধু মালাটি আমার গাঁথা নহে শুধু বকুল কুসুম কুড়ায়ে ;
আছে প্রভাতের ক্রীতি সমীরণ গীতি, কুসুমে কুসুমে জড়ায়ে ;
আছে, সবার উপরে মাথা তার বঁধু তব মনুময় হাসি গো ;
ধর, গলে ফুলহার, মালাটি তোমার, তোমারই কারণে গেঁথেছি।

পিয়ারা মালাটি সৃজার গলায় দিলেন

সৃজা। (হাসিয়া) এ কি আমার ^{সুন্দর}সুন্দর মালা পিয়ারা ? আমি ত বুদ্ধে
এখনও জয়লাভ করি নি।

পিয়ারা। কি যায় আসে ! আমার কাছে তুমি চিরঞ্জয়ী। তোমার
প্রেমের কাণাগারে আমি বন্দিনী। তুমি আমার প্রভু, আমি তোমার
ক্রীতদাসী—কি আজ্ঞা হয় ? (জানু পাতিলেন)

সৃজা। এ একটা বেশ নূতন রকমের ঢং করেছে ত পিয়ারা !
আচ্ছা যাও বন্দিনী, আমি তোমায় মুক্ত করে' দিলাম ।

পিয়ারা। আমি মুক্তি চাই না। আমার এ মধুর দাসত্ব ।

সৃজা। শোনো ! আমি একটা ভাবনায় পড়েছি !

পিয়ারা। সে ভাবনাটা হচ্ছে কি ?—দেখি আমি যদি কোন উপায়
কর্তে পারি ।

সৃজা। (মানচিত্র দেখাইয়া) দেখ পিয়ারা—এইখানে মীরজুমলার
কামান, এইখানে মহম্মদের পাঁচ হাজার অশ্বারোহী, আর এইখানে
ঔরঞ্জীব ।

পিয়ারা। কৈ আমি ত শুধু একখানা কাগজ দেখছি। আর ত
কিছুই দেখতে পাচ্ছি না ।

সৃজা। এখন এইরকম ভাবে আছে। কিন্তু কাল যুদ্ধের সময় কে
কোথায় থাকবে বলা যাচ্ছে না !

পিয়ারা। কিছু বলা যাচ্ছে না ।

সৃজা। ঔরঞ্জীবের দস্তুর এই যে, যখন তার পক্ষে কামানের গোলা
বর্ষণ হয়, তার ঠিক পরেই সে ঘোড়া ছুটিয়ে এসে আক্রমণ করে ।

পিয়ারা। বটে ! তা হ'লে ত বড় সহজ কথা নয় ।

সৃজা। তুমি কিছু বোঝো না ।

পিয়ারা। ধ'রে ফেলেছো !—কেমন করে' জানলে ; হাঁ গা—বল না
কেমন করে জানলে ? আশ্চর্য্য ! একেবারে ঠিক ধরেছো !

সৃজা। আমার সৈন্ত অশিক্ষিত । যদি যশোবন্ত সিংহকে ডজাতে
পারি—একবার লিখে দেখবো ! কিন্তু—আচ্ছা তুমি কি উপদেশ দেও !

পিয়ারা। আমি তোমাকে উপদেশ দেওয়া ছেড়ে দিয়েছি ।

সৃজা। কেন ?

পিয়ারা। কেন! তোমায় উপদেশ দিলে ত তুমি তা কখন শোনো না। আমি তোমায় বেশ জানি। তুমি বিষম একশুঁয়ে। আমাকে আমার মত জিজ্ঞাসা কর বটে, কিন্তু তোমার বিপরীত মত দিলেই চটে' যাও।

সূজা। তা—হাঁ—তা—বাই বটে।

পিয়ারা। তাই সেই থেকে, স্বামী যা বলেন তাতেই আমি পতিব্রতা হিন্দু স্ত্রীর মতন হ' হাঁ দিয়ে সেরে দিই।

সূজা। তাই ত। দোষ আমারই বটে। পরামর্শ চাই বটে, কিন্তু অমুকুল পরামর্শ না দিলেই চটে' বাই।—ঠিক বলেছো! কিন্তু শোধরাবারও উপায় নেই।

পিয়ারা। না। তোমার উদ্ধারের উপায় থাকলে আমি তোমায় উদ্ধার কর্তাম। তাই আমি আর সে চেষ্টাও করি নে। আপন মনে গান গাই।

সূজা। তাই গাও। তোমার গান যেন সূরা। শত ^{হুঃখে} শত বন্ত্রণা ভুলিয়ে দেয়। কঠিন ঘটনার রাজ্য থেকে উড়িয়ে নিয়ে যায়। তখন আমার বোধ হয় যেন একটা ঝঙ্কার আশ্রয় ঘিরে রয়েছে। আকাশ, মর্ত্য—আর কিছুই দেখতে পাই না। গাও—কাল যুদ্ধ। সে অনেক দেরি! যা হবার তাই হবে। গেয়ে যাও।

পিয়ারা। তবে তা শুন্বার আগে এই পূর্ণজ্যোৎস্নালোকে তোমার মনকে স্নান করিয়ে নাও। তোমার বাসনাপুষ্পগুলিকে শ্রেমচন্দনে মাখিয়ে নাও—তার পরে আমি গান গাই—আর তুমি তোমার সেই পুষ্পগুলি আমার চরণে দান কর!

সূজা। হাঃ! হাঃ! হাঃ! তুমি বেশ বলেছো—যদিও আমি তোমার উপমার ঠিক রসগ্রহণ কর্তে পারলাম না।]

পিয়ারা। চুপ্! আমি গান গাই, তুমি শোনো। প্রথমতঃ এই জায়গাটায় হেলান দিয়ে—এই রকম বোসো। তার পরে হাতটা এই জায়গায় এই রকম ভাবে রাখো। তার পরে চোখ বোজো—যেমন খুঁটানেরা প্রার্থনা করবার সময় চোখ বোজে—মুখে যদিও বলে অক্ষকার থেকে আলোকে নিয়ে যাও—কিন্তু কার্যতঃ যেটুকু ঈশ্বরের আলো পাচ্ছিল, চোখ বুজে তাও অক্ষকার করে ফেলে।

সূজা। হাঃ! হাঃ! হাঃ! তুমি অনেক কথা বল বটে, কিন্তু যখন এই বকধাশ্মিকদের ঠাট্টা কর, তখন যেমন মিষ্টি লাগে—কারণ আমি কোন ধর্মই মানি নে।

পিয়ারা। ব্যাকরণ ভুল। যেমন বল্লই একটা তেমন বলা চাই—

সূজা। দারা হিন্দুধর্মের পক্ষপাতী—ভণ্ড। ঔরঞ্জীব গোঁড়া মুসলমান—ভণ্ড। মোরাদও মুসলমান—গোঁড়া নয়—ভণ্ড।

পিয়ারা। আর তুমি কোন ধর্মই মান না—ভণ্ড।

সূজা। কিসে?—আমি কোন ধর্মেরই ভান করি নে। আমি সোজাসুজি বলি যে, আমি সম্রাট হতে চাই।

পিয়ারা। এইটেই ভণ্ডামি।

সূজা। ভণ্ডামি কিসে! আমি দারার প্রভু স্বীকার কর্তে রাজি ছিলাম। কিন্তু আমি ঔরঞ্জীব আর মোরাদের প্রভু মানতে পারি নে। আমি তাদের বড় ভাই।

পিয়ারা। ভণ্ডামি—বড় ভাই হওয়া ভণ্ডামি।

সূজা। কিসে? আমি আগে জন্মেছিলাম।

পিয়ারা। আগে জন্মানো ভণ্ডামি। আর আগে জন্মানোতে তোমার নিজের কোন বাহাছুরী নেই। তার দরুণ তুমি সিংহাসন বেশী দাবী কর্তে পারো না।

সূজা। কেন ?

পিয়ারা। আমাদের বাবুর্চি ঐ রহমৎউল্লা তোমার অনেক আগে
জন্মেছে। তবে তোমার চেয়ে সিংহাসনের উপর তার দাবী বেশী।

সূজা। সে ত আর সম্রাটের পুত্র নয়।

পিয়ারা। হতে কতক্ষণ !

সূজা। হাঃ ! হাঃ ! হাঃ ! তুমি ঐ রকম তর্ক করবে ? না, তুমি
গান গাও—বা পাবো !

পিয়ারার গীত

তুমি বাঁধিয়া কি দিয়ে রেখেছো হৃদি এ,

(আমি) পারি না যেতে ছাড়ায়ে ;

এ যে বিচিত্র নিগূঢ় নিগড় মধুর—

(কি) প্রিয় বাঞ্ছিত কারা এ ।

এ যে, চলে যেতে বাজে চরণে

এ যে বিরহে বাজে স্মরণে

কোথা যায় মিলিয়া সে মিলনের হানে,

চূষনের পাশে হারায়ে ।

সূজা। পিয়ারা ! ঈশ্বর তোমাকে তৈরি করেছিলেন কেন ?—ঐ
রূপ, ঐ রসিকতা, ঐ সঙ্গীত ; এমন একটা ব্যাপার ঈশ্বর এই কঠিন
মর্ত্যভূমে তৈরি করেছিলেন কেন ?

পিয়ারা। তোমার জন্ত প্রিয়তমে ।

তৃতীয় দৃশ্য

স্থান—আমেদাবাদ । দারার শিবির । কাল—রাত্রি

দারা ও নাদিরা

দারা । আশ্চর্য্য ! যে দারা একদিন সেনাপতি নরপতির উপবে
হুকুম চালাত, সে নগর হ'তে নগরে প্রতাড়িত হ'য়ে আজ পরের ছয়ারে
ভিখারী ; আর তার ছয়ারে ভিখারী, যে ঔরঞ্জীবের আর মোরাদের
শত্রু । এত নীচে নেমে যেতে হবে তা ভাবি নি ।

নাদিরা । পুত্র সোলেমানের খবর পেয়েছ কিছু ?

দারা । তার খবর সেই এক । মহারাজ জয়সিংহ তাকে পরিত্যাগ
করে' সৈন্যে ঔরঞ্জীবের সঙ্গে যোগ দিয়েছে । বেচারী পুত্র জনকতক
অবশিষ্ট সঙ্গীমাত্র নিয়ে (তাকে আর সৈন্য বলা যায় না) হরিদ্বারের
পথে লাগেয়ে আমার উদ্দেশে আসছিল । পথে ঔরঞ্জীবের এক সৈন্যদল
তাকে শ্রীনগরের প্রান্তে তাড়িয়ে নিয়ে যায় । সোলেমান এখন
শ্রীনগরের রাজা পৃথ্বাসিংহের দ্বারে ভিখারী । কি নাদিরা কঁাদছ ?

নাদিরা । না প্রভু !

দারা । না, কঁাদো । কিছু সাহুনা পাবে ।—যদি কঁাদতেও পার্তাম !

নাদিরা । আবার ঔরঞ্জীবের সঙ্গে যুদ্ধ করবে ?

দারা । করব । যতদিন এ দেহে প্রাণ আছে, ঔরঞ্জীবের প্রভুত্ব
স্বীকার করব না । যুদ্ধ করব । সে আমার বৃদ্ধ পিতাকে কারাকুদ্ধ করে'
তাঁর সিংহাসন অধিকার করেছে ; আমি যতদিন না পিতাকে কারামুক্ত
কর্তে পারি, যুদ্ধ করব । কি নাদিরা ! মাথা হেঁট করলে যে ! আমার
এ সঙ্কল্প তোমার পছন্দ হ'চ্ছে না !—কি করব !

নাদিরা। না নাথ ! তোমার ইচ্ছাই আমার ইচ্ছা, তবে—

দারা। তবে ?

নাদিরা। নাথ ! নিত্য এই আতঙ্ক, এই প্রয়াস, এই পলায়ন কেন ?

দারা। কি কর্কে বল, যখন আমার হাতে পড়েছো তখন সৈতে হবে বৈকি ?

নাদিরা। আমি আমার জন্ম বলছি না প্রভু ! আমি তোমারই জন্ম বলছি। একবার আয়নায় নিজের চেহারাখানি দেখ দেখি নাথ— এই অস্থিসার দেহ, এই নিশ্চল দৃষ্টি, এই শুভ্রায়িত কেশ—

দারা। আজ যদি আমার এ চেহারা তোমার পছন্দ না হয়—কি কর্কে !

নাদিরা। আমি কি তাই বলছি !

দারা। তোমাদের জাতির স্বভাব ! তোমাদের কি ! তোমরা কেবল অনুযোগ কর্তে পারো। তোমরা আমাদের সুখে বিষ, দুঃখে বোঝা !

নাদিরা। (ভগ্নস্বরে) নাথ ! সত্যই কি তাই ! (হস্তধারণ)

দারা। যাও ! এ সময়ে আর নাকি সুর ভালো লাগে না ।

হাত ছাড়াইয়া প্রস্থান

নাদিরা। (কিছুক্ষণ চক্ষু বস্ত্র দিয়া রহিলেন। পরে গাঢ়স্বরে কহিলেন) দয়াময় আর কেন !—এইখানে যবনিকা ফেলে দাও ! সাম্রাজ্য হারিয়েছি, প্রাসাদ সম্ভোগ ছেড়ে এসেছি ; পথে—রোদ্রে, শীতে, অনশনে, অনিদ্রায় কতদিন কাটিয়েছি ; সব হেসে সহ্য করেছি, কারণ স্বামীর সোহাগ হারাই নাই।—কিন্তু আজ—(কর্ণরুদ্ধ হইল) তবে আর কেন ! আর কেন ! সব সইতে পারি, শুধু এইটে সইতে পারি নে। (ক্রন্দন)

সিপারের প্রবেশ

সিপার। মা—এ কি ? তুমি কাঁদছ মা !

নাদিরা। না বাবা আমি কাঁদছি না—ওঃ, সিপার ! সিপার !

(ক্রন্দন)

সিপার কাছে আসিয়া নাদিরার গলদেশে হাত দিয়া

চক্ষের বস্ত্র সরাইতে গেলেন

সিপার। মা কাঁদছে কেন ? কে তোমার হৃদয়ে আঘাত দিয়েছে
আমি তাকে কখনও ক্ষমা করবো না—আমি তাকে—

এই বলিয়া সিপার নাদিরার গলদেশে জড়াইয়া তাঁহার বক্ষে মুখ লুকাইয়া কাঁদিতে
লাগিল। নাদিরা তাহাকে বক্ষে চাপিয়া ধরিলেন

জহরৎ উগ্রিসার প্রবেশ

জহরৎ। এ কি !—মা কাঁদছে কেন, সিপার ?

নাদিরা। না জহরৎ ! আমি কাঁদছি না।

জহরৎ। মা ! তোমার চক্ষে জল ত কখন দেখি নাই। জ্যোৎস্নার
মত—রাত্রি বত গভীর, তোমার হাসিটি তত উজ্জ্বল দেখেছি ! অনশনে
অনিদ্রায় চেয়ে দেখেছি, যে তোমার অধরে সে হাসিটি দুর্দিনে বন্ধুর মত
লেগেই আছে—আজ এ কি মা !

নাদিরা। এ যন্ত্রণা বাক্যের অতীত জহরৎ। আজ আমার দেবতা
বিমুখ হয়েছেন !

দারার পুনঃপ্রবেশ

দারা। নাদিরা ! আমায় ক্ষমা কর ! আমার অপরাধ হয়েছে ?
বাহিরে গিয়েই বুঝতে পেরেছি।—নাদিরা !

নাদিরা প্রবলতর বেগে কাঁদিতে লাগিলেন

দারা। নাদিরা ! আমি অপরাধ স্বীকার করছি ! ক্ষমা চাচ্ছি।

তবু—ছিঃ ! নাদিরা যদি জান্তে, যদি বুঝতে যে এ অস্তরে কি জ্বালা, দিবাবাত্র জ্বলছে—তা হ'লে আমার এই অপবাধ নিতে না।

নাদিরা। আব তুমি যদি জান্তে প্রিয়তম, যে আমি তোমায় কত ভালোবাসি, তা হ'লে এত কঠিন হ'তে পার্তে না!

সিপার। (অক্ষুটস্ববে) তোমায় যে আমি দেবতার মত ভক্তি কবি বাবা !

নাদিবা। বৎস। তোমাব বাবা আমায় কিছু বলেন নি !
আমি বড বেষা অভিমানিনী—আমারই দোষ।

বাঁদির প্রবেশ

বাঁদি। বাঁহিরে একজন নোক ডাকছেন, খোদাবন্দ।

দাবা। কে তিনি ?

বাঁদি। শুনলাম তিনি গুজ্বাটের সুবাদাব।

দাবা। সুবাদাব এসেছেন ?

নাদিবা। আমি ভিতরে যাই।

প্রস্থান

দাবা। তাকে এখানেই নিষে এসো সিপাব !

বাঁদির সহিত সিপারের প্রস্থান

দারা। দেখা যাক—যদি আশ্রয় পাই।

সাহা নাবাজ ও সিপারের প্রবেশ

সাহা নাবাজ। বন্দেগি সুবরাজ !

দারা। বন্দেগি সুলতান সাহেব !

সাহা নাবাজ। জাঁশাপনা আমায় স্মরণ করেছেন ?

দারা। হাঁ সুলতানসাহেব ! আমি একবার আপনার সাক্ষাৎ
চয়েছিলাম !

সাহা নাবাজ । আজ্ঞা করুন !

দারা । আজ্ঞা কর্ব ! সে দিন গিয়েছে সুলতানসাহেব ; আজ ভিক্ষা কর্তে এসেছি । আজ্ঞা কর্ব এখন—ঔরঞ্জীব ।

সাহা নাবাজ । ঔরঞ্জীব ! তার আজ্ঞা আমার জন্ম নয় ।

দারা । কেন সুলতানসাহেব ! আজ ঔরঞ্জীব ভারতের সম্রাট ।

সাহা নাবাজ । ভারতের সম্রাট ঔরঞ্জীব ? যে স্বার্থত্যাগের মুখোস পরে' বৃদ্ধ পিতার বিপক্ষে যুদ্ধ করে, মেহের মুখোস পরে' ভাইকে বন্দী করে, ধর্মের মুখোস পরে' সিংহাসন অধিকার করে—সে সম্রাট ? আমি বরং এক অন্ধ পশুকে সেই সিংহাসনে বসিয়ে তাকে সম্রাট বলে' অভিবাদন কর্তে রাজি আছি ; কিন্তু ঔরঞ্জীবকে নয় ।

দারা । সে কি সুলতানসাহেব ! ঔরঞ্জীব আপনার জামাতা ।

সাহা নাবাজ । ঔরঞ্জীব যদি আমার জামাতা না হ'য়ে আমার পুত্র হোত, আর সেই পুত্র আমার একমাত্র সন্তান হোত ত আমি তার সঙ্গে সম্বন্ধ ত্যাগ কর্তাম ! অধর্মকে কখন বরণ কর্তে পারি না—আমার জীবন থাকতে না ।

দারা । কি কর্বেন স্থির করেছেন ?

সাহা নাবাজ । যুবরাজ দারার পক্ষে যুদ্ধ কর্ব । পূর্ব থেকেই তার জন্ম প্রস্তুত হচ্ছি । আমার এই সামান্য সৈন্ত দিয়ে ঔরঞ্জীবের সঙ্গে যুদ্ধ করা অসম্ভব । তাই আমি সৈন্ত সংগ্রহ করছি ।

দারা । কি রকমে ?

সাহা নাবাজ । মহারাজ যশোবন্ত সিংহের কাছে সাহায্য ভিক্ষা করে' পাঠিয়েছি ।

দারা । তিনি সাহায্য কর্তে স্বীকৃত হয়েছেন ?

সাহা নাবাজ । হয়েছেন ।—কোন ভয় নাই সাহাজাদা । আসুন

—আপনি আজ আমার অতিথি সম্রাটের জ্যেষ্ঠপুত্র। আপনি তাঁর মনোনীত সম্রাট। আমি একজন বৃদ্ধ রাজভক্ত প্রজা। বৃদ্ধ সম্রাটের জ্ঞান যুদ্ধ করব। জয়লাভ না কর্তে পারি, প্রাণ দিতে পারব! বৃদ্ধ হয়েছি। একটা পুণ্য করে' পাথের কিছু সংগ্রহ করে' নিয়ে যাই।

দারা। তবে আপনি আমার আশ্রয় দিচ্ছেন?

সাহা নাবাজ। আশ্রয় যুবরাজ! আজ থেকে আমার বাড়ী আপনার বাড়ী। আমি যুবরাজের ভৃত্য।

দারা। আপনি অতি মহৎ ব্যক্তি।

সাহা নাবাজ। সাহাজাদা! আমি মহৎ নই—আমি একজন মানুষ। আর আমি আজ যা করছি, একটা মহা স্বার্থত্যাগ করছি যে তা মানি না। সাহাজাদা! আজ আমি এত বৃদ্ধ হয়েছি—সাহস করে' বলতে পারি যে, জেনে অধর্ম্য করি নি। কিন্তু ভাল কাজও বড় একটা করিনি। আজ যদি সুযোগ পেয়েছি—ছাড়বো কেন?

উভয়ের নিজস্ব

জহরৎ টম্বিসার পুনঃ প্রবেশ

জহরৎ। এত তুচ্ছ আমার অকর্মণ্য আমি। পিতার কোন কাজেই লাগি না। শুধু একটা বোঝা!—হা রে অধম নারীজাতি! পিতামাতার এই অবস্থা দেখছি, কিছু কর্তে পারছি না। মাঝে মাঝে কেবল উষ্ণ অশ্রুপাত।—কিন্তু আমি যাহোক একটা কিছু করব, একটা কিছু—বা পর্বত শিখর হ'তে ঝম্পের মত অসমসাহসিক—তার মত ভয়ঙ্কর।—দেখি।

চতুর্থ দৃশ্য

স্থান—কাশ্মীরের মহারাজা পৃথ্বাসিংহের প্রমোদোদ্যান । কাল—সন্ধ্যা

সোলেমান একাকী

সোলেমান । এলাহাবাদ থেকে পালিয়ে শেষে এই দূর পার্বত্য কাশ্মীরে আসতে হ'লো । পিতার সাগায্যে বেরিয়েছিলাম । নিষ্ফল হয়েছি ।—সুন্দর এই দেশ ।—যেন একটা কুসুমিত সঙ্গীত, একটা চিত্রিত স্বপ্ন, একটা অলস সৌন্দর্য্য । স্বর্গের একটি অপ্সরা যেন মর্ত্যে নেমে এসে, ভ্রমণে শ্রান্ত হ'য়ে, পা ছড়িয়ে হিমালয়ের গায়ে হেলে, বাম করতলে কপোল রেখে, নীল-আকাশের দিকে চেয়ে আছে । এ কি সঙ্গীত !

দূরে সঙ্গীত

সোলেমান । এ যে ক্রমেই কাছে আসছে । ঐ যে একখানি সজ্জিত নৌকায় কয়টি সজ্জিতা নারী নিজেরাই নৌকা বেয়ে গাইতে গাইতে আসছে ।—কি সুন্দর ! কি মধুর !

একখানি সজ্জিত তরলীর উপর সজ্জিতা রমণীদিগের প্রবেশ ও গীত

বেলা ব'য়ে যায়—

ছোট মোদের পান্সীতরী সঙ্গতে কে যাবি আয় ।

দোলে হার—বকুল যুখী দিয়ে গাঁথা সে,

রেশমী পাইলে উড়ছে মধুর মধুর বাতাসে ;

হেলুছে তরী হুলুছে তরী—ভেসে যাচ্ছে দরিয়ায় !

যাত্রী সব নুতন প্রেমিক, নুতন প্রেমে ভোর ;

মুখে সব হাসির রেখা, চোখে ঘুমের ঘোর,

বাণীর ধনি, হাসির ধনি উঠছে ছুটে কোয়ারায় ।

পশ্চিমে জ্বলছে আকাশ সাজের তপনে ;
পূর্বে ঐ বুনছে চন্দ্র মধুর স্বপনে ;
কছেঁ নদী কুলুধনি, বইছে মৃদু মধুর বায় ।

১ম নারী । সুন্দর বুবা ! কে আপনি ?

সোলেমান । আমি দারা সেকোর পুত্র সোলেমান ।

১ম নারী । সম্রাট সাজাহানের পুত্র দারা সেকো । তাঁর পুত্র আপনি !

সোলেমান । হাঁ আমি তাঁর পুত্র ।

১ম নারী । আর আমি কে, তা যে জিজ্ঞাসা করছ না সোলেমান ? আমি কাশ্মীরের প্রধানা নর্তকী—রাজার প্রিয়সী গণিকা । এরা আমার সহচরী !—এসো আমাদের সঙ্গে নোকায় ।

সোলেমান । তোমার সঙ্গে ? হায় হতভাগিনী নারা । কি জন্তু ?

১ম নারী । সোলেমান ! তুমি এত শিশু নও কিছু ! তুমি আমাদের ব্যবসারূতি ত জানো ।

সোলেমান । জানি ! জানি বলেই ত আমার এত অনুকম্পা । এ রূপ, এ যৌবন কি ব্যবসার সামগ্রী ? রূপ—শরীর, ভালোবাসা তার প্রাণ । প্রাণহীন শরীর নিয়ে কি করব নারী ?

১ম নারী । কেন ! আমরা কি ভালোবাসতে জানি না ?

সোলেমান । শিথবে কোথা থেকে বল দেখি ! বারা রূপকে পণ্য করেছে, যারা হাসিটি পর্য্যন্ত বিক্রয় করে—তারা ভালোবাসবে কেমন করে ? ভালোবাসা যে কেবল দিতে চায়—সে যে ত্যাগীর সুখ—সে সুখ তোমরা কি করে বুঝবে মা !

১ম নারী । তবে আমরা কি কখন ভালোবাসি না ?

সোলেমান । বাসো—তোমরা ভালোবাসো কিংখাবের পাগড়ি,

হীরার আংটি, কার্পেটের জুতো, হাতীর দাঁতের ছড়ি। তোমরা হৃদমদ ভালোবাসতে পারো—কোকড়া চুল, পটলচেরা চোখ, সরল নামা, সরল অধর। আমার এই গৌরবর্ণ চেহারাখানি দেখেছো, কিংবা আমি সম্রাটের পোত্র শুনেছো, বুঝি তাই মুগ্ধ হয়েছো। এ ত ভালোবাসা নয়। ভালোবাসা হয় আত্মায় আত্মায়।—যাও মা।

২য় নারী। ঐ রাজা আসছেন।

১ম নারী। আজ এ হেন অসময়ে?—চল।—বৃবক! এর প্রতিফল পাবে।

সোলেমান। কেন ক্রুদ্ধ হও মা? তোমাদের প্রতি আমার কোন ঘৃণা বিদ্বেষ নেই! কেবল একটা অমুকম্পা—অসীম—অতলম্পর্শ।

গাইতে গাইতে নারীগণের প্রস্থান

সোলেমান। কি আশ্চর্য্য—ঐ অপার্থিব রূপ, নয়নের ঐ জ্যোতি, অপরাসম্ভব গঠন, ঐ কিম্বর-কণ্ঠ—এত সুন্দর—কিন্তু এত কুৎসিত!

পরিক্রমণ

শ্রীনগরের রাজা পৃথ্বীসিংহের প্রবেশ

রাজা। ছিঃ কুমার!

সোলেমান। কি মহারাজ?

রাজা। আমি তোমাকে নিরাশ্রয় দেখে আশ্রয় দিয়েছিলাম, আর যথাসম্ভব সুখেও রেখেছিলাম। তোমার জন্তু ঔরংজীবের সৈন্যের সঙ্গে যুদ্ধ করেছি।

সোলেমান। আমি তা কখনও অস্বীকার করি নাই মহারাজ!

রাজা। এখনও সায়েস্তা খাঁ তোমাকে ধরিয়ে দেবার জন্তে সম্রাটের পক্ষ হ'য়ে অনেক অহুন্নয় কর্ছিলােন, প্রলোভন দেখাচ্ছিলে। আমি তবু স্বীকৃত হই নি।

সোলেমান । আপনার কাছে আমি কৃতজ্ঞ ।

রাজা । কিন্তু তুমি এত অশুদার, লঘুচিত্ত, উচ্ছৃঙ্খল, তা জাহানাম না ।

সোলেমান । সে কি মহারাজ !

রাজা । আমি তোমাকে আমার বহিরুদ্যান বেড়াবার জন্ত ছেড়ে দিয়েছি ; কিন্তু তুমি যে তা ছেড়ে আমার প্রমোদ-উদ্যানে প্রবেশ করে' আমার রক্ষিতার সঙ্গে হাস্যালাপ কর্বে, তা কখন ভাবি নাই !

সোলেমান । মহারাজ ! আপনি ভুল বুঝেছেন—

রাজা । তুমি সুন্দর, যুবা রাজপুত্র । কিন্তু তাই বলে'—

সোলেমান । মহারাজ । মহারাজ—আমি—

রাজা । বাও, যুবরাজ । কোন দোষক্ষালনের চেষ্টা নিষ্ফল ।

উভয়ে বিপরীত দিকে নিজ্জান্ত

পঞ্চম দৃশ্য

স্থান—এলাহাবাদে ঔরঞ্জীবের শিবির। কাল—রাত্রি

ঔরঞ্জীব একাকী

ঔরঞ্জীব। কি অসমসাহসিক এই মহারাজ যশোবন্ত সিংহ ? খিজুয়া বুক্কেত্রে শেষ রাত্রে আমার মহিলাশিবির পর্যন্ত লুণ্ঠন করে' একটা জলোচ্ছ্বাসের মত আমার সৈন্তের উপর দিয়ে চলে' গেল!—অদ্ভুত ! যা হোক, সূজার সঙ্গে এ বুদ্ধে জয়ী হয়েছি!—কিন্তু ওদিকে আবার মেঘ করে' আসছে। আর একটা ঝড় উঠবে। সাহা নাবাজ আর দারা—সঙ্গে যশোবন্ত সিংহ। ভয়ের কারণ আছে। যদি—না তা করি না। এই জয়সিংহকে দিয়েই কর্তে হবে।—এই যে মহারাজ !

মহারাজ জয়সিংহের প্রবেশ

জয়সিংহ। জাঁহাপনা আমাকে স্বরণ করেছিলেন ?

ঔরঞ্জীব। হাঁ, আমি এতক্ষণ ধরে' আপনার প্রতীক্ষা করছিলাম।

আমুন—উঃ বিষম গরম পড়েছে।

জয়সিংহ। বিষম গরম ! কি রকম একটা ভাপ উঠছে যেন।

ঔরঞ্জীব। আমার সর্বাঙ্গে আগুনের ফুঙ্কি উড়ে যাচ্ছে। আপনার শরীর ভালো আছে ?

জয়সিংহ। জাঁহাপনার মেহেরবানে—বান্দা ভালো আছে !

ঔরঞ্জীব। দেখুন মহারাজ ! আমি কাল প্রত্যবে দিল্লী ফিরে যাচ্ছি, আপনিও আমার সঙ্গে ফিরে যাচ্ছেন কি ?

জয়সিংহ। যেরূপ আজ্ঞা হয়—

ঔরঞ্জীব। আমার ইচ্ছা যে আপনি আমার সঙ্গে যান।

জয়সিংহ । যে আচ্ছা, আমি অষ্টপ্রহরই প্রস্তুত । জাঁহাপনার আচ্ছা পালন কারাই আনন্দ ।

ঔরঞ্জীব । তা জানি মহারাজ ! আপনার মত বন্ধু সংসারে বিরল । আর আপনি আমার দক্ষিণ হস্ত ।

জয়সিংহ সেলাম করিলেন

ঔরঞ্জীব । মহারাজ ! অতি দুঃখের বিষয়, বে মহারাজ যশোবন্ত সিংহ আমার ভাণ্ডার শিবির লুট ক'রেই ক্ষান্ত নহেন । তিনি বিদ্রোহী সাহা নাবাজ আর দারার সঙ্গে যোগ দিয়েছেন ।

জয়সিংহ । তাঁর বিমূঢ়তা ।

ঔরঞ্জীব । আমি নিজের জন্ত দুঃখিত নহি । মহারাজই নিজের সর্কনাশকে নিজের ঘরে টেনে আনছেন ।

জয়সিংহ । অতি দুঃখের বিষয় !

ঔরঞ্জীব । বিশেষ, আপনি তাঁর অন্তরঙ্গ বন্ধু । আপনার খাতিরে তাঁর অনেক উদ্ধত ব্যবহার মার্জনা করেছি । এমন কি তাঁর শিবির লুণ্ঠনব্যাপারও মার্জনা কর্তে প্রস্তুত আছি—শুদ্ধ আপনার খাতিরে—যদি তিনি এখনও নিরস্ত হ'ন ।

জয়সিংহ । আমি কি একবার তাঁর সঙ্গে সাক্ষাৎ করে' বলবো ?

ঔরঞ্জীব । বললে ভালো হয় । আমি আপনার জন্ত চিন্তিত । তিনি আপনার বন্ধু বলে' আমি তাঁকে আমার বন্ধু কর্তে চাই । তাঁকে শাস্তি দিতে আমার বড় কষ্ট হবে ।

জয়সিংহ । আচ্ছা, আমি একবার বুঝিয়ে বলছি !

ঔরঞ্জীব । হাঁ বলবেন । আর এ কথাও জানাবেন বে, তিনি এ যুদ্ধে যদি কোন পক্ষই না নেন ত আপনার খাতিরে তাঁর সব অপরাধ

মার্জনা কর্ব, আর তাঁকে গুর্জর সুবা দান কর্তে পর্যন্ত প্রস্তুত আছি—
শুদ্ধ আপনার খাতিরে জান্বেন।

জয়সিংহ। জাঁহাপনা উদার।—আমি তাঁকে নিশ্চিত রাজি কর্তে
পার্কো।

ঔরঞ্জীব। দেখুন—তিনি আপনার বন্ধু। আপনার উচিত তাঁকে
রক্ষা করা!

জয়সিংহ। নিশ্চয়ই।

ঔরঞ্জীব। তবে আপনি এখন আসুন মহারাজ! দিল্লী যাত্রা
কর্বার জন্তে প্রস্তুত হোন!

জয়সিংহ। যে আজ্ঞে।

এস্থান

ঔরঞ্জীব। ‘শুদ্ধ আপনার খাতিরে।’ অভিনয় মন্দ করি নাই!
এই রাজপুত্র জাতি বড় সরল, আর ঔদার্য্যে বশ! আমি সে বিগাটাও
অভ্যাস করছি। বড় ভয়ঙ্কর এ যোগ। সাহা নাবাজ আর যশোবন্ত
সিংহ।—আমি কিন্তু প্রধান আশঙ্কা করছি এই মহম্মদকে। তার চেহারা
—(ঘাড় নাড়িলেন) কম কথা কয়। আমার প্রতি একটা অবিখ্যাসের
বীজ তার মনে কে বপন করে’ দিয়েছে। জাহানারা কি?—এই যে
মহম্মদ।

মহম্মদের প্রবেশ

মহম্মদ। পিতা আমায় ডেকে ছিলেন?

ঔরঞ্জীব। হাঁ, আমি কাল রাজধানীতে ফিরে যাচ্ছি, তুমি সূজার
অনুসরণ করবে। মীরজুমলাকে তোমার সাহায্যে রেখে গেলাম।

মহম্মদ। যে আজ্ঞে পিতা।

ঔরঞ্জীব। আচ্ছা যাও। দাঁড়িয়ে রইলে যে! সে বিষয়ে কিছু
বলবার আছে?

মহম্মদ । না পিতা । আপনার আজ্জাই যথেষ্ট ।

ঔরঞ্জীব । তবে ?

মহম্মদ । আমার একটা আজ্জি আছে পিতা !

ঔরঞ্জীব । কী !...চূপ করে' বৈলে যে । বল পুত্র ।

মহম্মদ । কথাটা অনেক দিন থেকে জিজ্ঞাসা করি মনে করছি । কিন্তু এ সংশয় আর বন্ধে চেপে রাখতে পারি না । উদ্ধৃত্য মার্জনা করবেন ।

ঔরঞ্জীব । বল ।

মহম্মদ । পিতা ! সম্রাট সাজাহান কি বন্দী ?

ঔরঞ্জীব । না ! কে বলেছে ?

মহম্মদ । তবে তাঁকে প্রাসাদে রুদ্ধ করে' রাখা হয়েছে কেন ?

ঔরঞ্জীব । সেরূপ প্রয়োজন হয়েছে ।

মহম্মদ । আর ছোট কাকা—তাঁকে একরূপে বন্দী করে' রাখা কি প্রয়োজন ?

ঔরঞ্জীব । হাঁ ।

মহম্মদ । আর আপনার এই সিংহাসনে বসি—পিতামহ বর্তমান ।

ঔরঞ্জীব । হাঁ পুত্র !

মহম্মদ । পিতা ! (বলিয়াই মুখ নত করিলেন)

ঔরঞ্জীব । পুত্র ! রাজনীতি বড় কূট । এ বয়সে তা বুঝতে পারি না ! সে চেষ্টা করো না ।

মহম্মদ । পিতা ! ছলে সরল ভ্রাতাকে বন্দী করা, স্নেহময় পিতাকে সিংহাসনচ্যুত করা, আর ধর্মের নামে এসে সেই সিংহাসনে বসি—এর নাম যদি রাজনীতি হয়, তা হ'লে সে রাজনীতি আমার জন্ত নয় !

ঔরঞ্জীব । মহম্মদ ! তোমার কি কিছু অসুখ করেছে ? নিশ্চয় !

মহম্মদ । (কল্পিতস্বরে) না পিতা । আপাততঃ আমার চেয়ে সুস্থকায় ব্যক্তি বোধ হয় ভারতবর্ষে আর কেহই নাই ।

ঔরঞ্জীব । তবে !

মহম্মদ নীরব রহিলেন

ঔরঞ্জীব । আমার প্রতি তোমার অটল বিশ্বাস কে বিচলিত করেছে পুত্র ?

মহম্মদ । আপনি স্বয়ং ।—পিতা । যতদিন সম্ভব আপনাকে আমি বিশ্বাস করে' এসেছি । কিন্তু আর সম্ভব নয় । অবিশ্বাসের বিষে জর্জরিত হয়েছি ।

ঔরঞ্জীব । এই তোমার পিতৃভক্তি !—তা হবে । প্রদীপের নীচেই সর্বাপেক্ষা অন্ধকার !

মহম্মদ । পিতৃভক্তি !—পিতা ! পিতৃভক্তি কি আজ আমার আপনার কাছে শিখতে হবে ! পিতৃভক্তি !—আপনি আপনার বৃদ্ধ পিতাকে বন্দী করে' তাঁর যে সিংহাসন কেড়ে নিয়েছেন, আমি পিতৃভক্তির খাতিরে সেই সিংহাসন পায়ে ঠেলে দিয়েছি । পিতৃভক্তি ! আমি যদি পিতৃভক্ত না হতাম, ত দিল্লীর সিংহাসনে আজ ঔরঞ্জীব বসতেন না, বসতো এই মহম্মদ !

ঔরঞ্জীব । তা জানি পুত্র ! তাই আশ্চর্য্য হচ্ছি ।—পিতৃভক্তি হারিও না বৎস !

মহম্মদ । না, আর সম্ভব নয় পিতা ! পিতৃভক্তি বড় মহৎ, বড় পবিত্র জিনিস । কিন্তু পিতৃভক্তির উপরেও এমন একটা কিছু আছে, যার কাছে পিতা মাতা ভ্রাতা, সব ধরু হ'য়ে যায় ।

ঔরঞ্জীব । তোমার পিতৃভক্তি হারিও না বলছি পুত্র ! কেনো ভবিষ্যতে এই রাজ্য তোমার !

মহম্মদ । আমায় রাজ্যের লোভ দেখাচ্ছেন পিতা ? বলি নাই যে, কর্তব্যের জন্ত ভারত সাম্রাজ্যটা আমি লোষ্ট্রখণ্ডের মত দূরে নিক্ষেপ করেছি ? পিতামহ সে দিন এই রাজ্যের লোভ দেখাচ্ছিলেন, আপনি আজ আবার সেই রাজ্যের লোভ দেখাচ্ছেন ? হায় । পৃথিবীতে সাম্রাজ্য কি এতই মহার্ঘ ? আর বিবেক কি এতই সুলভ ? সাম্রাজ্যের জন্ত অনেক খোয়াবো ? পিতা ! আপনি বিবেক বর্জন করে সাম্রাজ্য লাভ করেছেন, সে সাম্রাজ্য কি পরকালে নিয়ে যেতে পারবেন ? কিন্তু এই বিবেকটুকু বর্জন না করলে সঙ্গে যেত ।

ঔরঞ্জীব । মহম্মদ !

মহম্মদ । পিতা !

ঔরঞ্জীব । এর অর্থ কি ?

মহম্মদ । এর অর্থ এই যে, আমি যে আপনার জন্য সব হারিয়ে বসে আছি, সেই আপনাকেও আজ আর হৃদয়ের মধ্যে খুঁজে পাচ্ছি না—বুঝি তাও হাবালাম । আর আমার মত দরিদ্র কে ! আর আপনি—আপনি এই ভারতসাম্রাজ্য পেয়েছেন বটে ! কিন্তু তার চেয়ে বড় সাম্রাজ্য আজ হারালেন ।

ঔরঞ্জীব । সে সাম্রাজ্য কি ?

মহম্মদ । আমার পিতৃভক্তি ! সে যে কি রত্ন, সে যে কি সম্পদ—কি যে হারালেন—আজ আর বুঝতে পারছেন না । একদিন পারবেন বোধ হয় ।

প্রস্থান

~~ঔরঞ্জীব ধীরে ধীরে অপর দিকে প্রস্থান করিলেন~~

ষষ্ঠ দৃশ্য

স্থান—বোধপুরের প্রাসাদ-কক্ষ । কাল—মধ্যাহ্ন

যশোবন্ত সিংহ ও জয়সিংহ

জয়সিংহ । কিন্তু এই রক্তপাতে লাভ ?

যশোবন্ত । লাভ ? লাভ কিছু নাই ।

জয়সিংহ । তবে কেন এ বৃথা রক্তপাত ! যখন ঔরংজাবেব এ যুদ্ধে জয় হবেই ।

যশোবন্ত । কে জানে !

জয়সিংহ । ঔরংজীবকে কখন কোন যুদ্ধে পরাজিত হ'তে দেখেছেন কি ?

যশোবন্ত । না । ঔরংজীব বীর বটে ! সেদিন আমি তাকে নশ্বদা যুদ্ধক্ষেত্রে অস্বাক্ষর দেখছিলাম মনে আছে—সে দৃশ্য আমি জীবনে কখন ভুলবো না—মৌন, তীক্ষ্ণদৃষ্টি, অকুটিকুটিল—তার চারিদিক দিয়ে তীর, গোলাগুলি ছুটে যাচ্ছে, তার দিকে দৃকপাত নাই । আমি তখন বিদ্বেষে ফেটে মরে' যাচ্ছি, কিন্তু অন্তরে তাকে সাধুবাদ না দিয়ে থাকতে পারলাম না ।—ঔরংজীব বীর বটে !

জয়সিংহ । তবে ?

যশোবন্ত । তবে আমি খিজুরার অপমানের প্রতিশোধ চাই ।

জয়সিংহ । সে প্রতিশোধ ত আপনি তাঁর শিবির লুট করে' নিয়েছেন ।

যশোবন্ত । না সম্পূর্ণ হয় নি ! কারণ, ঔরংজীবের সেই শূল ভাণ্ডার পূর্ণ কর্তে কতক্ষণ ! যদি লুট করে' চলে' না এসে সূজার সঙ্গে যোগ দিতাম তা হ'লে খিজুরা-যুদ্ধে সূজার পরাজয় হোত না । কিংবা যদি আত্রার এসে সম্রাট সাজাহানকে মুক্ত ক'রে দিতাম !—কি ভ্রমই হ'য়ে গিয়েছিল ।

জয়সিংহ । কিন্তু তা'তে আপনার কি লাভ হোত ? সম্রাট দারা হৌন, সৃজা হৌন বা ঔরঞ্জীব হৌন—আপনার কি ।

যশোবন্ত । প্রতিশোধ !—আমি তাদের সব বিষচক্ষে দেখি ; কিন্তু সব চেয়ে বিষচক্ষে দেখি—এই খল ঔরঞ্জীবকে ।

জয়সিংহ । তবে আপনি খিজুয়া-যুদ্ধে তাঁর সঙ্গে যোগ দিয়েছিলেন কেন ?

যশোবন্ত । সেদিন দিল্লীর রাজসভায় তা'র সমস্ত কথায় বিশ্বাস করেছিলাম । হঠাৎ এমন মহত্বের ভাণ করলে, এমন ত্যাগের অভিনয় করলে, এমন আন্তরিক দৈন্ত আবৃত্তি করলে যে আমি চমৎকৃত হ'য়ে গেলাম ! ভাবলাম—‘এ কি ! আমার আজন্ম ধারণা, আমার প্রকৃতিগত বিশ্বাস কি সব ভুল ! এমন ত্যাগী, মহৎ, উদার, ধার্মিক মানুষকে আমি পাপী কল্পনা করেছিলাম ।’ এমন ভোজবাজী খেললে—যে সর্বপ্রথম আমিই চেষ্টা করে উঠলাম “জয় ঔরঞ্জীবের জয় ।” তার সেদিনকার জয় নশ্বদা কি খিজুয়া-যুদ্ধ জয়ের চেয়েও অদ্ভুত । কিন্তু সে দিন খিজুয়া-যুদ্ধক্ষেত্রে আবার আসল মানুষটা দেখলাম—সেই কূট, খল, চক্রী ঔরঞ্জীব ।

জয়সিংহ । মহারাজ ! খিজুয়া ক্ষেত্রে আপনার প্রতি রূঢ় আচরণের জন্য সম্রাট পরে যথার্থ-ই অনুতপ্ত হয়েছিলেন !

যশোবন্ত । এই কথা আমায় বিশ্বাস কর্তে বলেন মহারাজ !

জয়সিংহ । কিন্তু সে কথা বাক ; সম্রাট তার জন্য আপনার কাছে ক্ষমাও চান না, ক্ষমা ভিক্ষাও চান না । তিনি বিবেচনা করেন যে, আপনার আচরণে সে অন্তায়ের শোধ হয়ে গিয়েছে । তিনি আপনার সাহায্য চান না । তিনি চান যে, আপনি দারার পক্ষও নেবেন না, ঔরঞ্জীবের পক্ষও নেবেন না । বিনিময়ে তিনি আপনাকে গুর্জর রাজ্য

দিবেন—এইমাত্র। আপনি একটা কল্পিত অন্টায়ের প্রতিশোধ নিতে গিয়ে নিজের শক্তি ক্ষয় করে' ক্রয় করবেন—ঔরঞ্জীবের বিদ্রোহ। আর হাত গুটিয়ে বসে' দেখার বিনিময়ে পাবেন, একটা প্রকাণ্ড উর্বর স্রাবা— গুর্জর। বেছে নেন। আপনার সর্বস্ব দিয়ে যদি প্রতিহিংসা নিতে চান—নেনু। এ সহজ ব্যবসার কথা, শুধু কেনা বেচা।—দেখুন!

যশোবন্ত। কিন্তু দারা—

জয়সিংহ। দারা আপনার কে? সেও মুসলমান, ঔরঞ্জীবও মুসলমান। আপনি যদি নিজের দেশের জন্ত যুদ্ধ কর্তে যেতেন ত আমি কথাটি কইতাম না! কিন্তু দারা আপনার কে? আপনি কার জন্ত রাজপুত্র রক্তপাত কর্তে যাচ্ছেন? দারাই যদি জয়ী হয়—তাতে আপনারই কি লাভ, আপনার জন্মভূমিরই বা কি লাভ?

যশোবন্ত। তবে আশুন, আমরা দেশের জন্তই যুদ্ধ করি! মেবারের রাণা রাজসিংহ, বিকানীরের মহারাজ আপনি, আর আমি যদি মিলিত হই ত এই তিন জনেই মোগল সাম্রাজ্য ফুৎকারে উড়িয়ে দিতে পারি—আশুন।

জয়সিংহ। তার পরে সম্রাট হবেন কে?

যশোবন্ত। কে! রাণা রাজসিংহ!

জয়সিংহ। আমি ঔরঞ্জীবের প্রভুত্ব মানতে পারি, কিন্তু রাজসিংহের প্রভুত্ব স্বীকার কর্তে পারি না!

যশোবন্ত। কেন মহারাজ?—তিনি স্বজাতি বলে?

জয়সিংহ। তা বৈকি। জাতির দুর্ভাগ্য সইব না! আমি কোন উচ্চ প্রবৃত্তির ভান করি না! সংসার আমার কাছে একটা হাট। যেখানে কম দামে বেশী পাবো, সেইখানে যাবো। ঔরঞ্জীব কম দামে বেশী দিচ্ছে। এই ক্রয় সম্পন্ন ত্যাগ করে অনিশ্চিতের মধ্যে যেতে চাই না।

যশোবন্ত । হঁ !—আচ্ছা মহারাজ । আপনি বিশ্রাম করুন গে ।
আমি ভেবে কাল উত্তর দিব ।

জয়সিংহ । সে উত্তম কথা । ভেবে দেখবেন—এ শুধু সাংসারিক
কেনা বেচা ! আর আমরা স্বাধীন রাজা না হ'তে পারি, রাজভক্ত প্রজা
ত হ'তে পারি । রাজভক্তিও ধর্ম । .. গ্রহান

যশোবন্ত । হিন্দুর সাম্রাজ্য কবির স্বপ্ন । হিন্দুর প্রাণ বড়ই শুষ্ক,
বড়ই তিম হ'য়ে গিয়েছে । আর পরম্পর বোড়া লাগে না । “স্বাধীন
রাজা না হ'তে পারি, রাজভক্ত প্রজা ত হ'তে পারি ।” ঠিক বলছে
জয়সিংহ ! কার জন্ত বুদ্ধ কর্তে যাবো । দারা আমার কে ?—নর্মদার
প্রতিশোধ খিজুয়ার নিয়েছি ।

মহামায়ার প্রবেশ

মহামায়া । একে প্রতিশোধ বল মহারাজ ! আমি এতক্ষণ
অন্তরালে দাঁড়িয়ে তোমার এই অপৌরুষ—সমস্তার নিক্তির আধারের
মত এই আন্দোলন দেখছি !—খাসা ! চমৎকার ! বেশ বুঝে গেলে যে
প্রতিশোধ নিয়েছো । একে প্রতিশোধ বল মহারাজ ? ঔরঞ্জীবের পক্ষ
হ'য়ে তার শিবির লুঠ ক'রে পালানোর নাম প্রতিশোধ ? এর চেয়ে যে
পরাজয় ছিল ভালো । এ যে পরাজয়ের উপর পাপের ভার । রাজপুত-
জাতি যে বিশ্বাসঘাতক হ'তে পারে তা তুমিই এই প্রথম দেখালে !

যশোবন্ত । লুঠ করবার আগে আমি ঔরঞ্জীবের পক্ষ পরিত্যাগ
করেছি মহামায়া ।

মহামায়া । আর তার পশ্চাতে তার সম্পত্তি লুঠ করেছে ।

যশোবন্ত । বুদ্ধ করে' লুঠ করেছি, অপহরণ করি নাই ।

মহামায়া । একে বুদ্ধ বল ?—ধিক !

যশোবন্ত । মহামায়া ! তোমার এই ছাড়া কি আর কথা নাই ?

দিবারাত্র তোমার তিক্ত ভৎসনা শুন্বার জন্মই কি তোমায় বিবাহ করেছিলাম ?

মহামায়া । নহিলে বিবাহ করেছিলে কেন মহারাজ ?

যশোবন্ত । কেন ! আশ্চর্য্য প্রশ্ন !—লোকে বিবাহ করে আবার কেন ?

মহামায়া । হাঁ, কেন ? সন্তোগের জন্ম ? বিলাস-প্রবৃত্তি চরিতার্থ করবার জন্ম ? তাই কি ?—তাই কি ?

যশোবন্ত । (ঈষৎ ইতস্ততঃ করিয়া) হাঁ—এক রকম তাই বলতে হবে বৈকি ।

মহামায়া । তবে একজন গণিকা রাখো না কেন ?

যশোবন্ত । ঝড় উঠছে বুঝি !

মহামায়া । মহারাজ ! যদি তোমার পাশব প্রবৃত্তি চরিতার্থ কর্তে চাও, যদি কামের সেবা করতে চাও ত তার স্থান কুলাঙ্গনার পবিত্র অন্তঃপুর নয়—তার স্থান বারান্দার সজ্জিত নরক । সেইখানে যাও । তুমি রৌপ্য দিবে, সে রূপ দিবে । তুমি তার কাছে যাবে লালসার তাড়নায়, আর সে তোমার কাছে আসবে জঠরের জ্বালায় । স্বামী-স্ত্রীর সে সম্বন্ধ নয় ।

যশোবন্ত । তবে ?

মহামায়া । স্বামী-স্ত্রীর সম্বন্ধ ভালোবাসার সম্বন্ধ । সে যেমন তেমন ভালোবাসা নয় । যে ভালোবাসা প্রিয়জনকে দিন দিন হেয় করে না, দিন দিন প্রিয়তম করে, যে ভালোবাসা নিজের চিন্তা ভুলে যায়, আর তার দেবতার চরণে আপনাকে বলি দেয়, যে ভালোবাসা প্রভাত সূর্য্য-রশ্মির মত যার উপরে পড়ে তাকেই স্বর্ণ-বর্ণ করে' দেয়, ভাগীরথীর বারিরাশির মত যার উপরে পড়ে তাকেই পবিত্র করে' দেয়, দেবতার বরের মত যার উপর পড়ে তাকেই ভাগ্যবান করে—এ সেই ভালোবাসা ; অচঞ্চল অমূল্য, আনন্দময়—কারণ, উৎসর্গময় ।

যশোবন্ত । তুমি আমাকে কি সেই রকম ভালোবাস মহামায়া ?

মহামায়া । বাসি ! তোমার গৌরব কোলে করে' আমি মর্তে পারি—তার জন্ত আমার এত চিন্তা, এত আগ্রহ, যে সে গৌরব স্নান হ'য়ে গেছে দেখবার আগে আমার ইচ্ছা হয় যেন আমি অন্ধ হ'য়ে যাই ! রাজপুত-জাতির গৌরব—মাড়বারের গৌরব তোমার হাতে নিঃস্ব হ'য়ে যাচ্ছে দেখবার আগে আমি মর্তে চাই । আমি তোমায় এত ভালোবাসি ।

যশোবন্ত । মহামায়া !

মহামায়া । চেয়ে দেখ—ঐ রোজদোস্ত গিরিশ্রেণী—দূরে ঐ ধূসর বালু-স্তূপ । চেয়ে দেখ—ঐ পর্বতশ্রোতস্বতী—যেন সৌন্দর্য্যে কাঁপে । চেয়ে দেখ—ঐ নীল আকাশ, যেন সে নীলিমা নিংড়ে বার করছে ! ঐ ঘুঘুর ডাক শোন ; আর সঙ্গে সঙ্গে ভাবো যে এই স্থানে একদিন দেবতারা বাস করতেন । মাড়বার আর মেবার বীরত্বের যমজপুত্র ; মহত্বের নৈশা-কাশে বৃহস্পতি ও শুক্র তারা । ধীরে ধীরে সে মহিমার সমারোহ আমার সম্মুখ দিয়ে চলে যাচ্ছে । এসো চারণবালকগণ ! গাও সেই গান ।

যশোবন্ত । মহামায়া !

মহামায়া । কথা কয়ো না । ঐ ইচ্ছা যখন আমার মনে আসে আমার মনে হয় বে তখন আমার পূজার সময় ! শব্দ ঘণ্টা বাজাও, কথা কয়ো না ।

যশোবন্ত । নিশ্চয় মস্তিষ্কের কোন রোগ আছে !

ধীরে ধীরে চলিয়া গেলেন

মহামায়া । কে তুমি সুন্দর, সৌম্য, শান্ত, আমার সম্মুখে এসে দাঁড়ালে । (চারণবালকগণের প্রবেশ) গাও বালকগণ ! সেই গান গাও—আমার জন্মভূমি ।

চারণ বালকদিগের প্রবেশ ও গীত—

ধনধান্য পুষ্পভরা আমাদের এই বহুকরা ;
 তাহার মাঝে আছে দেশ এক—সকল দেশের সেরা ;
 ও সে, স্বপ্ন দিয়ে তৈরি সে দেশ স্মৃতি দিয়ে ঘেরা ;
 এমন দেশটি কোথাও খুঁজে পাবে নাক তুমি,
 সকল দেশের রাণী সে যে—আমার জন্মভূমি ।
 চন্দ্র সূর্য্য গ্রহ তারা, কোথায় উজল এমন ধারা !
 কোথায় এমন খেলে তড়িৎ এমন কালো মেঘে !
 তার পাখীর ডাকে ঘুমিয়ে উঠি, পাখীর ডাকে জেগে—
 এমন দেশটি—ইত্যাদি—
 এমন স্নিগ্ধ নদী কাহার কোথায় এমন ধূস্র পাহাড় !
 কোথায় এমন হরিৎকান্ত আকাশতলে মিশে ।
 এমন ধানের উপর ঢেউ খেলে যায় বাতাস কাহার দেশে ।
 এমন দেশটি—ইত্যাদি—
 পুষ্পে পুষ্পে ভরা শাখী ; কুঞ্জে কুঞ্জে গাহে পাখী ,
 গুঞ্জরিয়া আসে অলি পুঞ্জে পুঞ্জে ধেয়ে—
 তারা ফুলের উপর ঘুমিয়ে পড়ে ফুলের মধু খেয়ে !
 ভায়ের মায়ের এত স্নেহ কোথায় গেলে পাবে কেহ ?
 —ওমা তোমার চরণ দু'টি বন্ধে আমার ধরি'
 আমার এই দেশেতে জন্ম—যেন এই দেশেতে মরি—
 এমন দেশটি—ইত্যাদি—

চতুর্থ অঙ্ক

প্রথম দৃশ্য

স্থান—টাণ্ডায় সূজার প্রাসাদ-কক্ষ । কাল—সন্ধ্যা

পিয়ারা গাহিতেছিলেন—

সই কেবা শুনাইল শ্যাম নাম !
কাণের ভিতর দিয়া মরমে পশিল গো,
আকুল করিল মোর প্রাণ ।
না জানি কতক মধু শ্যাম নামে আছে গো
বদন ছাড়িতে নাহি পারে ।
জপিতে জপিতে নাম অবশ করিল গো,
কেমনে পাইব সই তারে ।

সূজার প্রবেশ

সূজা । শুনেছ পিয়ারা, যে দারা ঔরঞ্জীবের কাছে শেষ যুদ্ধেও
পরাজিত হয়েছেন ?

পিয়ারা । হয়েছেন নাকি !

সূজা । ঔরঞ্জীবের স্বপুত্র তরোয়াল হাতে দারার পক্ষে লড়ে' মারা
গিয়েছে—খুব জমকালো রকম না ?

পিয়ারা । বিশেষ এমন কি !

সূজা । নয় ? বৃদ্ধ যোদ্ধা নিজের জামাইএর বিপক্ষে লড়ে' মারা
গেল—শুদ্ধ ধর্মের খাতিরে । সোভানাল্লা !

পিয়ারা । এতে আমি 'কেয়াবৎ' পর্য্যন্ত বলতে রাজি আছি । তার
উপরে উঠতে রাজি নই !

সূজা । বশোবস্ত সিংহ যদি এবার দারার সঙ্গে সসৈন্তে যোগ দিত—
তা দিলে না । দারাকে সাহায্য কর্তে স্বীকৃত হ'য়ে শেষে কিনা পিছু হটলে ।

পিয়ারা। আশ্চর্য্য ত !

সূজা। এতে আশ্চর্য্য হচ্ছ কি পিয়ারা ? এতে আশ্চর্য্য হবার কিছু নাই।

পিয়ারা। নেই নাকি ? আমি ভাবলাম বুঝি আছে ; তাই আশ্চর্য্য হচ্ছিলাম !

সূজা। মহারাজ যেমন এই খিজুরা যুদ্ধে বিশ্বাসঘাতকতা করেছিল, এবার দারাকে ঠিক সেই রকম প্রতারণা করেছে। এর মধ্যে আবার আশ্চর্য্য কি !

পিয়ারা। তা আর কি—আমি আশ্চর্য্য হচ্ছি—

সূজা। আবার আশ্চর্য্য !

পিয়ারা। না না ! তা নয়। আগে শেষ পর্য্যন্ত শোনই।

সূজা। কি ?

পিয়ারা। আমি এই ভেবে আশ্চর্য্য হচ্ছি—যে আগে আশ্চর্য্য হচ্ছিলাম কি ভেবে ?

সূজা। আশ্চর্য্য যদি বল, তবে আশ্চর্য্য হবার ব্যাপার একটা হয়েছে !

পিয়ারা। সেটা হচ্ছে কি ?

সূজা। সেটা হচ্ছে এই যে ঔরঞ্জীবের পুত্র মহম্মদ, আমার মেয়ের জন্ম তার বাপের পক্ষ ছেড়ে আমার পক্ষে যোগ দিল কি ভেবে।

পিয়ারা। তার মধ্যে আশ্চর্য্য কি ! প্রেমের জন্ম লোকে এর চেয়ে অনেক বেশী শত্রু কাজ করেছে। প্রেমের জন্ম লোকে পাঁচিল টপকেছে, ছাদ থেকে লাফিয়েছে, সাঁতারে নদী পার হয়েছে, আগুনে কাঁপ দিয়েছে, বিষ খেয়ে মরেছে ! এটা ত একটা তুচ্ছ ব্যাপার। বাপকে ছেড়েছে। ভারি কাজ করেছে ! ও ত সবাই করে। আমি এতে আশ্চর্য্য হ'তে রাজি নই।

সূজা। কিন্তু—না—এ বেশ একটু আশ্চর্য্য! সে যাহোক কিন্তু মহম্মদ আর আমি মিলে এবারে ঔরঞ্জীবের সৈন্যকে বঙ্গদেশ থেকে তাড়িয়েছি।

পিয়ারা। তোমার কি যুদ্ধ ভিন্ন কথা নাই? আমি যত তোমায় ভুলিয়ে রাখতে চাই, তুমি ততই শিষ্পা তোলো! রাশ মানতে চাও না।

সূজা। যুদ্ধে একটা বিরাট আনন্দ আছে। তার উপরে—

বাঁদীর প্রবেশ

বাঁদি। এক ফকির দেখা কর্তে চায় জাহাপনা।

পিয়ারা। কি রকম ফকির—লম্বা দাড়ি?

বাঁদি। হাঁ মা! সে বলে যে বড় দরকার, এক্ষণই।

সূজা। আচ্ছা, এখানেই নিয়ে এসো।—পিয়ারা তুমি ভেতরে যাও।

পিয়ারা। বেশ, তুমি আমায় তাড়িয়ে দিচ্ছ। বেশ! আমি বাচ্ছি।

প্রস্থান

সূজা। যাও এখানে তাকে পাঠিয়ে দাও।

বাঁদীর প্রস্থান

সূজা। পিয়ারা এক হাম্মোর ফোয়ারা—একটা অর্থশূন্য বাক্যের নদী। এই রকম করে' সে আমাকে বুদ্ধের চিন্তা থেকে ভুলিয়ে রাখে।

দিলদারের প্রবেশ

দিলদার। বন্দেগি সাহাজাদা! সাহাজাদার একখানি চিঠি!

পত্র প্রদান

সূজা। (পত্র লইয়া খুলিয়া পাঠ) এ কি! তুমি কোথা থেকে এসেছো?

দিলদার। পত্রের দস্তখত নেই কি সাহাজাদা!—চেহারা দেখলেই সাহাজাদার বুদ্ধি টের পাওয়া যায়! খুব চাল চলেছেন।

সুজা । কি চাল ?

দিলদার । সাহাজাদা যে সুজার মেয়ে বিয়ে করে'—উঃ—খুব ফিকির করেছেন । সম্মুখ থেকে তীর মারার চেয়ে পিছন দিক থেকে—
উঃ ! বাপ্কা বেটা কি না ।

সুজা । পিছন থেকে তীর মাৰ্ছে কে ?

দিলদার । ভয় কি—আমি কি এ কথা সুজা সুলতানকে বলতে যাচ্ছি । চিঠিটা যেন তাঁকে ভুলে দেখিয়ে ফেলবেন না সাহাজাদা !

সুজা । আরে ছাই আমিই যে সুলতান সুজা ; মহম্মদ ত আমার জামাই !

দিলদার । বটে ! চেহারা ত বেশ যুবা পুরুষের মত রেখেছেন । শুধু—বেশী চালাকী করবেন না । আপনি যদি মহম্মদ হন বা' বলছি ঠিক বুঝতে পারছেন । আর—যদি সুলতান সুজা হন, তা' বা' বলছি তার এক বর্ণও সত্য নয় ।

সুজা । আচ্ছা তুমি এখন যাও । এর বিহিত আমি এখনই করছি—
—তুমি বিশ্রাম করগে যাও ।

দিলদার । যে আজ্ঞে ।

প্রস্থান

সুজা । এ ত মহাসমস্যায় পড়লাম ! বাহিরের শত্রুর জালায়ই অস্থির । তার উপর ঔরঞ্জীব আবার ঘরে শত্রু লাগিয়েছে । কিন্তু যাবে কোথায় ! হাতে হাতে ব্যবস্থা করছি । ভাগ্যিস্ এই পত্র আমার হাতে পড়েছিল—এই যে মহম্মদ ।

মহম্মদের প্রবেশ

সুজা । (মহম্মদ) পড় এই পত্র ।

মহম্মদ । (পড়িয়া) এ কি ! এ কার পত্র ?

সুজা । তোমার পিতার ! স্বাক্ষর দেখছো না ? তুমি ঈশ্বরকে

সাক্ষী করে' তাঁকে পত্র লিখেছিলে যে, তুমি যে তোমার পিতার বিরুদ্ধাচরণ করছো, সে অন্ডায় তোমার শত্রুরের অর্থাৎ আমার প্রতি গাঠ্য দিয়ে পরিশোধ করবে।

মহম্মদ। আমি পিতাকে কোন পত্রই লিখি নি। এ কপট পত্র।

সূজা। বিশ্বাস কর্তে পার্লাম না! তুমি আজই এই দণ্ডে আমার বাড়ী পরিত্যাগ কর।

মহম্মদ। সে কি! কোথায় যাবো?

সূজা। তোমার পিতার কাছে।

মহম্মদ। কিন্তু আমি শপথ করছি—

সূজা। না, চের হয়েছে—আমি সম্মুখ বুদ্ধে পারি কি হারি—সে স্বতন্ত্র কথা। ঘরে শত্রু পুষতে পারি না।

মহম্মদ। আমি—

সূজা। কোন কথা শুনতে চাই না। যাও, এখনি যাও।

মহম্মদের প্রস্থান

সূজা। হাতে হাতে ব্যবস্থা করেছি। ভারি বুদ্ধি করেছিলে দাদা! কিন্তু যাবে কোথা! তুমি বেড়াও ডালে ডালে, আমি বেড়াই পাতায় পাতায়!—এই যে পিয়ারা।

পিয়ারার প্রবেশ

সূজা। পিয়ারা! ধরে' ফেলেছি।

পিয়ারা। কাকে?

সূজা। মহম্মদকে। বেটা মতলব ফেঁদে এসেছিল। তোমাকে এখনি বল্ছিলাম না যে, এ বেশ একটু খটকা! এখন সেটা বোঝা যাচ্ছে। জলের মত সাফ হ'য়ে গিয়েছে। তাকে বাড়ী থেকে তাড়িয়ে দিয়েছি!

পিয়ারা। কাকে?

সূজা। মহম্মদকে।

পিয়ারা। সে কি!

সূজা। বাইরে শত্রু, ঘরে শত্রু—ধন্য ভায়া—বুদ্ধি করেছিলে বটে!
কিন্তু পারলে না। ভারি ধরেছি।—এই দেখ পত্র!

পিয়ারা। (পত্র পড়িয়া) তোমার মাথা ধারাপ হয়েছে। হকিম দেখাও।

সূজা। কেন?

পিয়ারা। এ ছল—কপট পত্র বুঝতে পারছি না? ঔরঞ্জীবের ছল।
এইটে বুঝতে পারছি না।

সূজা। না, সেটা ঠিক বুঝতে পারছি নে।

পিয়ারা। এই বুদ্ধি নিয়ে তুমি গিয়েছো—ঔরঞ্জীবের সঙ্গে যুদ্ধ
কর্তে! হেলে ধর্তে পার না, কেউটে ধর্তে যাও। তা আমাকেও একবার
জিজ্ঞাসাও করলে না; জামাইকে দিলে তাড়িয়ে! চল, এখন মেয়ে
জামাইকে বোঝাইগে।

সূজা। পত্র কপট? তাই নাকি! কৈ তা ত তুমি বললে না—তা
সাবধান হওয়া ভাল।

পিয়ারা। তাই জামাইকে দিলে তাড়িয়ে!

সূজা। তাই ত! তা হ'লে ভারি ভুল হ'য়ে গিয়েছে বলতে হবে।
যা' হোক শোন এক ফিকির করেছি। মেয়েকে তার সঙ্গে দিচ্ছি! আর
যথারীতি যৌতুক দিচ্ছি! দিয়ে মেয়েকে তার সঙ্গে স্বপ্নরবাড়ী পাঠাচ্ছি,
এতে দোষ নাই। ভয় কি—চল জামাইকে তাই বুঝিয়ে বলি। তাই
বলে' তাকে বিদায় দেই।

পিয়ারা। কিন্তু বিদায় দেবে কেন?

সূজা। সময় ধারাপ। সাবধান হওয়া ভাল। বোঝ না—চল
বোঝাইগে।

উত্তরে নিজ্রাস্ত

দ্বিতীয় দৃশ্য

স্থান—জিহন খাঁর গৃহে দারার কক্ষ । কাল—রাত্রি

সিপার ও জহরৎ দণ্ডায়মান

জহরৎ । সিপার !

সিপার । কি জহর !

জহরৎ । দেখ্‌ছো !

সিপার । কি !

জহরৎ । যে আমরা এই রকম বন্য জন্তুর মত বন হতে বনান্তরে প্রতাড়িত ; হত্যাকারীর মত এক গহ্বর থেকে পালিয়ে আর এক গহ্বরে গিয়ে মাথা লুকোচ্ছি ; পথের ভিখারীর মত এক গৃহস্থের দ্বারে পদাহত হ'য়ে আর এক গৃহস্থের দ্বারে মুষ্টিভিক্ষা কুড়িয়ে বেড়াচ্ছি ।—দেখ্‌ছো ?

সিপার । দেখ্‌ছি । কিন্তু উপায় কি ?

জহরৎ । উপায় কি ? পুরুষ তুমি—স্থির স্বরে বল্‌ছো “উপায় কি ?” আমি যদি পুরুষ হতাম, ত এর উপায় কর্তাম ।

সিপার । কি উপায় কর্তে ?

জহরৎ । (ছোরা বাহির করিয়া) এই ছোরা নিয়ে গিয়ে দস্যু ঔরংজীবের বুকে বসিয়ে দিতাম ।

সিপার । হত্যা ! !

জহরৎ । হাঁ হত্যা ; চম্কে উঠলে যে ?—হত্যা । নাও এই ছোরা, দিল্লী যাও ! তুমি বালক, তোমায় কেউ সন্দেহ করবে না—যাও ।

সিপার । কখন না । হত্যা করব না ।

জহরৎ । ভীক ! দেখ্‌ছো—মা মর্ছেন ! দেখ্‌ছো—বাবা উম্মাদের মত হ'য়ে গিয়েছেন । বসে' বসে' দেখ্‌ছো ?

সিপার । কি কর্ব !

জহরৎ । কাপুরুষ !

সিপার । আমি কাপুরুষ নই জহরৎ ! আমি বুদ্ধক্ষেত্রে পিতার পার্শ্বে
হস্তিপৃষ্ঠে বসে' যুদ্ধ করেছি । প্রাণের ভয় করি না । কিন্তু হত্যা কর্ব না ।

জহরৎ । উত্তম !

প্রস্থান

! সিপার । এ নিষ্ফল ক্রোধ ভগ্নি ! কোন উপায় নাই ।

প্রস্থান

তৃতীয় দৃশ্য

স্থান—নাদিরার কক্ষ । কাল—রাত্রি

খটাহের উপর নাদিরা শয়না । পার্শ্বে দারা

অন্ত পার্শ্বে সিপার ও জহরৎ

দারা ! নাদিরা ! সংসার আমাকে পরিত্যাগ করেছেন—ঈশ্বর
আমায় পরিত্যাগ করেছেন । একা তুমি আমায় এতদিন পরিত্যাগ কর
নাই । তুমি আমায় ছেড়ে চলে !

নাদিরা । আমার জন্ম অনেক সহ্য করেছো নাথ ! আর—

দারা । নাদিরা ! দুঃখের জ্বালায় ক্ষিপ্ত হ'য়ে তোমার অনেক
কুবাকা বলেছি—

নাদিরা । নাথ ! তোমার দুঃখের সজিনী হওয়াই আমার পরম
গৌরব । সে গৌরবের স্মৃতি নিয়ে আমি পরলোকে চল্লাম—সিপার—
বাবা ! মা-জহরৎ ! আমি যাচ্ছি—

সিপার । তুমি কোথায় যাচ্ছ মা ?

নাদিরা । কোথায় যাচ্ছি তা আমি জানি না । তবে যেখানে যাচ্ছি
সেখানে বোধ হয় কোন দুঃখ নাই—ক্ষুধা তৃষ্ণার জ্বালা নাই, রোগ
তাপ নাই, ঘেঁষ ঘন্ড নাই ।

সিপার । তবে আমরাও সেখানে যাবো মা—চল বাবা ! আর
সহ্য হয় না ।

[নাদিরা । আর কষ্ট পেতে হবে না বাছা ! তোমরা জ্বিহন খাঁর
আশ্রয়ে এসেছো ! আর দুঃখ নাই ।

সিপার । এই জ্বিহন খাঁ কে বাবা ?

দারা । আমার একজন পুরাতন বন্ধু ।

নাদিরা। তাঁকে তোমার বাবা দু'বার মৃত্যু থেকে বাঁচিয়েছিলেন।
তিনি তোমাদের আদর যত্ন করবেন।

সিপার। কিন্তু আমি কখন তাকে ভালবাসবো না।

দারা। কেন সিপার ?

সিপার। তার চেহারা ভাল নয়। এখনই সে তার এক চাকরকে
ফিস্‌ফিস্‌ করে' কি বলছিল—আর আমার দিকে এ রকম চোরা চাহনি
চাচ্ছিল—যে আমার বড় ভয় করল মা! আমি ছুটে তোমার কাছে
পালিয়ে এলাম।

দারা। সিপার সত্য বলেছে নাদিরা! জিহনের একটা কুটিল
হাসি দেখেছি তার চক্ষে একটা হিংস্র দোষ্টি দেখেছি, তার নিম্নস্বরে বোধ
হচ্ছিল যেন সে একখানা ছোরা শানাচ্ছে! সেদিন যখন সে আমার
পদতলে পড়ে,' তার প্রাণভিক্ষা চেয়েছিল, তখন সে চেহারা এক রকমের ;
আর এ আর এক রকমের চেহারা। এ চাহনি, এ স্বর, এ ভঙ্গিমা—
আমার অপরিচিত।

নাদিরা। তবু ত তাকে তুমি দু'বার বাঁচিয়েছিলে। সে মানুষ ত,
সর্প ত নয়।

দারা। মানুষকে আর বিশ্বাস নেই নাদিরা! দেখছি সে
সর্পের চেয়েও খল হয়! তবে মাঝে মাঝে—কি নাদিরা! বড় যন্ত্রণা
হচ্ছে!

নাদিরা। না, কিছু না! আমি তোমার কাছে আছি। তোমার
স্নেহদৃষ্টির অমৃতে সব যন্ত্রণা গলে যাচ্ছে। কিন্তু আমার আর সময়
নেই—তোমার হাতে সিপারকে সঁপে দিয়ে গেলাম—দেখো।—পুত্র
সোলেমানের সঙ্গে—আর দেখা হ'লো না—ঈশ্বর! (মৃত্যু)

দারা। নাদিরা! নাদিরা!—(না। সব হিম শুরু!)

সিপার। মা! মা!

[দারা। দীপ নির্বাণ হয়েছে।

জহরৎ নিজের বক্ষ সবলে চাপিয়া উর্দ্ধদিকে একদৃষ্টে চাহিয়া রহিলেন।

~~চন্দ্রিক~~ সৈনিকসহ জিহন খাঁর প্রবেশ

দারা। কে তোমরা ; এ সময় এ স্থানে এসে কলুষিত কর ?

জিহন। বন্দী কর।

দারা। কি! আমায় বন্দী করবে জিহন খাঁ!

সিপার। (~~দেওয়ান হইতে~~ তরবারি লইয়া) কার সাধ্য ?

দারা। সিপার তরবারি রাখো!—এ বড় পবিত্র মুহূর্ত ; এ মহাপুণ্য তীর্থ! এখনও নাদিরার আত্মা এখানে পক্ষ গুটিয়ে আছে—পৃথিবীর সুখদুঃখ থেকে বিদায় নেবার পূর্বে একবার চারিদিকে চেয়ে শেষ দেখা দেখে নিচ্ছে। এখনও স্বর্গ থেকে দেবীরা তাকে সেখানে নিয়ে বাবার জন্তে এসে পৌছে নি! তাকে ত্যক্ত কোরো না—আমায় বন্দী কর্তে চাও জিহন খাঁ ?

জিহন। হাঁ সাহাজাদা।

দারা। ঔরঞ্জীবের আজায় বোধ হয়!

জিহন। হাঁ সাহাজাদা।

দারা। নাদিরা! তুমি শুভে পাচ্ছ না ত! তা হ'লে ঘৃণায় তোমার মৃতদেহ নড়ে উঠবে, তুমি নাকি ~~ঈশ্বরে~~ ^{বড়} বিশ্বাস কর্তে!

জিহন। এঁকে শৃঙ্খল দিয়ে বাঁধো। যদি কোন বাধা দেন ত তরবারি ব্যবহার কর্তে দ্বিধা করবে না।

দারা। আমি বাধা দিচ্ছি না। আমায় বাঁধো। আমি কিছু আশ্চর্য্য হচ্ছি না। আমি এইরূপই একটা কিছু প্রত্যাশা করে' আস-

ছিলাম। অন্তে হয় ত' অন্তরূপ আশা কর্ত্ত। অন্তে হয় ত ভাবতো যে এ কত বড় কৃতঘ্নতা যে, যাকে আমি দু'বার বাঁচিয়েছি, সে আমায় কপট আশ্রয় দিয়ে বন্দী করে—এ কত বড় নৃশংসতা। আমি তা ভাবি না। আমি জানি জগতে সব—সব উচ্চ প্রবৃত্তি পাপের ভয়ে মাটির মধ্যে নাথা লুকিয়ে ফুঁফিয়ে কাঁদছে—উপর দিকে চোখ তুলে চাইতেও সাহস করছে না। আমি জানি পৃথিবীতে ধর্ম এখন স্বার্থসিক্তি, নীতি—শাঠা, পূজা—খোসামোদ, কর্তব্য—জোচ্ছোরি। "উচ্চ প্রবৃত্তিগুলো এখন বড় পুরাতন হ'য়ে গিয়েছে। সভ্যতার আলোকে ধর্মের অন্ধকার সরে গিয়েছে! সে ধর্ম যা কিছু আছে এখন বোধ হয় কৃষকের কুটিরে, ভীল কোল মুণ্ডাদের অসভ্যতার মধ্যে! —কর জিহন খাঁ, আমায় বন্দী কর।

সিপার। তবে আমায়ও বন্দী কর।

জিহন। তোমায়ও ছাড়'চি না সাহাজাদা!—সম্রাটের কাছে প্রচুর পুরস্কার পাব।

দারা। পাবে বৈকি! এত বড় কৃতঘ্নতার দাম পাবে না? তাও কখনও হয়? প্রচুর অর্থ পাবে। আমি কল্পনায় তোমার সেই দীপ্ত মুখখানি দেখতে পাচ্ছি। কি আনন্দ!—প্রচুর অর্থ পাবে। সঙ্গে করে' পরকালে নিয়ে য়েও।

জিহন। তবে আর কি—বন্দী কর!

দারা। কর।—না এখানে না! বাইরে চল! এ স্বর্গে নরকের অভিনয় কেন! [এত বড় অভিনয় এখানে! মা বসুন্ধরা! এতখানি বহন করছ। নীরবে সহ্য করছ ঈশ্বর! হাত দু'খানি গুটিয়ে বেশ এই সব দেখছো!—চল জিহন খাঁ, বাইরে চল।

সকলে বাইতে উত্তত

দারা। দাঁড়াও, একটা অমরোধ করে যাই জিহন খাঁ! রাখবে কি? জিহন খাঁ, এই দেবীর মৃতদেহ লাহোরে পাঠিয়ে দিও! সেখানে সম্রাটের পরিবারের কবর ভূমিতে যেন তাকে গোর দেওয়া হয়। দেবে কি? আমি তোমাকে দু'বার বাঁচিয়েছি ব'লেই এ দান ভিক্ষা চাইছি। নৈলে এতটুকুও তোমার কাছে চাইতে পার্তাম না—দেবে কি?

জিহন। যে আজ্ঞে যুবরাজ! এ কাজ না করলে আমার প্রভু ঔরঞ্জীব যে ক্রুদ্ধ হবেন!

দারা। তোমার প্রভু ঔরঞ্জীব! হুঁ—আমার আর কোন ক্ষোভ নাই! চল—(ফিরিয়া) নাদিরা!

এই বলিয়া দারা ফিরিয়া আসিয়া সহসা নাদিরার শয্যাপার্শ্বে জামু পাতিয়া বসিয়া হস্তদ্বয়ের উপর মুখ ঢাকিলেন পরে উঠিয়া জিহন খাঁকে কহিলেন—

চল জিহন খাঁ!

সকলে বাহিরে চলিলেন। সিপার নাদিরার মৃতদেহের প্রতি চাহিয়া কাঁদিয়া ফেলিলেন

দারা। (রুম্ভভাবে) সিপার!

সিপারের রোদন শুয়ে ষামিয়া গেল। সকলে নীরবে বাহিরে চলিয়া গেলেন

চতুর্থ দৃশ্য

স্থান—যোধপুরের প্রাসাদ । কাল—সায়াহ্ন

যশোবন্ত সিংহ ও মহামায়া দণ্ডায়মান

মহামায়া । হতভাগ্য দারার প্রতি কৃতজ্ঞতার পুরস্কারস্বরূপ গুর্জন প্রদেশ পেয়ে সন্তুষ্ট আছো ত মহারাজ !

যশোবন্ত । তাতে আমার অপরাধ কি মহামায়া ?

মহামায়া । না অপরাধ কি ? এ তোমার মহৎ সম্মান, পরম গৌরব ।

যশোবন্ত । গৌরব না হ'তে পারে, তবে তার মধ্যে অন্ত্যর আমি কিছু দেখি নি ! দারার সঙ্গে যোগ দেওয়া না দেওয়া আমার ইচ্ছা অনিচ্ছা । দারা আমার কে ?

মহামায়া । আর কেউ নয়—প্রভু মাত্র ।

যশোবন্ত । প্রভু । এককালে ছিলেন বটে ; আর কেউ নয় ।

মহামায়া । সত্যই ত ! দারা আজ নিয়তিচক্রের নীচে, ভাগ্যের লাস্ত্রিত, মানবের ধিকৃত । আর তাঁর সঙ্গে তোমার সম্বন্ধ কি । দারা তোমার প্রভু ছিলেন—যখন তিনি পুরস্কার দিতে পারতেন, বেত্রাঘাত কর্তে পারতেন ।

যশোবন্ত । আমাকে !

মহামায়া । হায় মহারাজ ! 'ছিলেন' এর কি কোন মূল্য নাই ? 'অতীতকে কি একেবারে লুপ্ত করে' দিতে পারো ? বর্তমান থেকে একেবারে কি তাকে বিচ্ছিন্ন করে' দিতে পারো ? একদিন যিনি তোমার দয়াল প্রভু ছিলেন, আজ তোমার কাছে কি তাঁর কোন মূল্য নাই ? ধিক !

যশোবন্ত । মহামায়া ! তোমার সঙ্গে আমার তর্ক করবার সম্বন্ধ

য। আমি যা উচিত বিবেচনা করছি তাই করে' যাচ্ছি। তোমার কাছে উপদেশ চাই না।

মহামায়া। তা চাইবে কেন? যুদ্ধে পরাজিত হ'য়ে ফিরে এসে, ঈশ্বাসঘাতক হয়ে ফিরে এসে, কৃতঘ্ন হয়ে ফিরে এসে—তুমি চাও আমার ভক্তি! না?

যশোবন্ত। সে কি বড় বেশী প্রত্যাশা মহামায়া?

মহামায়া। না সম্পূর্ণ স্বাভাবিক! ক্ষত্রিয় বীর তুমি—ক্ষত্রকুলের সম্মাননা করেছে! জানো সমস্ত রাজপুতনা তোমায় ধিক্কার দিচ্ছে। শুনে যে ঔরঞ্জীবের শঙ্কর সাহা নাবাজ দারার পক্ষ হ'য়ে তার জামাতার পক্ষে যুদ্ধ ক'রে মৃত্যুকে আলিঙ্গন করল, আর তুমি দারাকে আশা দিয়ে গবে কাপুরুষের মত সরে দাঁড়ালে!—হায় স্বামী! কি বলবো তোমার এই অপমানে আমার শিরায় অগ্নিশ্রোত ব'য়ে যাচ্ছে, কিন্তু সে অপমান তোমাকে স্পর্শও করছে না! আশ্চর্য্য বটে।

যশোবন্ত। মহামায়া—

মহামায়া। আর কেন! যাও, তোমার নূতন প্রভু ঔরঞ্জীবের কাছে যাও।

সরোবে প্রস্থান

যশোবন্ত। উত্তম! তাই হবে। এতদূর অবজ্ঞা! বেশ তাই হবে।

প্রস্থান

পঞ্চম দৃশ্য

স্থান—আগ্রার প্রাসাদে সাজাহানের কক্ষ। কাল—রাত্রি

সাজাহান ও জাহানারা

সাজাহান। আবার কি দুঃসংবাদ কণ্ঠা! আর কি বাকি আছে? দারা আবার পরাজিত হয়ে বাথরের দিকে পালিয়েছে। সূজা বনু আরাকানের রাজার গৃহে সপরিবারে ভিক্ষুক। মোরাদ গোয়ালিয়র দুর্গে বন্দী। আর কি দুঃসংবাদ দিতে পারো কণ্ঠা?

জাহানারা। বাবা! এ আমারই দুর্ভাগ্য যে আমিই আপনার নিকট রোজ দুঃসংবাদের বস্তা বহে' আনি। কিন্তু কি করব বাবা! দুর্ভাগ্য একা আসে না!

সাজাহান। বল। আর কি?

জাহানারা। বাবা, ভাই দারা ধরা পড়েছে!

সাজাহান। ধরা পড়েছে?—কি রকমে ধরা পড়লো?

জাহানারা। জিহন খাঁ তাকে ধরিয়ে দিয়েছে।

সাজাহান। জিহন খাঁ! জিহন খাঁ! কি বল্ছিস্ জাহানারা?

জিহন খাঁ!

জাহানারা। হাঁ বাবা।

সাজাহান। পৃথিবীর কি অন্তিম সময় ঘনিষে এসেছে?

জাহানারা। শুনলাম, পরশু দারা আর তার পুত্র সিপারকে এক কঙ্কালসার হাতীর পীঠে বসিয়ে দিল্লীনগর প্রদক্ষিণ করিয়ে আনা হয়েছে। তাদের পরিধানে ময়লা শাদা কাপড়। তাদের এই অবস্থা দেখে সেই রাজপুরীর একটা লোক নেই যে কাঁদে নি।

সাজাহান। তবু তাদের মধ্যে কেউ দারাকে উদ্ধার করতে ছুটলো না? কেবল শশকের মত ঘাড় উচু করে দেখলে। তারা কি পাষণ!

জাহানারা। না বাবা! পাষণ্ড উত্তপ্ত হয়। তারা পাক।
ঔরংজীবের ভাড়া করা বন্দুকগুলি দেখে তারা সব ত্রস্ত; যেন একটা
বাহুকরের মস্তমুগ্ধ; কেউ মাথা তুলতে সাহস করছে না। কাঁদছে—
তাও মুখ লুকিয়ে—পাছে ঔরংজীব দেখতে পায়।

সাজাহান। তার পর।

জাহানারা। তার পরে ঔরংজীব দারাকে খিজিরাবাদে একটা জঘন্য
গৃহে বন্দী করে' রেখেছে।

সাজাহান। আর সিপার আর জহরৎ ?

জাহানারা। সিপার তার পিতার সঙ্গ ছাড়ে নি। জহরৎ এখন
ঔরংজীবের অন্তঃপুরে।

সাজাহান। ঔরংজীব এখন দারাকে নিয়ে কি করবে জানিস্ ?

জাহানারা। কি করবে তা জানি না—কিন্তু—কিন্তু—

সাজাহান। কি জাহানারা!

জাহানারা। যদি তাই করে বাবা!

সাজাহান। কি! কি জাহানারা? মুখ ঢাকছিস্ যে! তা—
কি সম্ভব!—তাই কি তাইকে হত্যা করবে।

জাহানারা। চুপ্। ও কার পদশব্দ! শুন্তে পেয়েছে।—বাবা
আপনি কি করলেন। কি করলেন!

সাজাহান। কি করেছি?

জাহানারা। ও কথা উচ্চারণ করলেন!—আর রক্ষা নাই।

সাজাহান। কেন?

জাহানারা। হয়ত ঔরংজীব দারাকে হত্যা কর্ত না। হয়ত এত
ষড় পাতক তারও মনে আসতো না। কিন্তু আপনি সে কথা তার মনে
করিবে দিলেন! কি করলেন! কি করলেন! সর্বনাশ করেছেন!

সাজাহান । ঔরঞ্জীব ত এখানে নাই । কে শুনেছে ?

জাহানারা । সে নাই, কিন্তু এই দেওয়াল ত আছে, বাতাস ত আছে, এই প্রদীপ ত আছে । আজ সব যে তার সঙ্গে যোগ দিয়েছে ! আপনি ভাবছেন যে এ আপনার প্রাসাদ ?—না, ঔরঞ্জীবের পাষণ্ড হৃদয় । ভাবছেন এ বাতাস ? তা নয়, এ ঔরঞ্জীবের বিষাক্ত নিশ্বাস ! এ প্রদীপ নয়—এ তার চক্ষুর জ্বলাদ দৃষ্টি । এ প্রাসাদে, এ রাজপুরে, এ সাম্রাজ্যে, আপনার আমার একজন বন্ধু আছে ভেবেছেন বাবা ? না, নেই ! সব তার সঙ্গে যোগ দিয়েছে । সব খোসামুদের দল ! জোচোরের দল !—ঐ কার ছায়া ?

সাজাহান । কে ?

জাহানারা । না কেউ নয় ।—ওদিকে কি দেখছেন বাবা !

সাজাহান । দেব লাফ ?

জাহানারা । সে কি বাবা !

সাজাহান । দেখি যদি দারাকে রক্ষা করতে পারি ।—তাকে তা'রা হত্যা করতে যাচ্ছে । আর আমি এখানে নারার মত, শিশুর মত নিরুপায় । চোখের উপরে এই সব দেখছি অথচ খাচ্ছি, ঘুমোচ্ছি, বেঁচে রয়েছি কিছু করছি না !—দেই লাফ ।

জাহানারা । সে কি বাবা ! এখান থেকে লাফ দিলে যে নিশ্চিত মৃত্যু !

সাজাহান । হ'লেই বা ! দেখি যদি বাঁচাতে পারি ।—যদি পারি ।

জাহানারা । বাবা ! আপনি জ্ঞান হারিয়েছেন ? মরে' গেলে আর দারাকে রক্ষা করবেন কি করে' ?

সাজাহান । তা বটে ! তা বটে ! আমি মরে' গেলে দারাকে বাঁচাবো কি করে' ? ঠিক বলেছি । তবে—তবে—আচ্ছা একবার ঔরঞ্জীবকে এখানে নিয়ে আসতে পারি নু নে জাহানারা ?

জাহানারা। না বাবা, সে আসবে না। নইলে আমি যে নারী—
আমি তার সঙ্গে হাতে হাতে লড়ে' দেখতাম। সেদিন মুখোমুখি হয়ে'
পড়েছিলাম, কিছু করতে পারি নি। সেই জন্ম এখন আমার পর্যন্ত আর
বাহিরে যাবার হুকুম নেই। নইলে একবার হাতে হাতে লড়ে' দেখতাম!

সাজাহান। দিই লাফ! ছেবো লাফ?

লক্ষ্যপ্রদানে উত্তত

জাহানারা। বাবা, উন্নত হবেন না।

সাজাহান। সত্যই ত। আমি পাগল হ'য়ে যাচ্ছি নাকি!—না না
না। আমি পাগল হব না! ঈশ্বর! এই শীর্ণ দুর্বল জরাজীর্ণ নেহাইৎ
অসহায় সাজাহানকে দেখ ঈশ্বর! তোমার দয়া হচ্ছে না? দয়া হচ্ছে
না? পুত্র পিতাকে বন্দী করে' রেখেছে—যে পুত্র তার ভয়ে একদিন
কাপতো—এতখানি অবিচার, এতখানি অত্যাচার, এতখানি অস্বাভাবিক
ব্যাপার তোমার নিয়মে সৈছে? সৈতে পার্ছে? আমি এমন কি পাপ
করেছিলাম খোদা—যে আমার নিজের পুত্র—ওঃ!

জাহানারা। একবার যদি এখন তাকে মুখোমুখি পাই তা হলে'—

দস্তর্ভগ

সাজাহান। মমতাজ! বড় ভাগ্যবতী তুমি, যে এ মর্মান্বিত দৃশ্য
তোমায় দেখতে হচ্ছে না। বড় পুণ্যবতী তুমি, তাই তুমি আগেই মরে'
গিয়েছো—জাহানারা!

জাহানারা। বাবা!

সাজাহান। তোকে আশীর্বাদ করি—

জাহানারা। কি বাবা!

সাজাহান। যেন তোর পুত্র না হয়, শত্রুরও যেন পুত্র না হয়।

এই বলিয়া সাজাহান চলিয়া গেলেন।

জাহানারা বিপরীত দিকে চলিয়া গেলেন

সর্ব দশা

ঔরঞ্জীব একখানি পত্রিকা হস্তে বেড়াইতেছিলেন

ঔরঞ্জীব। এই দারার মৃত্যুদণ্ড।—এ কাজীর বিচার!—আমার অপরাধ কি!—আমি কিঙ্ক—না, কেন—এ বিচার! বিচারকে কলুষিত করি কেন!—এ বিচার।

দিলদারের প্রবেশ

দিলদার। এ হত্যা!

ঔরঞ্জীব (চমকিয়া) কে!—দিলদার!—তুমি এ সময় এখানে?

দিলদার। আমি ঠিক সময়ে ঠিক জায়গায় আছি জাঁহাপনা। দেখে নেবেন। আর আমি যদি এখানে না থাকতাম, তা হ'লেও এ হত্যা—

ঔরঞ্জীব। (কম্পিত স্বরে) হত্যা!—না দিলদার, এ কাজীর বিচার।

দিলদার। সত্ৰাট, স্পষ্ট কথা বল্বো?

ঔরঞ্জীব। বল।

দিলদার। সত্ৰাট! আপনি হঠাৎ কেঁপে উঠলেন যে! আপনার স্বর যেন শুষ্ক বাতাসের উচ্ছ্বাসের মত বেরিয়ে এলো। কেন জাঁহাপনা!—সত্য কথা বল্বো?

ঔরঞ্জীব। দিলদার!

দিলদার। সত্য কথা—আপনি দারার মৃত্যু চান।

ঔরঞ্জীব। আমি?

দিলদার। হাঁ—আপনি।

ঔরঞ্জীব। কিঙ্ক এ কাজীর বিচার।

দিলদার। বিচার। জাঁহাপনা, সে কাজীরা যখন দারার মৃত্যুদণ্ড

উচ্চারণ করিছিল, তখন তা'রা ঈশ্বরের মুখের দিকে চেয়ে ছিল না। তখন তা'রা জাঁহাপনার সহস্র মুখখানি কল্পনা করিছিল ; আর সঙ্গে সঙ্গে মনে মনে তাঁদের গৃহিণীদের নূতন অলঙ্কারের ফর্দ করিছিল। বিচার !—সেখানে মাথার উপর প্রভুর আরক্ত চক্ষু চেয়ে আছে, সেখানে আবার বিচার ! জাঁহাপনা ভাবছেন যে সংসারকে খুব ধাপ্লা দিলেন। সংসার কিন্তু মনে মনে খুব বুঝলো ; কেবল ভয়ে কথাটি কইল না। জোর করে' মানুষের বাকরোধ কর্তে পারেন, তাকে গলা টিপে মেরে ফেলতে পারেন ; কিন্তু কালোকে শাদা কর্তে পারেন না। সংসার জানবে, ভবিষ্যৎ জানবে যে বিচারের ছল করে' আপনি দারাকে হত্যা করিয়েছেন—আপনার সিংহাসনকে নিরাপদ করবার জন্তু।

ঔরঞ্জীব। সত্য না কি !—দিলদার, তুমি সত্য কথা বলেছো ! তুমি আজ দারাকে বাঁচালে ! তুমি আমার পুত্র মহম্মদকে কিরিয়ে দিয়েছো। আজ আমার ভাই দারাকে বাঁচালে ! যাও, শায়েষ্টা খাঁকে ডেকে দাও।

দিলদারের প্রস্থান

ঔরঞ্জীব। দারা বাঁচুন, আমার যদি তার জন্তু সিংহাসন দিতে হয় দেব ! এতখানি পাপ—বাক, এ মৃত্যুদণ্ড ছিঁড়ে ফেলি—(ছিঁড়িতে উদ্যত) না, এখন না। শায়েষ্টা খাঁর সম্মুখে এটা ছিঁড়ে এ মহত্বটুকু কাশে লাগাবো—এই যে শায়েষ্টা খাঁ।

শায়েষ্টা খাঁ ও জিহন খাঁর প্রবেশ ও অভিবাদন

ঔরঞ্জীব। সেনাপতি ! বিচারে ভাই দারার প্রাণদণ্ড হয়েছে।

জিহন। ঐ বুঝি সেই দণ্ডাজ্ঞা ? আমাকে দেন খোদাবন্দ, আমি নিজে কাজ হাসিল করে' আসছি ! কাফেরের প্রাণদণ্ড নিজ হাতে দেবার জন্তু আমার হাত সূড় সূড় করছে। আমার দেন।

ঔরঞ্জীব। কিন্তু তাঁকে মার্জনা করেছি।

শায়েষ্টা। সে কি জাঁহাপনা—এমন শত্রুকে মার্জনা!—আপনার প্রতিদ্বন্দী।

ঔরঞ্জীব। তা জানি। তার জন্মই তাকে মার্জনা করবার পরম গৌরব অনুভব করছি।

শায়েষ্টা। জাঁহাপনা! এ গৌরব ক্রয় কর্তে আপনার সিংহাসন-খানি বিক্রয় কর্তে হবে।

ঔরঞ্জীব। যে বাহুবলে এ সিংহাসন অধিকার করেছি, সেই বাহুবলেই তা রক্ষা করব।

শায়েষ্টা। জাঁহাপনা! একটা মহাবিপদকে ঘাড়ে করে' সমস্ত জীবন রাজ্য শাসন কর্তে হবে! জানেন সমস্ত প্রজা, সৈন্য, দারার দিকে? সেদিন দারার জন্ম তারা বালকের মত কেঁদেছে; আর জাঁহাপনাকে অভিশাপ দিয়েছে। তা'রা যদি একবার সুযোগ পায়—

ঔরঞ্জীব। কি রকমে?

শায়েষ্টা। জাঁহাপনা দারাকে অষ্ট প্রহর পাহারা দিতে পারেন না। জাঁহাপনা সফরে গেলে সৈন্যগণ যদি কোন দিন কোন সুযোগে দারাকে মুক্ত করে' দেয়—তাহ'লে জাঁহাপনা—বুঝছেন?

ঔরঞ্জীব। বুঝছি।

শায়েষ্টা। তার উপর বৃদ্ধ সম্রাটও দারার পক্ষে। আর তাঁকে সৈন্তেরা মানে তাদের গুরুর মত, ভালবাসে পিতার মত।

ঔরঞ্জীব। হঁ, (পরিক্রমণ) না হয় সিংহাসন দেবো!

শায়েষ্টা। তবে এত শ্রম করে' তা অধিকার করার প্রয়োজন কি ছিল? পিতাকে সিংহাসনচ্যুত, ভ্রাতাকে বন্দী—বড় বেশী দূর এগিয়েছেন জাঁহাপনা।

ঔরঞ্জীব। কিন্তু—

জিহন। খোদাবন্দ! দারা কাফের! কাফেরকে ক্ষমা করবেন আপনি? খোদাবন্দ! এই ইসলাম ধর্মের রক্ষার জন্য আপনি আজ ঐ সিংহাসনে বসেছেন—মনে রাখবেন। ধর্মের গর্যাদা রাখবেন।

ঔরঞ্জীব। ^{সত্য কথা} সত্য কথা জিহন খাঁ! আমি নিজের প্রতি সব অত্যাচার বিচার ঘাড় পেতে নিতে পারি। কিন্তু ইসলাম ধর্মের প্রতি অবমাননা—সেই সব না। শপথ করেছি—হাঁ, দারার মৃত্যুই তাঁর যোগ্য দণ্ড। জিহন আলি খাঁ, নেও মৃত্যুদণ্ড!—~~রোসো, দস্তখৎ করে~~ 'দিই। (দস্তখৎ)

জিহন। দিউন জাঁহাপনা! আজ রাত্রেই দারার ছিন্নমুণ্ড জাঁহাপনাকে এনে দেখাবো—বাহিরে আমার অশ্ব প্রস্তুত।

ঔরঞ্জীব। আজই!

শায়েষ্টা। (মৃত্যুদণ্ড ঔরঞ্জীবের হস্ত হইতে লইয়া) আপদ যত শীঘ্র যায় তত ভালো।

জিহনকে দস্তাজা দিচ্ছেন

জিহন। বন্দেগি জাঁহাপনা।

ঔরঞ্জীব। রোস দেখি। (দণ্ডাজা গ্রহণ, পাঠ ও প্রার্থনা) আচ্ছা—যাও।

~~জিহন সমনোদ্ধত হইলে, ঔরঞ্জীব আবার তাঁহাকে ডাকিলেন।~~

~~ঔরঞ্জীব। রোস। (দস্তাজা পুনরায় গ্রহণ ও পুনরায় প্রার্থনা)~~

~~আচ্ছা যাও।~~

৫৯ ১১৫ ৬২৫ জিহন আলির প্রস্থান

ঔরঞ্জীব। (আবার জিহনের দিকে গেলেন; আবার ফিরিলেন,

তার পরে ক্রণেক ভাবিলেন ; পরে कहিলেন) ~~না কাজ নেই !~~ জিহন
আলি ! জিহন আলি ! না চলে গিছে । শায়েস্তা থা ।

~~শায়েস্তা । খোদাবন্দা ।~~

~~ঐরংজীব ।~~ কি করাম !

শায়েস্তা । জাহাপনা ~~বুদ্ধিমানের কার্যই করেছেন ।~~

~~ঐরংজীব । কিন্তু যাক—~~

দ্বারে দ্বারে প্রস্থান

~~শায়েস্তা । ঐরংজীব ! তবে তোমারও একটা বিবেক আছে ?~~

প্রস্থান

সপ্তম দৃশ্য

স্থান—খিজিরাবাদের কুটার। কাল—রাত্রি

সিপার একটি শস্যার উপরে নিদ্রিত, দারা একাকী জাগিয়া

তাহার পানে চাহিয়া ছিল

দারা। ঘুমাচ্ছে—সিপার ঘুমাচ্ছে। নিদ্রা! সর্বসস্তাপহারিণী
নিদ্রা! আমার সিপারকে সর্ব দুঃখ ভুলিয়ে রেখে—বৎস প্রবাসে আমার
সঙ্গে হিমে উত্তাপে বড় কষ্ট পেয়েছে, তাকে তোমার যথাসাধ্য সাহায্য
দাও। আমি অক্ষম। সস্তানকে রক্ষা করা, খাও দেওয়া, বস্ত্র দেওয়া—
পিতার কাজ! তা আমি পারি নি—বৎস! তুই ক্ষুধায় অবসন্ন হয়েছিস্,
আমি খাও দিতে পারি নি। তৃষ্ণায় তোর ছাতি ফেটে গিয়েছে,
জলটুকু দিতে পারি নি। শীতে গাত্র বস্ত্র দিতে পারি নি—আমি
নিজে খেতে পাই নি, শুতে পাই নি। সে দুঃখ আমার বক্ষে সে রকম
কখন বাজে নি বৎস, যেমন তোর দুঃখ তোর দৈন্ত তোর অবমাননা
আমার বক্ষে বেজেছে! বৎস! প্রাণাধিক আমার, তোর পানে
আজ চেয়ে দেখছি, আর আমার মনে হচ্ছে আজ যে সংসারে আর
কেউ নেই—কেবল তুই আর আমি আছি। আমার এত দুঃখ, আজ
আমি কারাগারে বন্দী, তবু তোর মুখখানির পানে চাইলে সব দুঃখ
ভুলে যাই।

দিলদারের প্রবেশ

দারা। কে!—তুমি?

দিলদার। আমি—এ—কি দৃশ্য!

দারা। কে তুমি?

দিলদার। আমি ছিলাম পূর্বে সুলতান মোরাদের বিদূষক। এখন আমি সম্রাট ঔরঞ্জীবের সভাসদ।

দারা। এখানে কি প্রয়োজন ?

দিলদার। প্রয়োজন কিছুই নাই। একবার দেখা কর্তে এসেছি।

দারা। কেন যুবক ? আমাকে ব্যঙ্গ কর্তে ? কর।

দিলদার। না যুবরাজ ! আমি ব্যঙ্গ কর্তে আসি নি। আর যদিই বা ব্যঙ্গ কর্তে আসতাম, ত এ দৃশ্য দেখে, সে ব্যঙ্গ গলে' অশ্রু হ'য়ে টস্ টস্ করে' মাটিতে পড়তো—এই দৃশ্য ! সেই যুবরাজ দারা আজ এই ! (ভগ্নস্বরে) ভগবান্ !

দারা। এ কি (যুবক) তোমার চোখ দিয়ে জল পড়ছে যে—কাঁদছে!—কাঁদো !

[দিলদার। না কাঁদবো না ! এ বড় মহিমময় দৃশ্য !—একটা পর্বত ভেঙ্গে পড়ে' রয়েছে, একটা সমুদ্র শুকিয়ে গিয়েছে ; একটা সূর্য্য মলিন হয়ে' গিয়েছে। ব্রহ্মাণ্ডের একদিকে সৃষ্টি আর একদিকে ধ্বংস হয়ে' বাচ্ছে। সংসারেও তাই। এ একটা ধ্বংস—বিরাট, পবিত্র, মহিমময় !

দারা। তুমি একজন দার্শনিক দেখছি যুবক !

দিলদার। না যুবরাজ, আমি দার্শনিক নহি, আমি বিদূষক, পরিষদ-পদে উঠেছি, দার্শনিক-পদে এখনও উঠি নি। তবে ঘাস খেতে খেতে মাঝে মাঝে এক একবার মুখতুলে চাওয়ার নাম যদি দর্শন হয়, তা হলে' আমি দার্শনিক ! সাহাজাদা—মূর্খে ভাবে যে প্রদীপ জ্বলাই স্বাভাবিক, প্রদীপ নেভা অশ্রায় ; যে গাছ গজিয়ে ওঠাই উচিত, মরে' যাওয়া উচিত নয় ; যে মানুষের সুখটি ঈশ্বরের কাছে প্রাপ্য, দুঃখটি তাঁর অত্যাচার ! কিন্তু তা'রা একই নিয়মের দুইটি দিক ।

দারা। যুবক আমি তা ভাবি না।—তবু—হুঃখে হাসতে পারে কে ? মর্ত্তে' চায় কে ? আমি মর্ত্তে' চাই না !

দিলদার। যুবরাজ ! আপনার প্রাণদণ্ডের আঞ্জা আমি আজ রহিত করে' এসেছি। আপনি কারাগার হতে' মুক্ত হতে' চান যদি, 'আসুন তবে। আমার বস্ত্র পরিধান করুন—চলে' যান। কেউ সন্দেহ করবে না। আসুন দু'জনে বেশ পরিবর্তন করি।

দারা। তাবপরে তুমি !

দিলদার। আমি মর্ত্তে'ই চাই। মর্ত্তে' আমার বড় আনন্দ ! এ সংসারে কেউ নেই যে আমার জন্ত শোক করবে।

দারা। তুমি মর্ত্তে' চাও !!!

দিলদার। হাঁ, আমি মর্কবার একটা সুযোগ খুঁজছিলাম সাহাজাদা। মর্ত্তে' আমি বড় ভালোবাসি। আপনার কাছে যে আজ কি কৃতজ্ঞ হ'লাম তা আর কি বলবো।

দারা। কেন ?

দিলদার। মর্কবার একটা সুযোগ দেওয়ার জন্ত। আসুন।

দারা। দয়াময় ! এই-ই স্বর্গ ! আবার কি !—না যুবক। আমি যাবো না।

দিলদার। কেন ? মর্কবার এমন সুযোগও ভিক্ষা করে' পাবো না।
সাহাজাদা !

পদধারণ

দারা। আমি তোমায় মর্ত্তে' দিতে পারি না। আর বিশেষতঃ এই বালককে ছেড়ে আমি কোথাও যাবো না।

জিহ্ন খাঁর প্রবেশ

জিহ্ন। আর কোথাও যেতে হবে না। এই দারার প্রাণদণ্ডের আঞ্জা।

দিলদার। সে কি!

জিহন। মৃত্যুর জন্ত প্রস্তুত হউন সাহাজাদা। ঘাতক উপস্থিত।

দিলদার। তবে সশ্রীট মত বদলেছেন?

জিহন। হাঁ দিলদার! তুমি এখন অনুগ্রহ করে' বাহিরে যাও।
আমাদের কার্য—আমরা করি!

দারা। ঔরংজীব তার প্রকাণ্ড সাম্রাজ্যে নিঃশ্বাস ফেলবার জন্ত আমাকে আধকাঠা জমিও দিতে পারে না? আমি এই ~~অধম~~ কুঁড়ে ঘরে আছি, গায়ে এই ছেঁড়া ময়লা কাপড়, খাণ্ড খান-ছুই পোড়া রুটী। তাও সে দিতে পারে না?

দিলদার। তুমি আজ অপেক্ষা কর জিহন আলি! আমি সশ্রীটের আদেশ নিয়ে আসি।

জিহন। না দিলদার! সশ্রীটের এই আজ্ঞা যে আজই রাত্তিকালে সাহাজাদার ছিন্নমুণ্ড তাঁকে নিয়ে গিয়ে দেখাতে হবে।

দারা। আজই রাত্রে! এত শীঘ্র! এ মুণ্ড তার চাই-ই। নৈলে তার নিজায় ব্যাধাত হচ্ছে!—এ মুণ্ডের এত দাম আগে জাস্তাম না।

জিহন। আজই রাত্রে আপনার মুণ্ড না নিয়ে যেতে পারলে আমাদের প্রাণ বাবে!

দারা। ওঃ! তবে আর তুমি কি করবে জিহন ধাঁ। উত্তম! তবে আমায় বধ কর! যখন সশ্রীটের আজ্ঞা।—আজ কে সশ্রীট, কে প্রজা!
—হাসুছো? হাসো।

জিহন। আপনি প্রস্তুত?

দারা। প্রস্তুত বৈ কি! আর প্রস্তুত না হলেই বা তোমাদের কি যায় আসে। (দিলদারকে) একদিন এই জিহন আলি ধাঁ-ই আমার

কাছে করযোড়ে প্রাণভিক্ষা চেয়েছিল! আমি তা দিয়েছিলাম। আজ—
বিধি!—তোমার রচনা-কৌশল—চমৎকার!

জিহ্ন। সত্ৰাটের আজ্ঞা! কাজীর বিচার! আমি কি কর্তব্য
সাহজাদা?

দারা। সত্ৰাটের আজ্ঞা! কাজীর বিচার! তা বটে। তুমি কি
কর্বে! যাও বন্ধু! তোমার সঙ্গে আমার এই প্রথম আর এই শেষ দেখা।

দিলদার। পারলাম না। রক্ষা কর্তে পারলাম না যুবরাজ। তবে এই
বুঝি দয়াময়ের ইচ্ছা! (বুঝতে পারছি না! কিন্তু বুঝি, এর একটা মহৎ
ইদেগু আছে, এর একটা মহৎ পরিণাম আছে। নইলে এতখানি নিশ্চয়তা
এতখানি পাপ কি বুঝাই যাবে?—জেনো যুবরাজ! তোমার মত বলির
একটা প্রয়োজন নিশ্চয়ই আছে। কি সে প্রয়োজন আমি তা বুঝি
না। কিন্তু আছেই সে প্রয়োজন! হৃষ্টমনে প্রাণ বলি দাও।

দারা। নিশ্চয়ই, কিসের দুঃখ। একদিন ত যেতে হবেই! তবে
ছ'দিন আগে ছ'দিন পিছে! আমি প্রস্তুত। আমার বিদায় দাও
বন্ধু! তোমার সঙ্গে এই ক্ষণমাত্রের দেখা; তুমি কে তা জানি না, তবু
বোধ হচ্ছে যেন তুমি বহুদিনের পুরাতন বন্ধু।

দিলদার। তবে যান যুবরাজ! এখানে আমাদের শেষ দেখা।

এহান

দারা। এখন আমার বধ কর—জিহ্ন আমি।

জিহ্ন। নাজীর!

জিহ্নের ঘাতকের প্রবেশ

জিহ্ন সঙ্কেত করিল

দারা। একটু রোম। একবার—সিপার! সিপার!—না। কেন
ডাকলাম।

সিপার। (উঠিয়া) বাবা!—একি! এরা কা'রা বাবা!—আমার
ভয় কর্ছে।

দারা। এরা আমায় বধ কর্তে এসেছে। তোমার কাছে বিদায়
নেবার অস্ত্র তোমাকে জাগিইছি। আমাকে বিদায় দাও বৎস!
(আলিঙ্গন) এখন যাও।—জিহন খাঁ, তুমি বোধ হয় এত বড় পিশাচ নও,
যে আমার পুত্রের সম্মুখে আমায় বধ কর্বে! একে অস্ত্র ধরে নিয়ে যাও।

জিহন। (একজন ঘাতকে) একে ঐ ধরে নিয়ে যাও।

সিপার। (একজন ঘাতকের দারা ধৃত হইয়া) না, আমি যাবো
না। আমার বাবাকে বধ কর্বে! কেন বধ কর্বে! (ঘাতকের হাত
ছাড়াইয়া আসিল) বাবা—আমি তোমায় ছেড়ে যাবো না।

এই বলিয়া সিপার সজোরে দারার ~~হাত~~ ^{হাত} ছাড়াইয়া ধরিল

দারা। আমায় জড়িয়ে ধরে' কি কর্বে বৎস! আঁকড়ে ধরে' কি
আমাকে রক্ষা কর্তে পার্বে। যাও বৎস! এরা আমায় বধ কর্বে।
তুমি সে দৃশ্য দেখতে পার্বে না।

ঘাতক ~~হাত~~ চক্ষু মুছিতে লাগিল

জিহন। নিয়ে যাও।

ঘাতক পুনর্বার সিপারকে হেঁচড়াইয়া লইয়া যাইতে আসিল

সিপার। (চীৎকার করিয়া) না, আমি যাবো না। আমি যাবে
না—

এই বলিয়া সিপার সেই ঘাতকের হাত ছাড়াইবার চেষ্টা করিতে লাগিল

দারা। দাঁড়াও। আমি ওকে বুঝিয়ে বলছি। তার পরে ও আ
কোন আপত্তি কর্বে না—ছেড়ে দাও।

ঘাতক তাহাকে ছাড়িয়া দিল। সিপার দারার কাছে আসিয়া দাঁড়াইল

দারা। (সিপারের হাত ধরিয়া) সিপার!

সিপার। বাবা।

দারা। সিপার—প্রিয়তম বৎস আমার ! আমাকে বিদায় দে । তুই এতদিন এত দুঃখেও আমাকে ছাড়িস্ নি—হিমে, রোদ্রে, অনশনে, অনিদ্রায় আমার সঙ্গে অরণ্যে, মরুভূমে বেড়িইছিস্—তবু আমাকে ছাড়িস্ নি । আমি যন্ত্রণায় অন্ধ হ'য়ে তোর বুকে ছুরি মার্তে গিয়েছিলাম তবু আমায় ছাড়িস্ নি । আমার প্রবাসে, যুদ্ধে, কারাগারে, প্রাণের মত বুকের মধ্যে শোণিতের সঙ্গে মিশে ছিলাম, আমায় ছাড়িস্ নি ! আজ তোর নিষ্ঠুর পিতা—(বলিতে বলিতে দারার স্বর ভাঙ্গিয়া গেল । তাহার পরে বহুকষ্টে আত্মদমন করিয়া দারা কহিলেন)—তোর নিষ্ঠুর পিতা আজ তোকে ছেড়ে যাচ্ছে ।

সিপার। বাবা ! মা গিয়েছেন—তুমিও—

ক্রন্দন

দারা। কি কর্ক ! উপায় নাই বৎস ! আমায় আজ মার্তে' হবে । আমার দেহ ছেড়ে যেতে আজ আমার তত কষ্ট হচ্ছে না বৎস, তোকে ছেড়ে যেতে আজ আমার যে কষ্ট হচ্ছে । (চক্ষু মুছিলেন) যাও বৎস ! এরা আমাকে বধ করবে ! সে বড় ভীষণ দৃশ্য । সে দৃশ্য তুমি দেখতে পারবে না !

সিপার। বাবা ! আমি তোমাকে ছেড়ে যাবো—আমি যাবো না !

দারা। সিপার ! কখনও তুমি আমার কথার অবাধ্য হও নি ! কখনও ত—(চক্ষু মুছিলেন) যাও বৎস ! আমার শেষ আজ্ঞা—আমার এই শেষ অনুরোধ রাখো । যাও—আমার কথা শুনবে না ? সিপার, বৎস ! যাও ।

সিপার বতমুখে চলিয়া যাইতে উদ্ভত হইলে দারা ডাকিলেন—“সিপার !”

সিপার কিরিল

দারা। 'একবার—শেষবার বুকে ধ'রে নেই। (বক্ষে আলিঙ্গন)

ওঃ—এখন যাও বৎস!

সিপার মস্তমুগ্ধবৎ নতমুখে একজন ঘাতকের সহিত কক্ষান্তরে চলিয়া গেল

দারা। (উর্ধ্বমুখে বক্ষে হাত দিয়া) ঈশ্বর! পূর্বজন্মে কি মহাপাপ করেছিলাম! ওঃ যাক্, হয়ে' গিয়েছে। নাজীর তোমার কার্য্য কর।

জিহন। ঐ ঘরে নিয়ে গিয়ে কাজ শেষ করে' নিয়ে এসো, এখানে দরকার নাই

ঘাতকদের সহিত দারা গ্রহান করিলেন

জিহন। আমার প্রাণদাতার হত্যাটা সন্মুখে নাই দেখলাম।—ঐ কুঠারের শব্দ; ঐ মৃত্যুর আর্তনাদ।

নেপথ্যে। ও! ও! ও!

জিহন। যাক্ সব শেষ!

সিপার। (কক্ষান্তর হইতে) বাবা! বাবা! (দরজা ভাঙিতে চেষ্টা করিতে লাগিল)

ঘাতক দারার ছিন্নমুণ্ড লইয়া পুনঃপ্রবেশ করিল

জিহন। দাও, মুণ্ড আনায় দাও। আমি সত্ৰাটের কাছে নিয়ে যাবো।

পঞ্চম অঙ্ক

প্রথম দৃশ্য

স্থান—দিল্লীর দরবার গৃহ । কাল—প্রাত্ণ

ময়ূর সিংহাসনে ঔরঞ্জীব । সম্মুখে মীরজুমলা, শায়েস্তা খাঁ, যশোবন্ত সিংহ,
জয়সিংহ, দিল্লীর খাঁ ইত্যাদি

ঔরঞ্জীব । আমি প্রতিজ্ঞামত মহারাজকে গুর্জর প্রদেশ দিয়েছি ।
যশোবন্ত । তার বিনিময়ে জাঁহাপনাকে আমি আমার সেনা-সাহায্য
স্বৈচ্ছায় দিতে এসেছি ।

ঔরঞ্জীব । মহারাজ যশোবন্ত সিংহ ! ঔরঞ্জীব দু'বার কাউকে
বিশ্বাস করে না । তথাপি আমরা মহারাজ জয়সিংহের খাতিরে মাড়বার-
রাজকে সম্রাটের রাজভক্ত প্রজা হ'বার দ্বিতীয় সুযোগ দিব ।

জয়সিংহ । জাঁহাপনার অনুগ্রহ !

যশোবন্ত । জাঁহাপনা ! আমি বুঝেছি ; যে ছলেই হোক বা শক্তি-
লেই হোক, জাঁহাপনা যখন সিংহাসন অধিকার করে' সাম্রাজ্যে একটা
শাস্তিস্থাপন করেছেন, তখন কোনরূপে সে শাস্তিভঙ্গ কর্তে যাওয়া পাপ ।

ঔরঞ্জীব । আমি এ কথা মহারাজের মুখে শুনে সুখী হ'লাম ।
মহারাজকে এখন তবে আমাদের বন্ধুবর্গের মধ্যে গণ্য কর্তে পারি
বাধ হয় ?

যশোবন্ত । নিশ্চয় ।

ঔরঞ্জীব । উত্তম মহারাজ !—উজীরসাহেব ! সুলতান সূজা এখন
আরাকানরাজার আশ্রয়ে ?

শীরজুমলা। গোলাম তাঁকে আরাকানের সীমা পর্য্যন্ত প্রতাড়িত করে' রেখে এসেছে।

ঔরঞ্জীব। উজীরসাহেব, আমরা আপনার বাহুবলের প্রশংসা করি।—সেনাপতি! কুমার মহম্মদকে গোয়ালিয়র দুর্গে বন্দী করে' রেখে এসেছেন?

শায়েস্তা। খোদাবন্দ!

ঔরঞ্জীব। বেচারী পুত্র! কিন্তু জ্বরৎ জানুক যে আমাদের কাছে এক নীতি। পুত্র মিত্র বিচার নাই।

জয়সিংহ। নিঃসন্দেহে জাঁহাপনা।

ঔরঞ্জীব। হতভাগ্য দারার মৃত্যু আমাদের সমস্ত জয়কে স্তান করে' দিয়েছে। কিন্তু ভাই, পুত্র ষাউক, ধর্ম প্রবল হউক।—ভাই মোরাদ গোয়ালিয়র দুর্গে কুশলে আছেন, সেনাপতি?

শায়েস্তা। খোদাবন্দ!

ঔরঞ্জীব। মূঢ় ভাই। নিজের দোষে সাম্রাজ্য হারালে! আর আমি মক্কাযাত্রার মহামুখে বঞ্চিত হ'লাম!—খোদার ইচ্ছা।—দিলীর খাঁ! আপনি কুমার সোলেমানকে কি রকমে বন্দী করলেন?

দিলীর। জাঁহাপনা! শ্রীনগরের রাজা পৃথ্বীসিংহ কুমারকে সসৈন্য আশ্রয় দিতে অস্বীকৃত হন। তা'তে কুমার আমাদের পরিত্যাগ কর্তে বাধ্য হ'লেন। আমি তার পরেই জাঁহাপনার পত্র পেয়ে রাজার সঙ্গে সাক্ষাৎ করে' জাঁহাপনার আদেশ মত বললাম যে “কুমার সশ্রাটের ভ্রাতৃপুত্র, সশ্রাট তাঁকে পুত্রবৎ স্নেহ করেন, তাঁকে সশ্রাটের হস্তে সমর্পণ করায় ক্ষত্রধর্মের অন্তথা হবে না।” শ্রীনগরের রাজা প্রথমে কুমারকে আমার হস্তে অর্পণ কর্তে অস্বীকৃত হ'লেন। পরদিনই তিনি কুমারকে রাজ্য থেকে বিদায় দিলেন। কারণ বুঝলাম না।

ঔরঞ্জীব। অভাগা কুমার! তার পর!

দিলীর। কুমার তিব্বত যাবার উদ্দেশ্যে যাত্রা করেন। কিন্তু পথ না জানার দরুন সমস্ত রাত্রি ঘুরে প্রভাতে আবার শ্রীনগরের প্রান্তে এসে উপস্থিত হন। তার পর আমি সসৈন্তে গিয়ে—তাকে বন্দী করি—এতে আমার যদি কোন অপরাধ হয়ে থাকে, খোদা আমায় রক্ষা করুন! আমি ব্যক্তি বিশেষের ভৃত্য নহি? আমি সম্রাটের সৈন্যধ্যক্ষ। সম্রাটের আজ্ঞা পালন কর্তে আমি বাধ্য!

ঔরঞ্জীব। তাকে এখানে নিয়ে আসুন খাঁ সাহেব!

দিলীর। যে আজ্ঞে!

এস্থান

ঔরঞ্জীব। জিহন আলি খাঁকে নাগরিকগণ হত্যা করেছে মহারাজ?

জয়সিংহ। হাঁ খোদাবন্দ! শুন্লাম জিহন খাঁরই প্রজারা তাকে হত্যা করেছে!

ঔরঞ্জীব। পাপাত্মার সমুচিত দণ্ড খোদা দিয়েছেন!—এই যে কুমার!

সোলেমান সম্ভিাবাহারে দিলীর খাঁর পুনঃ প্রবেশ

এই যে ~~কুমার~~—কুমার সোলেমান!—কি কুমার! শির নত করে' রয়েছে যে?

সোলেমান। সম্রাট—(বলিতে বলিতে শুরু হইলেন)

ঔরঞ্জীব। বল, কি বলছিলে বল বৎস!—তোমার কোন ভয় নাই। তোমার পিতার মৃত্যুর আবশ্যক হয়েছিল। নহিলে—

সোলেমান। জাঁহাপনা, আমি আপনার কৈফিয়ৎ চাহি নাই। আর দিগ্বিদায়ী ঔরঞ্জীবের আর কারো কাছে কৈফিয়ৎ দেবারও প্রয়োজন নাই। কে বিচার করবে! আমাকে বধ করুন। জাঁহাপনার ছুরিতে যথেষ্ট ধার আছে, তাতে বিষ মেশানোর প্রয়োজন কি!

ঔরঞ্জীব । সোলেমান ! আমরা তোমাকে বধ করব না । তবে—
 সোলেমান । ও ‘তবে’র অর্থ জানি সম্রাট ! মৃত্যুর চেয়ে ভীষণ
 একটা কিছু করতে চান । সম্রাটের মনে যদি একটা নিষ্ঠুর কার্য করার
 প্রবৃত্তি জাগে, ত শত্রুর তার বাড়ি আর কোন ভয় নেই । কিন্তু যদি
 দু’টো নিষ্ঠুর কার্য তাঁর মনে পড়ে, তবে যেটি বেশী নিষ্ঠুর সেইটেই
 ঔরঞ্জীব করবেন তা জানি । তাঁর প্রতিহিসার চেয়ে তাঁর দয়া ভয়ঙ্কর ।
 আদেশ করুন সম্রাট—তার—

ঔরঞ্জীব । ফুক হয়ো না কুমার ।

সোলেমান । না ! আর কেন—ও । মানুষ এমন মৃদু কথা কৈতে
 পারে, আর এত বড় দুরাশ্রা হ’তে পারে ।

ঔরঞ্জীব । সোলেমান, তোমার আমরা পীড়ন করতে চাই না ।
 তোমার কোন ইচ্ছা থাকে যদি ত বল । আমি অনুগ্রহ করব ।

সোলেমান । আমার এক ইচ্ছা যে জাঁহাপনা আমাকে বধাসাধ্য
 পীড়ন করুন । আমার পিতৃহন্তার কাছে আমি করুণার এক কণাও
 চাই না ।—সম্রাট ! মনে করে’ দেখুন দেখি যে কি করেছেন ?
 নিজের ভাইকে—একই মায়ের গর্ভের সন্তান, একই পিতার স্নেহসিক্ত
 নয়নের তলে লালিত, শিরায় একই রক্ত—যার চেয়ে সংসারে আপন
 আর কেউ নেই—সেই ভাইকে আপনি হত্যা করেছেন । [যে শৈশবে
 জীড়ার সঙ্গী, যৌবনে স্নেহময় সহপাঠী ; যার প্রতি কেউ রোষকটাক্ষ
 করলে সে কটাক্ষ নিজের বক্ষে বজ্রসম বাজা উচিত ; যাকে আঘাত থেকে
 রক্ষা করার জন্ত নিজের বুক এগিয়ে দেওয়া উচিত ; তাকে—তাকে
 আপনি হত্যা করেছেন । আর এ এমন ভাই !] আপনি চাইলে এ
 সাম্রাজ্য আপনাকে যিনি এক মুঠো ধুলার মত কেলো দিতে পারেন, যিনি
 আপনার কোন অনিষ্ট করেন নি, যার একমাত্র অপরাধ যে তিনি

সর্বজনশ্রিয়—এমন ভাইকে আপনি হত্যা করেছেন। পরকালে যখন তাঁর সঙ্গে দেখা হবে, তাঁর মুখপানে চাইতে পারবেন?—হিংস্র! পিশাচ! শয়তান!—তোমার অনুগ্রহে আমি পদাঘাত করি!

ঔরঞ্জীব। তবে তাই হোক। আমি তবে তোমার প্রাণদণ্ডের আজ্ঞা দিলাম!—নিয়ে যাও। (অবতরণ) আল্লার নাম কর সোলেমান।

বালকবেশিনী জহরৎ উরিসার প্রবেশ

জহরৎ। আল্লার নাম কর ঔরঞ্জীব।

সোলেমান তাহার হাত ধরিলেন

সোলেমান। এ কে? জহরৎ উরিসা!!!

জহরৎ। ছেড়ে দাও। কে তুমি? পাপাত্মাকে আমি বধ করবো।
ছেড়ে দাও—দাও!!

সোলেমান। সে কি জহরৎ! ক্রান্ত হও—হত্যার প্রতিশোধ হত্যা নয়। পাপে পুণ্যের প্রতিষ্ঠা হয় না। আমি পার্ভাম ত সম্মুখ যুদ্ধে এর শির নিতাম। কিন্তু হত্যা—মহাপাপ।

জহরৎ। ভীক সব! পিতার কুলান্নার পুত্রগণ!—চলে' যাও! আমি আমার পিতার বধের প্রতিশোধ নেবো! ছেড়ে দাও ঐ—ভণ্ড, দস্যু, যাতক—

যুদ্ধিত হইয়া পড়িল

ঔরঞ্জীব। মহৎ উদার যুবক!—যাও তোমার আমি বধ করব না! শান্তেতা ধী, একে গোয়ালিয়র দুর্গে নিয়ে যাও।—আর দারার কস্তাকে আমার পিতার নিকটে আশ্রয় প্রসাদ-দুর্গে নিয়ে যাও।

দ্বিতীয় দৃশ্য

স্থান—আরাকান রাজপ্রসাদ । কাল—রাত্রি

সূজা ও পিয়ারা

সূজা । নিয়তি আমাদের তাড়িয়ে নিয়ে এসে শেষে যে এই বস্তু
আরাকানের রাজার আশ্রয়ে এনে ফেলবে তা কে জানতো ?

পিয়ারা । আবার কোথায় যে নিয়ে যাবে তাই বা কে জানে ?

সূজা । বস্তু রাজা কি রটিয়েছে জানো ?

পিয়ারা । কি ! খুব জঁকালো রকম কিছু একটা নিশ্চয় । শীঘ্র
বল কি রটিয়েছে । শুনবার জন্ত হাঁপিয়ে মরে' যাচ্ছি !

সূজা । বর্বর রটিয়েছে যে আমি চল্লিশ জন অশ্বারোহী নিয়ে
এসেছি—আরাকান জয় কর্তে ।

পিয়ারা । বিশ্বাস কি !—শুনেছি বক্তার খিলিখি সতের জন
অশ্বারোহী নিয়ে বাঙ্গালা দেশ জয় করেছিলেন ।

সূজা । অসম্ভব । ওটা কেউ বিদ্বেষবশে রটিয়েছে নিশ্চয় । আমি
বিশ্বাস করি না ।

পিয়ারা । তাতে ভারি যায় আসে ।

সূজা । পিয়ারা ! রাজা কি আজ্ঞা দিয়েছে জানো ? রাজা আমাদের
কাল প্রভাতে এখান থেকে চলে' যেতে আজ্ঞা দিয়েছে !

পিয়ারা । কোথায় ? নিশ্চয় তিনি আমাদের খুব একটা ভাল
স্বাস্থ্যকর জায়গার বন্দোবস্ত করেছেন ।

সূজা । পিয়ারা, তুমি কি কঠিন, ঘটনার রাজ্যে একবার ভুলেও এসে
নাম্বে না ? এতেও পরিহাস !

পিয়ারা । এতে পরিহাস কর্তে নেই বুঝি ? আগে বলতে হয়
আজ্ঞা, এই নেও গস্তীর হচ্ছি ।

সূজা। হাঁ গম্ভীর হ'য়ে শোনো। আর এক কথা শুনবে? শোনো যদি, চোখ ঠিকরে বেরিয়ে আসবে, ক্রোধে কণ্ঠরোধ হবে, সর্কাজে আগুন ছুটবে।

পিয়ারা। ও বাবা!

সূজা। তবে বলি শোনো!—ছুরাত্মা আমাদের আশ্রয়দানের মূল্য স্বরূপ কি চায় জানো? সে তোমাকে চায়!—কি শুক হয়ে' রৈলে ধে! কর পরিহাস।

পিয়ারা। নিশ্চয়! আমার রাজার প্রতি ভক্তি বেড়ে গেল। এই রাজা সমজদার বটে।

সূজা। পিয়ারা! ও রকম ক'রো না। আমি কেপে যাবো। এটা তোমার কাছে পরিহাস হতে' পারে, কিন্তু এ আমার কাছে মর্শশেল।—পিয়ারা! তুমি আমার কে তা জানো?

পিয়ারা। স্ত্রী বোধ হয়!

সূজা। না। তুমি আমার রাজ্য, সম্পদ, সর্কাজ—ইহকাল, পরকাল! আমি রাজ্য হারিয়েছি—কিন্তু এতদিন তার অভাব অনুভব করি নি—আজ করলাম।

পিয়ারা। কেন।

সূজা। যা আমার কাছে জীবন-মরণের কথা, তাই নিয়ে তুমি পরিহাস করছ!

পিয়ারা। না, এ বড় বাড়াবাড়ি; দোজপক্ষে অনেকে বিয়ে করে; কিন্তু তোমার মত কেউ উচ্ছন্ন যায় নি।

সূজা। না। আমি বুঝেছি! তুমি শুধু মুখে পরিহাস করছ। কিন্তু অন্তরে অন্তরে গুম্বরে মরে' যাচ্ছে। তোমার মুখে হাসি, চোখে জল।

পিয়ারা। ধরেছে! না। কে বলে আমার চোখে জল! এই নাও, (চক্ষু মুছিলেন) আর নেই।

সূজা। এখন কি কর্বে ভেবেছো?

পিয়ারা। আমায় বেচে দাও।

সূজা। পিয়ারা! যদি আমাকে ভালোবাসো ত ও মারাত্মক পরিহাস রেখে দাও। শোন—আমি কি কর্বে জানো?

পিয়ারা। না।

সূজা। আমিও জানি না! ঔরংজীবের দ্বারস্থ হব?—না। তার চেয়ে মৃত্যু ভালো। কি! কথা কচ্ছ না যে পিয়ারা!

পিয়ারা। ভাবছি।

সূজা। ভাবো।

পিয়ারা। (ক্ষণেক ভাবিয়া) কিন্তু পুত্র কন্তারা?

সূজা। কি?

পিয়ারা। কিছু না।

সূজা। আমি কি কর্বে জানো?

পিয়ারা। না।

সূজা। বুঝতে পারছি না। আত্মহত্যা কর্তে ইচ্ছা হয়—তবে তোমাকে ছেড়ে যেতে পারি না।

পিয়ারা। আর আমি যদি সঙ্গে যাই?

সূজা। সূখে মর্তে' পারি।—না আমার জন্ম তুমি মর্তে' যাবে কেন!

পিয়ারা। না তাই হোক।—কাল প্রভাতে আমাদের নির্বাসন নয়। কাল যুদ্ধ হবে। এই চল্লিশজন অস্বারোহী নিয়েই এক রাজ্য আক্রমণ কর; করে' বীরের মত মর। আমি তোমার পাশে দাঁড়িয়ে মরব। আর পুত্র কন্তারা—তারা নিজের মর্যাদা নিজে রক্ষা কর্বে আশা করি।—কি বল?

সূজা। বেশ। কিন্তু তাতে কি লাভ হবে ?

পিয়ারা। তদ্ভিন্ন উপায় কি ! তুমি মরে' গেলে আমাকে কে রক্ষা কর্কে ! আর তুমি এতদিন বীরের মত জীবন ধারণ করেছো, বীরের মত মর ! এই বস রাজাকে এই ঘৃণ্য প্রস্তাব করার যোগ্য প্রতিফল দাও।

সূজা। সেই ভালো। কাল তবে দু'জনে পাশাপাশি দাঁড়িয়ে মর্ক।

পিয়ারা। তবে আমাদের ইহজীবনের এই শেষ মিলন রাত্রি ?

সূজা। আজ তবে হাসো, কথা কও, গাও—বা দিয়ে আমাকে এতদিন ছেয়ে দিতে, বিরে বসে' থাকতে !—একবার শেষবার দেখে নেই, শুনে নেই। তোমার বীণাটি পাড়ো ! গাও—স্বর্গ মর্ত্যে নেমে আসুক ! বন্ধারে আকাশ ছেয়ে দাও। তোমার সৌন্দর্য্যে একবার এ অন্ধকারকে ধাঁধিয়ে দাও দেখি। তোমার প্রেমে আমাকে আবৃত করে দাও।—রোস, আমি আমার অস্বারোহীদের বলে' আসি। আজ সারা রাত্রি ঘুমাবো না।

প্রস্থান

পিয়ারা। মৃত্যু ! তাই হোক ! মৃত্যু—যেখানে সব ঐহিক আশার শেষ, সুখদুঃখের সমাধি ; মৃত্যু—যে গাঢ় নিদ্রা আর এখানে জাগে না, যে অন্ধকার এখানে আর প্রভাত হয় না ; যে শুষ্কতা এখানে আর ভাঙ্গে না। মৃত্যু মন্দ কি ! একদিন ত আছেই। তবে দিন থাকতে মরা ভালো। আজ তবে এই রূপ নির্ঝাণোন্মুখ শিখার মত উজ্জ্বলতম প্রভায় অলে' উঠুক ; এই গান তারস্বরে আকাশে উঠে নক্ষত্ররাজ্য লুঠে নিউক ; আজিকার সুখ বিপদের মত কেঁপে উঠুক ; আনন্দ দুঃখের মত কেঁপে উঠুক, সমস্ত জীবন একটি চুৎনে মরে' থাক। আজ আমাদের শেষ মিলন-রাত্রি।

প্রস্থান

তৃতীয় দৃশ্য

স্থান—আগ্রার মাজারাহানের প্রাসাদ-কক্ষ । কাল—রাত্রি

বাহিরে ঝটিকা বৃষ্টি বজ্র ও বিদ্যুৎ

মাজারাহান ও জহরৎ উন্মিতা

মাজারাহান । কার সাধ্য দারাকে হত্যা করে ? আমি সম্রাট মাজারাহান, আমি স্বয়ং তাকে পাহারা দিচ্ছি ! কার সাধ্য !—ঔরংজীব ? —তুচ্ছ ! আমি যদি চোখ রাখাই, ঔরংজীব ভয়ে কাঁপবে ! আমি যদি বলি ঝড় উঠুক ; ত ঝড় ওঠে ; যদি বলি যে বাজ পড়ুক, ত বাজ পড়ে !

মেঘগর্জন

জহরৎ । উঃ কি গর্জন ! বাহিরে পঞ্চভূতের যুদ্ধ বেধে গিয়েছে । আর ভিতরে এই অর্দ্ধোন্মাদ পিতামহের মনের মধ্যে সেই যুদ্ধ চলেছে ! (মেঘগর্জন) ঐ আবার !

মাজারাহান । অস্ত্র নাও, অস্ত্র নাও ! অসি, ভল্ল, তীর, কামান নিয়ে ছোটো ! তা'রা আসছে, তা'রা আসছে ।—যুদ্ধ কর ! রণবাণ বাজাও ! নিশান উড়াও ।—ঐ তা'রা আসছে । দূর হ, রক্তলোলুপ শয়তানের দূত ! আমায় চিনিস্ না ! আমি সম্রাট মাজারাহান ! সরে দাঁড়া ।

জহরৎ । ঠাকুর্দা, উত্তেজিত হবেন না ! চলুন আপনাকে গুইয়ে রেখে আসি ।

মাজারাহান । না । আমি সরে' গেলেই তা'রা দারাকে বধ করবে । —কাছে আসিস্ না খবর্দার !

[জহরৎ । ঠাকুর্দা—

মাজারাহান । কাছে আসিস্ না । তোদের নিঃশ্বাসে বিষ আছে ;

সে নিঃশ্বাস বন্ধ জ্ঞানার বাতাসের চেয়ে বিষাক্ত, পচা হাড়ের চেয়ে দুর্গন্ধ !
আরও এক পা এগোস্‌নে বলছি ।

জ্বরৎ । ঠাকুর্দা ! রাত্রি গভীর । শোবেন আস্থন ।

জাহানারার প্রবেশ

জাহানারা । কি করুণ দৃশ্য ! পিতৃহারা বালিকা পুত্রহারা বৃদ্ধকে
সাস্থনা দিচ্ছে । অথচ তার নিজের বুকের মধ্যে ধূ ধূ করে' আগুন জলে
ধাচ্ছে । কি করুণ ! দেখে যাও ঔরংজীব ! তোমার কীর্তি দেখে যাও ।

জ্বরৎ । পিসীমা ! তুমি উঠে এলে যে ?

জাহানারা । মেঘের গর্জনে ঘুম ভেঙে গেল !—বাবা আবার উন্মাদের
মত বকছেন ?

জ্বরৎ । হাঁ পিসীমা ।

জাহানারা । ঔষধ দিয়েছ ?

জ্বরৎ । দিয়েছি । কিন্তু এবার স্ত্রান হ'তে বিলম্ব হচ্ছে কেন
জানি না ।

সাজাহান । কে কর্লে ! কে কর্লে !

জ্বরৎ । কি ঠাকুর্দা !

সাজাহান । মেরেছে ! মেরেছে ! ঐ রক্ত ছুটে বেরোচ্ছে । ঘর ভেসে
গেল !—দেখি ! (ছুটিয়া গিয়া দারার কল্পিত-রক্তে হস্ত দু'খানি মাখিয়া)
এখনও গরম—ধোয়া উঠছে ।

জাহানারা । বাবা ! এত রাত্রি হয়েছে, এখনও শো'নু নি ?

সাজাহান । ঔরংজীব ! আমার পানে তাকিয়ে হাস্‌ছো ? হাস্‌ছো !
—না ছরাস্বা ! তোমায় শান্তি দিব । দাঁড়া ঘাতক ! হাত বোঁড়
করে' দাঁড়া !—কি ! কমা চাচ্ছিস্ ?—কমা ! কমা নাই ! আমার

পুত্র বলে' ক্ষমা কর্ব ভেবেছি!—না! তোকে তুযানলে দণ্ড কর্বার
আজ্ঞা দিলাম! যাও, নিয়ে যাও।

জাহানারা। বাবা, শো'ন্ গে যান্!

জহরৎ। আমুন দাদা আমার!

হাত ধরিলেন

সাজাহান। কি মমতাজ! তুমি ওর হ'য়ে ক্ষমা চাচ্ছ! না আমি
ক্ষমা কর্ব না। বিচার করেছি। দারাকে মেরেছে।

জাহানারা। না বাবা, মারে নি। ঘুমোন্ গে যান্।

সাজাহান। মারে নি? মারে নি—সত্য, মারে নি? তবে এ কি
দেখ্লাম। স্বপ্ন?

জাহানারা। হাঁ বাবা স্বপ্ন।

সাজাহান। তবু ভালো! কিন্তু বড় দুঃস্বপ্ন! যদি সত্য হয়!
—কি জহরৎ। কাঁদছি য়ে!—তবে এ স্বপ্ন নয়! স্বপ্ন নয়?—ও—
হো—হো—হো—হো—!

মেঘগর্জন

জহরৎ। একি হচ্ছে বাহিরে! আজ রাত্রিই কি পৃথিবীর শেষ
রাত্রি!—সব ক্ষেপে গিয়েছে, জল, অগ্নি, বায়ু, আকাশ, মাটি—সব
ক্ষেপে গিয়েছে।—উঃ কি ভয়ঙ্কর রাত্রি!

সাজাহান। এ সব কি জাহানারা?

জাহানারা। বাবা! রাত্রি গভীর! ঘুমোন্। আপনি ত উন্মাদ নন।

সাজাহান। না, আমি উন্মাদ নই। বুঝতে পেরেছি, বুঝতে
পেরেছি।—বাহিরে ও সব কি হচ্ছে জাহানারা?

জাহানারা। বাহিরে একটা প্রলয় বহে' যাচ্ছে। ঐ শুহুন বাবা—
মেঘের গর্জন! ঐ শুহুন—বৃষ্টির শব্দ। ঐ শুহুন বাতাসের ছন্দার!

মুহম্মুহঃ বজ্রধ্বনি হচ্ছে। বৃষ্টি জলপ্রপাতের মত নেমে আসছে। আর ঝঞ্ঝা সেই বৃষ্টির ধারা মুখে ছড়িয়ে দিচ্ছে।

সাজাহান। দে বেটা বা! খুব দে, খুব দে। পৃথিবী নীরব হয়ে' সব সহ্য করবে। ও তোদের জন্ম দিয়েছিল কেন!—ও তোদের বৃকে করে' মানুষ করেছিল কেন! তোরা বড় হইছিস্। আর মান্বি কেন!—ওর যেমন কর্ম তেমনি ফল! দে বেটা বা। কি করবে ও? রাশি রাশি গৈরিক জ্বালা উদ্ভগন করবে? করুক, সে গৈরিক জ্বালা আকাশে উঠে দ্বিগুণ জোরে তারই বৃকে এসে লাগবে। সে সমুদ্রতরঙ্গ তলে ক্রোধে ফুলে উঠবে! উঠুক, সে তরঙ্গ তার নিজের বৃকের উপরেই দীর্ঘশ্বাসে ছড়িয়ে পড়বে; তার অন্তর্নিরুদ্ধ বাষ্পে সে ভূমিকম্পে কেঁপে উঠবে? কিছু ভয় নেই! তাতে সে নিজেই কেটে যাবে। তোদের কিছু কর্তে পারবে না—অথর্ব বড়ী বেটা! ও বেটা কেবল শস্ত দিতে পারে, বারি দিতে পারে, পুষ্প দিতে পারে। আর কিছু পারে না। দে, ওর বৃকের উপর দিয়ে দলে' দলে' চষে' দিয়ে যা! ও কিছু কর্তে পারবে না—দে বেটা বা!—মা, একবার গর্জে' উঠতে পারো মা? প্রলয়ের ডাকে ডেকে, শত সূর্যের প্রভায় জলে উঠে, ফেটে চৌচির হ'য়ে—মহাশূন্তের মধ্যে দিয়ে একবার ছটকে যেতে পারো মা?—দেখি ওরা কোণায় থাকে?

দস্তগর্ষণ

জাহানারা। বাবা! বৃথা এই ক্রোধে কি হবে! শোবেন আসুন।

সাজাহান। সত্য মা—বৃথা! বৃথা! বৃথা!

মেঘগর্জন

জহরৎ। উঃ! কি রাত্রি পিসীমা! উঃ কি ভয়ঙ্কর!

সাজাহান। ইচ্ছা করছে জাহানারা, যে এই রাত্রির বড় বৃষ্টি

অন্ধকারের মাঝখান দিয়ে একবার ছুটে বেরোই। আর এই শাদা চুল ছিঁড়ে, এই বাতাসে উড়িয়ে এই বৃষ্টিতে ভাসিয়ে দিই। ইচ্ছা কর্ছে যে আমার বুকখানা খুলে বস্ত্রের সম্মুখে পেতে দিই। ইচ্ছা কর্ছে এখান থেকে আমার আত্মাকে টেনে ছিঁড়ে বা'র করে' তা ঈশ্বরকে দেখাই! ঐ আবার গর্জন!—মেঘ! বার বার কি নিষ্ফল গর্জন কর্ছ? তোমার আঘাতে পৃথিবীর বক্ষ খান খান করে' দিতে পারো? অন্ধকার? কি অন্ধকার হয়েছে! তোমার পিছনে ঐ সূর্য্য নক্ষত্রগুলোকে একেবারে গিলে খেয়ে ফেলতে পারো?

মেঘগর্জন

জাহানারা। ঐ আবার!

তিনজনে একত্রে। উঃ! কি রাত্রি!

চতুর্থ দৃশ্য

স্থান—গোয়ালিয়র দুর্গ। কাল—প্রভাত

সোলেমান ও মহম্মদ

সোলেমান। শুনেছো মহম্মদ! বিচারে কাকার প্রাণদণ্ড হয়েছে?

মহম্মদ। বিচারে নয় দাদা, বিচারের নামে। এক ব্যক্তি ছিলেন এই কাকা! আজ তাঁরও শেষ হ'লো!

সোলেমান। মহম্মদ! তোমার খণ্ডরের কিসে মৃত্যু হয়?

মহম্মদ। ঠিক জানি না! কেউ বলে তিনি সস্ত্রীক জলমগ্ন হ'ন; কেউ বলে তিনি সস্ত্রীক যুদ্ধে নিহত হ'ন। পুত্রকণ্ঠারা আত্মহত্যা করে।

সোলেমান। তা হ'লে তাঁর পরিবারের আর কেউ রৈল না!

মহম্মদ। না।

সোলেমান। তোমার স্ত্রী শুনেছে?

মহম্মদ। শুনেছে। কাল সারারাত্রি কেঁদেছে; ঘুমায় নি।

সোলেমান। মহম্মদ! তোমার এত বড় দুঃখ! সৈতে পার্ছ?

মহম্মদ। আর তোমার এ বড় সুখ! পিতামাতার উদ্দেশ্যে বেরিয়েছিলে; আর দেখা হ'লো না।

সোলেমান। আবার সে কথা মনে করিয়ে দিচ্ছ। মহম্মদ, তুমি এত নিষ্ঠুর!—তোমার পিতা কি তোমাকে এখানে পাঠিয়েছেন, আমাকে নিত্য এই রকমে দণ্ড কর্তে! কোথায় আমার সাস্বনা দেবে—

মহম্মদ। দাদা! যদি এই বন্ধের রক্ত দিলে তোমার কিছুমাত্র সাস্বনা হয় ত বল আমি ছুরি এনে এইক্ষণেই আমার বুকে বসিয়ে দিই।

সোলেমান। সত্য বলেছো মহম্মদ। এ দুঃখে সাস্বনা নাই। যদি সম্পূর্ণ বিশ্বাস এনে দিতে পারো, যদি অতীত একেবারে লুপ্ত করে দিতে পারো—দাও!

মহম্মদ । এমন কোন এক ঔষধ নাই কি দাদা ! এমন একটা বিধ নাই যে—

সোলেমান । ঐ দেখ মহম্মদ !—সিপারকে দেখ ।

সেতুর উপর সিপারের অবেশ

সোলেমান । ঐ দেখ ঐ বালককে—আমার ছোট ভাই সিপারকে দেখ । দেখ ঐ মূক স্থিরমূর্তি । বৃকের উপর বাহু বন্ধ করে' একদৃষ্টে দূর শূন্তের দিকে চেয়ে আছে—নির্ঝাক ! এমন ভয়ানক করুণ দৃশ্য কখনো দেখেছো মহম্মদ ?—এর পরে আর নিজের দুঃখের কথা ভাবতে পারো ?

মহম্মদ । উঃ কি ভয়ানক !—সত্য বলেছো ! আমাদের দুঃখ উচ্চারণ করা যায় ! কিন্তু এ দুঃখ বাক্যের অতীত । বালক যখন কাঁদে, তখন যদি কাছে একটা ভীষণ আর্তনাদ উঠে, অমনি বালকের ক্রন্দন ভয়ে থেমে যায় । তেমনই আমাদের দুঃখ এর কাছে ভয়ে নীরব হ'য়ে যায় ।

সোলেমান । ঐ দেখ চক্ষু দু'টি মুদ্রিত করে' দুই হস্ত মর্দন কর্ছে ! যেন যন্ত্রণার হাহাকার কর্তে চাচ্ছে, তবু বাক্যমুক্তি হচ্ছে না !—সিপার ! সিপার ! ভাই !

সিপার একবার সোলেমানের দিকে চাহিয়া পরে চলিয়া গেলেন

মহম্মদ । দাদা !

সোলেমান । মহম্মদ ।

মহম্মদ । আমার কমা কর !

সোলেমান । তোমার দোষ কি !

মহম্মদ । না দাদা, আমার কমা কর । এত পাপের ভার পিতা সৈতে পার্কেন না । তাই তার অর্ধেক ভার আমি নিজের ঘাড়ে নিলাম । আমি ঘোরন্তর পাপী । আমার কমা কর ।

ভানু পাতিলেন

সোলেমান । ওঠো ভাই । মহৎ, উদার, বীর ! তোমায় ক্ষমা করি
আমি ! তুমি যা সহিছ, স্বৈচ্ছায় ধর্মের জন্য সহিছ ! আমি শুধু হতভাগ্য ।

মহম্মদ । তবে বল আমার প্রতি তোমার কোনও বিদ্বেষ নাই । ভাই
বলে' আমায় আলিঙ্গন কর ।

সোলেমান । ভাই আমার ।

আলিঙ্গন

মহম্মদ । ঐ দেখ তা'রা কাকাকে বধ্যভূমিতে নিয়ে যাচ্ছে ।

সোলেমান সেই দিকে চাহিয়া রহিলেন ।—সেতুর উপরে অহরিগণ-বেষ্টিত
মোরাদ প্রবেশ করিলেন

মোরাদ । (উচ্চৈঃস্বরে) আল্লা ! আমার পাপের শাস্তি আমি
পাচ্ছি । দুঃখ নাই । কিন্তু ঔরঞ্জীব বাদ যায় কেন !

নেপথ্যে । কেউ বাদ যাবে না । নিস্তির ওজনে ফিরে যাবে !

সোলেমান । ও কার স্বর ?

মহম্মদ । আমার জ্বরী !

নেপথ্যে । তার যে শাস্তি আসছে, তার কাছে তোমার এ শাস্তি ত
পুরস্কার ।—কেউ বাদ যাবে না । কেউ বাদ যায় না ।

মোরাদ । (সোল্লাসে) তারও শাস্তি হবে ! তবে আমায় বধ্যভূমিতে
নিয়ে চল ! আর দুঃখ নাই—

সমগ্রী মোরাদ চলিয়া গেলেন

সোলেমান । মহম্মদ ! এ কি ! তুমি যে এক-দৃষ্টে ওদিকে চেয়ে
রয়েছো ? কি দেখছো ?

মহম্মদ । নরক । এ ছাড়া কি আরো একটা নরক আছে ! সে
কি রকম খোদা ?

পঞ্চম দৃশ্য

স্থান—ঔরংজীবের বহিঃকক্ষ । কাল—দ্বিপ্রহর রাত্রি

ঔরংজীব একাকী

ঔরংজীব । যা করেছি—ধর্মের জন্য । যদি অন্য উপায়ে সম্ভব হোত ।—(বাহিরের দিকে চাহিয়া) উঃ কি অন্ধকার !—কে দায়ী ? আমি ! এ বিচার, ও কি শব্দ ?—না বাতাসের শব্দ !—এ কি ! কোনমতেই এ চিন্তাকে মন থেকে দূর কর্তে পারছি না । রাতে তন্দ্রায় চলে পড়ি, কিন্তু নিদ্রা আসে না, (দীর্ঘনিঃশ্বাস) উঃ কি শুষ্ক ! এত শুষ্ক কেন !] (পরিক্রমণ ; পরে সহসা দাঁড়াইয়া) ও কি ! আবার সেই দারার ছিন্ন শির !—সূজার রক্তাক্ত দেহ !—মোরাদের কবর ! যাও সব । আমি বিশ্বাস করি না । ঐ তা'রা আবার ! আগায় ঘিরে নাচ্ছে !—কে তোমরা ? [জ্যোতির্ময়ী ধুমুশিখার মত মাঝে মাঝে আমার আগ্রত তন্দ্রায় এসে দেখা দিয়ে যাও]—চলে যাও—ঐ মোরাদের কবর আমার ডাকছে ; দারার মুণ্ড আমার পানে একদৃষ্টে চেয়ে আছে ; সূজা হাসছে—[এ কি সব]—ওঃ । (চক্ষু ঢাকিলেন ; পরে চাহিয়া) থাক ! চলে গিয়েছে !—[উঃ—দেহে ক্ষত রক্তশোত বইছে । মাথার উপর বেন পর্কতের ভার ।]

দিলদারের প্রবেশ

ঔরংজীব । (চমকিয়া) দিলদার ?

দিলদার । জাঁহাপনা ।

ঔরংজীব । এ সব কি দেখলাম ?—জানো ?

দিলদার। বিবেকের বনিকার উপর উত্তপ্ত চিন্তার প্রতিচ্ছবি।
—তবে আরম্ভ হয়েছে ?

ঔরঞ্জীব। কি ?

দিলদার। অনুতাপ ! জাস্তাম, হতেই হবে ! এত বড় অস্বাভাবিক
আচরণ—নিয়মের এত বড় ব্যতিক্রম—প্রকৃতির কি বেশী দিন সয় ?
সয় না।

ঔরঞ্জীব। নিয়মের কি ব্যতিক্রম দিলদার ?

দিলদার। এই বৃদ্ধ পিতাকে কারারুদ্ধ করে' রাখা ! জানেন
জাহাপনা, আপনার পিতা আপনার নিশ্চয়তায় আজ উন্মাদ !—তার
উপর উপস্থাপরি এই ভ্রাতৃহত্যা ! এত বড় পাপ কি অমনি যাবে ?

ঔরঞ্জীব। কে বলে আমি ভ্রাতৃহত্যা করেছি ? এ কাজীর বিচার !

দিলদার। চিরকালটা পরকে ছলনা করে' কি জাহাপনার বিশ্বাস
জন্মেছে যে নিজেকে ছলনা করতে পারেন ? সেইটেই সকলের চেয়ে
শক্ত। তাইকে টুঁটি টিপে মেরে ফেলতে পারেন। কিন্তু বিবেককে
শীঘ্র টুঁটি টিপে মারতে পারেন না ! হাজার তার গলা চেপে ধরুন, তবু
তার নিম্ন, গভীর আচ্ছাদিত ভয়ধ্বনি—হৃদয়ের মধ্যে, থেকে থেকে
বেজে উঠবে—এখন পাপের প্রায়শ্চিত্ত করুন।

ঔরঞ্জীব। যাও তুমি এখান থেকে ! কে তুমি দিলদার যে
ঔরঞ্জীবকে উপদেশ দিতে এসেছো ?

দিলদার। কে আমি ঔরঞ্জীব ? আমি মির্জা মহম্মদ নিয়ামৎ খাঁ !

ঔরঞ্জীব। নিয়ামৎ খাঁ হাজী !—এসিয়ার বিজ্ঞতম সূধী নিয়ামৎ খাঁ !

দিলদার। হাঁ ঔরঞ্জীব। আমি সেই নিয়ামৎ খাঁ। শোনো, আমি
রাজনীতিক অভিজ্ঞতা লাভের জন্য এসে, ঘটনাক্রমে এই পারিবারিক
বিগ্রহের আবর্তনের মধ্যে পড়েছিলাম ! সেই অভিজ্ঞতা লাভের জন্য জঘন্য

বিদূষক সেজেছি, একবার একটা সামান্য চাকুরীতেও নেমেছি। কিন্তু যে অভিজ্ঞতা নিয়ে আজ এখান থেকে বেরোচ্ছি—মনে হয় যে সেটুকু না নিয়ে গেলে ছিল ভালো। ঔরঞ্জীব! ভেবেছিলে যে আমি তোমার রৌপ্যের জন্য এতদিন তোমার দাসত্ব করছিলাম? বিদ্যার এখনও এ তেজ আছে যে সে ঐশ্বর্যের মস্তকে পদাঘাত করে। আমি চললাম সত্ৰাট।

গমনোচ্ছত

ঔরঞ্জীব। জনাব!

দিলদার। না, আমায় ফেরাতে পারবে না ঔরঞ্জীব!—আমি চললাম। তবে একটা কথা বলে' যাই। মনে ভাবছো যে এই জীবন-সংগ্রামে তোমার জয় হয়েছে? না, এ তোমার জয় নয় ঔরঞ্জীব। এ তোমার পরাজয়। বড় পাপের বড় শাস্তি!—[অধঃপতন। তুমি যত ভাবছো উঠছো, সত্যসত্যই তুমি তত পড়ছো। তারপর বন্ধন তোমার যৌবনের নেশা ছুটে যাবে, বন্ধন শাদা চোখে দেখবে যে নিজের আর স্বর্গের মধ্যে কি মহা ব্যবধান খনন করেছো, তখন তার পানে চেয়ে তুমি শিউরে উঠবে। মনে রেখো!

এস্থান

ঔরঞ্জীব নতলিরে বিপরীত দিকে চলিয়া গেলেন

ষষ্ঠ দৃশ্য

স্থান—আগ্রার প্রাসাদ-অলিঙ্গ। কাল—অপরাহ্ন

জাহানারা ও জহরৎ উন্নিসা বসিয়া পলক-করিতেছিলেন

জাহানারা। জহরৎ উন্নিসা! ঔরংজীবের মত এমন সোঁমা, মহাস্ত্র মনোহর পাষণ্ড দেখেছো কি মা!

জহরৎ। না। আমার একটা ভয় হয় পিসীমা! ভিতরে এত ক্রুর বাহিরে এত সরল; ভিতরে এত প্রবল, বাহিরে এত স্থির, ভিতরে এত বিষাক্ত, আর বাহিরে এত মধুর।—এও কি সম্ভব! আমার ভয় হয়!

জাহানারা। আমার কিন্তু একটা ভক্তি হয়। বিশ্বয়ে নির্ঝাঁক হ'য়ে বাই, যে মানুষ এমন হাসতে পারে—আর সঙ্গে সঙ্গে ব্যাঘ্রের লোলুপ চাহনি চাইতে পারে; এমন মূঢ় কথা কহিতে পারে—যখন সঙ্গে সঙ্গে অন্তরে বিদ্রোহের জালায় জলে যাচ্ছে; ঈশ্বরের কাছে এমন হাত জোড় কর্তে পারে—যখন ভিতরে নূতন শয়তানী মতলব করছে।—বলিহারি!

জহরৎ। ঠাকুর্দাকে এই বকম বন্দী করে' রেখেছেন, অথচ রাজকার্যে তাঁর উপদেশ চেয়ে পাঠাচ্ছেন। তাঁর সম্মুখে তাঁর পুত্রদের একে একে হত্যা করছেন—অথচ প্রতিবারই তাঁর কমা চেয়ে পাঠাচ্ছেন। যেন কত লজ্জা, কত সঙ্কোচ!—অদ্ভুত!—ঐ যে ঠাকুর্দা আসছেন।

সাজাহানের প্রবেশ

সাজাহান। দেখ কেমন সেজেছি জাহানারা, দেখ জহরৎ উন্নিসা। ঔরংজীব এ রত্ন সব পাছে চুরি করে' নেয়—তাই আমি পরে' পরে' বেড়াছি। কেমন দেখাচ্ছে! (জহরৎকে) আমাকে তোর বিষয়ে কর্তে ইচ্ছে হচ্ছে না?

জহরৎ। আবার জ্ঞান হারিয়েছেন! [উন্মত্ততা মাঝে মাঝে চক্রে উপর শরতের মেঘের মত এসে চলে' যাচ্ছে।

সাজাহান । (সহসা গম্ভীর হইয়া) কিন্তু খবর্দার ! বিয়ে করিস না । (নিম্নস্বরে) ছেলে হ'লে তাকে কয়েদ করে' রেখে দেবে, তোর গহনা কেড়ে নেবে । বিয়ে করিস না ।

জাহানারা । দেখ্‌ছো মা ! এ উন্মত্ততা নয় । এর সঙ্গে জ্ঞান জড়ানো রয়েছে । এ যেন একটা ছন্দে বিলাপ ।

জিহরৎ । জগতে যত রকম করুণ দৃশ্য আছে, জ্ঞানী উম্মাদের মত করুণ দৃশ্য বুঝি আর নাই । একটা সুন্দর প্রতিমা যেন ভেঙ্গে ছড়িয়ে পড়ে' রয়েছে ।—উঃ বড় করুণ ! চক্ষে বস্ত্র দিয়া প্রস্থান

সাজাহান । আমি উম্মাদ হই নাই জাহানারা ! গুছিয়ে বলতে পারি—চেষ্টা করলে গুছিয়ে বলতে পারি !

জাহানারা । তা জানি বাবা !

সাজাহান । কিন্তু আমার হৃদয় ভেঙ্গে গিয়েছে ! এত বড় দুঃখ বাড়ে করে' যে বেঁচে আছি, তাই আশ্চর্য্য । দারা, সূজা, মোরাদ—সবাইকে মার্লে ? আর তাদের একটা ছেলেও রৈল না প্রতিহিংসানিতে !—সব মার্লে ।

ঔরঞ্জীবের প্রবেশ

সাজাহান । এ কে ? (সভীত বিশ্বয়ে) এ—এয়ে সয়াট্ ।

জাহানারা । (আশ্চর্য্য) তাই ত, ঔরঞ্জীব

ঔরঞ্জীব । পিতা !

সাজাহান । আমার মণিমুক্তা নিতে এসেছ ! দেবো না, দেবো না !
এক্ষণই সব লোহার মুণ্ডুর দিয়ে গুঁড়ি করে' ফেলবো ।
গমনোচ্ছত

ঔরঞ্জীব । (সন্মুখে আসিয়া) না পিতা, আমি মণিমুক্তা নিতে আসি নি ।

জাহানারা। তবে বোধ হয় পিতাকে বধ কর্তে এসেছো। পিতৃ-
হত্যাটা আর বাকি থাকে কেন! হ'য়ে যাক।

সাজাহান। বধ কর্বে! আমায় হত্যা কর্বে! কর ঔরঞ্জীব!
আমাকে হত্যা কর! তার বিনিময়ে এই সব মণিমুক্তা তোমায় দেবো;
আর—মর্কবার সময় তোমায় এই অমুগ্রহের জন্ত আশীর্বাদ করে' মর্ক।
এই লোল বক্ষ খুলে দিচ্ছি। তোমার ছুরি বসিয়ে দেও।

ঔরঞ্জীব। (সহসা জাম্বু পাতিয়া) আমাকে এর চেয়ে আরও
অপরাধী কর্বেন না পিতা! আমি পাপী। ঘোরতর পাপী! সেই
পাপের প্রদাহে জলে' পুড়ে যাচ্ছি। দেখুন পিতা—এই শীর্ণ দেহ, এই
কোটরগত চক্ষু, এই শুষ্ক পাণ্ডুর মুখ তা'র সাক্ষ্য দিবে।

সাজাহান। শীর্ণ হ'য়ে গিয়েছে। সত্য, শীর্ণ হ'য়ে গিয়েছে।

জাহানারা। ঔরঞ্জীব! ভূমিকার প্রয়োজন নাই। এখানে একজন
আছে যে তোমায় বেশ জানে। নূতন কি শয়তানী মতলব করে এসেছো
বল! কি চাও এখানে?

ঔরঞ্জীব। পিতার মার্জনা।

জাহানারা। মার্জনা! এটা ত খুব নূতন রকম করেছে ঔরঞ্জীব।

ঔরঞ্জীব। আমি জানি ভগ্নী—

জাহানারা। শুরু হও।

সাজাহান। বলতে দেও জাহানারা। বল। কি বলতে চাও
ঔরঞ্জীব?

ঔরঞ্জীব। কিছু বলতে চাই না। শুধু আপনার মার্জনা চাই।

জাহানারা ব্যঙ্গ-হাসি হাসিলেন

ঔরঞ্জীব। (একবার জাহানারার পানে চাহিয়া পরে, সাজাহানকে
কহিলেন) যদি এ প্রার্থনা কপট বিবেচনা করেন, ত পিতা আম্বন

আমার সঙ্গে ; আমি এই দণ্ডে প্রাসাদ দুর্গের দ্বার খুলে দিচ্ছি ; আর আপনাকে আগ্রার সিংহাসনে সর্বজনসমক্ষে বসিয়ে সম্রাট ব'লে অভিষেক করছি । এই আমার রাজমুকুট আপনার পদতলে রাখলাম ।

এই বলিয়া ঔরঞ্জীব মুকুট খুলিয়া সাজাহানের পদতলে রাখিলেন

সাজাহান । আমার হৃদয় গলে' যাচ্ছে, গলে' যাচ্ছে ।

ঔরঞ্জীব । আমার ক্ষমা করুন পিতা ।

চরণদ্বয় জড়াইয়া ধরিলেন

সাজাহান । পুত্র !

ঔরঞ্জীবকে ধরিয়া উঠাইয়া পরে নিজের চক্ষু মুছিলেন

জাহানারা । এ উত্তম অভিনয় ঔরঞ্জীব !

সাজাহান । কথা কস্ নে জাহানারা ! পুত্র আমার পা জড়িয়ে আমার ক্ষমা ভিক্ষা যাচ্ছে । আমি কি তা না দিয়ে থাকতে পারি ? [হা রে বাপের মন ! এতদিন ধরে' তোর হৃদয়ের নিভতে বসে' এইটুকুর জন্য আরাধনা করছিলাম ! এক মুহূর্তে এই ক্রোধ গলে' জল হ'য়ে গেল !]

ঔরঞ্জীব । আনুন পিতা—আপনাকে আবার আগ্রার সিংহাসনে বসাই । [বসিয়ে মকায় গিয়ে আমার মহাপাতকের প্রায়শ্চিত্ত করি ।]

সাজাহান । না, আমি আর সম্রাট হ'য়ে বসতে চাই না । আমার সন্ধ্যা ঘনিয়ে এসেছে—এ সাম্রাজ্য তুমি ভোগ কর পুত্র ! এ মণিমুক্তা মুকুট তোমার ! আর মার্জনা ! ঔরঞ্জীব—ঔরঞ্জীব ! না, সে সব মনে কর্ব না ! ঔরঞ্জীব ! তোমার সব অপরাধ ক্ষমা করলাম ।

চক্ষু চাঙ্কিলেন

জাহানারা । পিতা ! দারার হত্যাকারীকে ক্ষমা !

সাজাহান । চুপ ! জাহানারা ! এ সময়ে আমার হৃদয়ে আর

বা দিস্ নে। তাদের ত আর ফিরে পাবো না। সাত বৎসর ~~দুঃখে~~
কাটায়েছি, এতদিন বড় জালায় জলেছি। শোকে উন্মাদ হ'য়ে গিবেছি।
দেখেছি ত—একদিন সুখী হ'তে দে! তুইও ঔরঞ্জীবকে ক্ষমা কর মা।

ঔরঞ্জীব। আমাকে ক্ষমা কর শুণী।

জাহানারা। চাইতে পার্ছ ? পিতার মত আমার স্থবিরত্ব হয় নি।
রাজদস্য! ঘাতক! শঠ!

সাজাহান। তোবই মত মাতহারা জাহানারা—তোবই মত বেচারী!
ক্ষমা কর। ওব মা যদি এখন বেচে থাকতো, সে কি কর্ত্ত জাহানারা।
—তাই সেই মায়ের ব্যথা যে সে আমার কাছে জমা রেখে গিয়েছে।
কি জাহানারা? তবু নিস্তরু! চেয়ে দেখ্ এই সন্ধ্যাকালে ঐ যমুনার
দিকে—দেখ্ সে কি স্বচ্ছ! চেয়ে দেখ্ ঐ আকাশের দিকে—দেখ্ সে
কি গাঢ়! চেয়ে দেখ্ ঐ কুঞ্জবনের দিকে—দেখ্ সে কি সুন্দর! মার'
চেয়ে দেখ্—ঐ প্রসূরীভূত প্রেমাক্ষ, ঐ অনন্ত আক্ষেপের আপ্ত
বিয়োগের অমর-কাহিনী—ঐ স্থির মৌন নিষ্কলক শুভ্র মন্দির, ঐ
তাজমহলের দিকে চেয়ে দেখ্—সে কি করুণ! তাদের দিকে চেয়ে
ঔরঞ্জীবকে ক্ষমা কর—আর ভাবতে চেষ্টা কর যে—এ সংসারকে যত
থারাপ ভাবিস্—সে তত থাবাপ নয়। জাহানারা!

জাহানারা। ঔরঞ্জীব! এখানে তোমার জয় সম্পূর্ণ হ'লো।
ঔরঞ্জীব—আমার এই জীর্ণ মুমূর্ষু পিতার অহুরোধে আমি তোমায়
ক্ষমা করলাম।

মুখ চাকিলেন

বেগে অহরং উন্মিগার অবেশ

অহরং। কিন্তু আমি ক্ষমা করি নাই ঘাতক! পৃথিবী শুধু যদি
তোমায় ক্ষমা করে, আমি করব না। [আমি তোমায় অভিশাপ দিচ্ছি;

ক্রুদ্ধ ফণিনীর উষ্ণ নিঃশ্বাসে আমি তোমাকে অভিশাপ দিচ্ছি। সে অভিশাপের শৈব ছায়া যেন একটা আতঙ্কের মত তোমার আহাবে, বিহারে তোমার পিছনে পিছনে ফেরে। নিদ্রায় সেই অভিশাপের পর্বতভার যেন তোমার বক্ষে চেপে ধরে। সেই অভিশাপের বিকট ধ্বনি যেন তোমার সকল বিজয়বাণে বেসুরো বেজে উঠে। 'তুমি আমার পিতাকে হত্যা করে' যে সাম্রাজ্য অধিকার করেছো, আমি অভিশাপ দেই, যেন তুমি দীর্ঘকাল বাঁচো, আর সেই সাম্রাজ্য ভোগ কর; যেন সেই সাম্রাজ্য তোমার কালস্বরূপ হয়; যেন সে একটা পাপ থেকে কেবল গাঢ়তর পাপে তোমায় নিষ্ক্ষেপ করে, যাতে মর্কীর সময় তোমার ঐ ঠাণ্ডা-মলাটে ঈশ্বরের করুণার এক কণাও না পাও।

সাজাহান, ঔরঞ্জীব ও জাহানারা তিন এনেই শির অবনত করিয়া রহিলেন

যবনিকা

শুভদাস চট্টোপাধ্যায় এণ্ড সন্স-এর পক্ষে
মুদ্রাকর ও প্রকাশক—শ্রীগোবিন্দপদ ভট্টাচার্য্য, ভারতবর্ষ প্রিন্টিং ওয়ার্কস্,
২০, অ্যাংলো, কর্ণওয়ালিস স্ট্রীট, কলিকাতা—৩

